

**SEVENTH LEGISLATIVE ASSEMBLY OF MIZORAM  
( SECOND SESSION )**

**LIST OF BUSINESS**

FOR SECOND SITTING ON WEDNESDAY, THE 19<sup>th</sup> MARCH, 2014  
( Time 10:30 A.M. to 1:00 P.M. and 2:00 P.M. to 4:00 P.M. )

**QUESTIONS**

1. **Questions** entered in separate list to be asked and oral answers given.

**LAYING OF PAPERS**

2. **Pu LAL THANHAWLA**, Chief Minister to lay on the Table of the House a copy each of the following :-
  - i) Annual Report for the year 2012-2013 of the Joint Electricity Regulatory Commission for the State of Manipur and Mizoram.
  - ii) Joint Electricity Regulatory Commission for Manipur and Mizoram ( Electricity Supply Code ) Regulations, 2013 ( hereinafter referred to as “the code” ).
  - iii) Mizoram Information Commission (MIC)s Annual Report for 2012-2013 ( 1<sup>st</sup> April 2012 - 31<sup>st</sup> March 2013 ).
  
3. **Pu LALSAWTA**, Minister to lay on the Table of the House a copy each of the following :-
  - i) Appropriation Accounts 2012-2013 Government of Mizoram.
  - ii) Finance Accounts 2012-2013 Volume-I & Volume-II Government of Mizoram.
  - iii) Notification relating to Money Circulation Scheme ( Banning ) ( Mizoram ) Rules, 2013.

- iv) Statement of Six Monthly Review of the Finance Minister on the Fiscal Position of Mizoram for the Second Half of 2011-2012 and the First Half of 2012-2013.

**PRESENTATION OF REPORTS**

4. **THE SPEAKER** to present to the House the First Report of Rules Committee.
5. **Pu JOHN SIAMKUNGA** to present to the House the following Reports of Committee on Subordinate Legislation :-
- i) The First Report of Committee on Subordinate Legislation on The Mizoram Municipalities ( Procedure and Conduct of Business ) Rules, 2007 and The Mizoram Grants-in-aid to Aizawl Municipal Council Rules, 2008 relating to Urban Development & Poverty Alleviation Department.
- ii) The Second Report of Committee on Subordinate Legislation on The Mizoram Education ( Transfer and Posting of School Teachers ) Rules, 2006, The Mizoram Education ( Grants-in-aid for General Maintenance of Private Schools ) Rules, 2006, The Mizoram Education ( Establishment and Management of Private High Schools ) Rules, 2006 and The Mizoram Education ( Establishment and Management of Private Higher Secondary Schools ) Rules, 2006 relating to School Education Department.

**DISCUSSION ON MOTION OF THANKS**

6. Discussion on Motion of Thanks on the Address of the Governor ( to be concluded ).

NGURTHANZUALA  
Secretary

....

**SPEAKER** : Nimahsela thim ata chhuaka, a eng mak taka lut tura kotu che u thatna chu in entir theih nan nangni zawng chi thlan, lal puithiamho, hnam thianghlim, Pathian mite ngei in ni si a; hmanlai khan mi reng in ni lo va, tunah erawh chuan Pathian mi in ni ta a, hmanlai khan zahngaihna in hmu lo va, tunah erawh chuan zahngaihna in hmu ta a. (I Petera 2:9-10)

Awle, zawhna hun kan hmang dawn tawh ang a, zawhna hi 21 lai kan nei a, zawhna neitute khan in thiante hun ken nachang hria ula a tha ang e. Tunah Starred Question No.1-na zawt turin Pu K.Sangthuama i lo sawm ang.

**Pu K.SANGTHUAMA** : Pu Speaker ka lawm e. Ka zawhna -

- a) Sairang Horticulture ramah sawrkar phalna lova mimal in sa an awm tih sawrkarin a hria em ?
- b) Hria se mi engzat nge ?
- c) Tute nge an hming ?
- d) Sawrkarin engtia tih nge a tum ? tih ka zawt e.

**Pu P.C. LALTHANLIANA, MINISTER:** Pu Speaker, kan member pui zahawm tak zawhna chhanna te chu heng hi a ni:-

- a) Hria e.
- b) Mi 6 an ni e.
- c) 1. Zothanpuui
2. Vanlalhruaia
3. Biaksanga
4. Lalhmachhuani
5. J.Lalnunthianghlima
6. S.L.T. Private Company.

Hemi chungchang hi Revenue Department ah thlen a ni a, Revenue Department-in explanation an call a. Revenue Department hmalakna nghah mek a ni.

\* Speech not cotteded.

**Pu K. SANGTHUAMA** : Pu Speaker, khuti lai ram khu sawrkar lei a ni a, chumai bakah a lehnam khu FCI Kudam atana lei a ni a, chuan Horticulture hi sahthlak ve a ni a. Tunah hian Supply-in an enkawl niin ka hria a, Supply ram FCI Kudam sakna tura ruahman a ni a, a ram pawh zau tak a ni a, chuvangin Supply-in an enkawlah pawh chuan tunah hian in hmun patta tuma bei awm

ni te pawhin sawina a awm a, hei hi khawngaihin kan sawrkar hian zawhna a ka han sawi ang hian lo ngaihven deuh hlek ula ka tih avanga zawhna han zawt ka ni a. Chuvangin, tunah sawrkar-a patta dil mek engmawzah an awm bawk a, FCI Kudam sakna tura tih a ni a, mahse tunah chuan rail head te a lo thlen dawn tawh avangin khulai a sak chu a rem kher lo ang a, engemaw atana hmun tangkai tak a ni a, mimal in hmun atan hi chuan sawrkar hian ti lo hram se tih ka duh a ni. Chuvangin a rang lamin min seng hawi sak thei angem tih ka'n zawt belh a ni.

**Pu LAL THANHAWLA, CHIEF MINISTER** : Pu Speaker, FCI kudam tuna Zawlnuam thlang University kawng awm khu sawn chhuah ngei ngei tur a ni a; tin, FCI ho hian rail station bul hnai an duh a, khulai ram hrim hrim khu sawrkarin humhalh tlat tur a ni a.

Tin, Revenue Department hi a bikin surveyor level bikah hian mi ram chhuh sak a compensation lak nana hmang mai mai te; tin, thenawm khawveng inngirngho tir te an tam mai a, ngunthluk taka en an ngai a. Tin, LSC lei tur te pawh a awm tih ka lo hria a, tun hnai maiah chungte pawh chu chhui a ngai dawn a. Engpawhnise, ka din chhuah chhan chu khulai ram khu sawrkarin a mamawh a, a humhalh bawk a, dik lo taka awm te chu an chungah kut thlak a ni ang.

**SPEAKER** : A chiang viau ve, zawhna pahnihaah kan kal tawh ang a, Er.Lalrinawma'n zawhna pahniha zawt sela.

**Er. LALRINAWMA** : Pu Speaker, ka lawm e, Mizoram Polytechnic Serchhip a dah tur hi engtikah nge tan theih a nih ang? tih ka zawt e.

\* Speech not corrected

**Pu R. ROMAWIA, MINISTER** : Pu Speaker, ka lawm e. Er. Lalrinawma zawhna chhanna chu, Polytechnic Serchhip-a dah tur hi a panna kawng lamah harsatna a awm avangin dah tan hun tur a la hriat mai theih loh.

**SPEAKER** : A chiang e. Zawhna 3-naah kan kal thei em?

**Er. LALRINAWMA** : Annual Plan 2013 leh 2014 ah khan anticipated expenditure kha ₹ 200,000,000/- a in ziak a, kha kha a pawisa kha engtingge a awm tak tih te kha ka han hre chak deuh a. Tin, a hmunhma han tih laiah khan a panna tur laih nan pawisa a awm mai te ka'n ring a, khawi building mah a panna tel lova ruahman kha a awm ka ring lova khatiang College reng ruang tur kha chu. Chuvang chuan kha pawisa estimate kha

₹ 1230,000,000/- vel niin ka hria a, tah chuan a panna pawh kha tel awm tak a ni a, a laihna tur te pawh kha a tih theih nghal mai lawm ni kha pawisa khan tih te ka'n zawt a. Tin, a hmunhma thuah hian Mulentlang kha Chhiahtlangah ti a tih mek a ni a; amaherawhchu tunah hian Saidanah tih te pawh a ri a. Amaherawhchu, Chhiahtlang mipuiten tuna an ram pek bakah pawh khian tin sawm hmun lai an la reserve nghe nghe a, chuvangin a hmun ngaiyah khian min han tihlang sak ula. Tin, tuna kan minister zahawm takin a chhanna 'a panna kawng' tih lai kha chu kha a pawisa awm tawh sa ₹ 200,000,000/- atang leh College khan kha a approach road kha chu a keng tel turah ka'n ngai deuh a, khalai kha engnge a awmzia tih ka'n zawhbelh leh a ni e. Ka lawm e.

\* Speech not corrected

**SPEAKER** : Minister-in chu chu han chhan sak se.

**Pu R. ROMAWIA, MINISTER** : Pu Speaker, hetiang hi thil awmzia a ni a, Human Resources atanga kan pawisa hmuh atanga Polytechnic pakhat siamna atan hian ₹ 1230,000,000/- chu a ni ngei a, khuta tanga rawn earmark vek a ni a, 8 crore hi a building vel tan a ni a; tin, 4.3 crore hi a material vel leh building han luah tak tak dawn a thil neuh neuh atan a ni a, a approach road tih vel kha a lang tel hran lova, chu chu P.W.D lam khan engemaw chenah min puih theih a ngai a, chumi tur chuan financial constraint a awm a. Tin, pawisa kha P.W.D ah khan ₹ 200,000,000/- chu transfer a ni ngei a, mahse kang kha a building structure vel tur atan khan a ni ber a. Chu chu tuna harsatna awm a ni a, mahse eng angin nge kan sut hawn dawn kan hre lova. Khatilai vel a panna kawng tur leh a tih neuh neuh atan khan ₹ 100,000,000/- lai ngai turin estimate a awm a, a pawisa ₹ 1230,000,000/- atanga pawh heu mai kha chu remchan lohna a awm ve rih a ni. Tin, sorkarin hmun dang remchang zawk a awm em tih chu han thlir bawk mahsela waviin thlenga rilrua riak nghet ber chu khitilaia Chhiahtlang Mutelen tlang kha chu ala ni fan tho rih a ni.

**SPEAKER** : Zawhbelhna dang a awm tawh lo niin alang a. Zawnha dangah kan kal ang a, zawnha 3-na Pu S.Laldingliana.

**Pu S. LALDINGLIANA** : Pu Speaker, Higher & Technical Education Department changtu Minister zahawm tak ka zawnha chu – Lunglei Hrangchal kawn Polytechnic hi Lunglei khawpui chhungah site office siam sak theih a ni ang em? tih a ni e.

\* Speech not corrected

**SPEAKER** : Minister Pu R. Romawia i lo ko ang.

**Pu R. ROMAWIA, MINISTER** : Pu Speaker, Lunglei 'S' bialtu member zahawm tak Pu S. Laldingliana zawhna chhanna chu hetiang hi a ni- Sorkarin tun dinhmunah Mizoram Polytechnic Lunglei Hrangchalkawn ami hi Lunglei khaw chhungah site office a siam sak mai thei rih lova, ngaihtuah mek a ni a. Tin, hetilalah hian Pu Speaker, han sawi zau ta deuh hlek ila, Hrangchalkawn a kan harsatna ber chu internet kha kan la tilut hlei thei lova, Theiri atanga a hrui zam kha (telephone line) a lo bo zel mai si kha Telephone hnathawk lam ho kha an beidawng deuh tawh a, churang chuan kan hmunah sawn High Tower min siam sak mek a, chu High Tower chu a function thei tep tawh a, khatiang kha a nih chuan wire rukbo tih vel kha a kal kan daih thei a. High Tower te a lo awm chuan electronic lam thil engkim kan ti thei dawn a, reiloteah hian tih mai theih kan in ring a, chuti chungah Lunglei lama site office kha ala tul tlat a nih tho chuan kan la ngaihtuah zel ang chu.

**SPEAKER** : Zawhbelhna a awm em ?

**Pu S. LALDINGLIANA** : Site office kha High Tower te a awm a internet facilities te a awm thei a nih chuan a tulna a awm lem lova. Amaherawhchu, Lunglei Polytechnic hi 25<sup>th</sup> Sept, 1981 a din a ni a, wawiin thleng hian zirlaite hian harsatna tam tak an la nei a, tuna internet facility kan tih te leh fax te pawh an hman theih loh bakah hian.....Principal nghet an nei lo va. Tin, an Librarian pawh hi hmun dangah chhawr an ni a. Chutiang chuan zirlaite hian harsatna tam tak an nei a ni. Chuvangin, kan minister zahawm tak pawh hian heng an harsatnate pawh hi min lo ensak thei ang em? Heng an harsatnate, a lian tham lem lo, awlsam te ang hi chu min han sutkian sak sela tih ka,n ngen a ni e. Ka lawm e.

\* Speech not corrected

**SPEAKER** : Higher & Technical Education Minister.

**Pu R. ROMAWIA, MINISTER** : A ngenna ang khan tihhlawhtlinsak zel kan tum e.

**SPEAKER** : A nih leh zawhna palinaah kan kal ang a, Starred Question No 4-na zawt turin Pu K. Sangthuama i sawm ang.

**Pu K.SANGTHUAMA** : Pu Speaker, ka lawm e. Fisheries Department Minister zahawm tak chhan atan :-

- a) Mizoramah sangha khawia ei zawng engzatnge awm?
- b) Kum 2013-2014 chungin quintal engzatnge thar chhuah a nih?
- c) New Market-ah a zawrhna hmun siam sak an ni em?

**SPEAKER** : Fisheries Minister.

**Pu. B. D. CHAKMA, MINISTER** : Member zahawm tak Pu K. Sangthuama zawhna chhanna chu -

- a) Mizoramah sangha khawia ei zawng chu mi 10,838 a ni a.
- b) Kum 2013-2014 chhunga thar chhuah zat chu metric ton 5800 beisei a ni a. Final production hi District Fisheries Office atangin harvest May thla tawp lamah a chiang ang.
- c) A chhanna chu Sangha thartuten an thar chhhuah an hralh theih nan Fisheries Department Retail Outlet an siam sak a, mahse, outlet hi tunah chuan Trade and Commerce Department hnuai awm a ni. Ka lawm e.

**SPEAKER** : Zawhbelhna, a awm lo maw ?

**Pu LALRUATKIMA** : Pu Speaker, zawhbelhna. Fisheries Department hian khawi hmunah te nge fish seed farm a neih ? A fish seed farm hming leh a awmna hmun min hralh thei em ? tih ka zawt e.

**SPEAKER** : Minister.

**Pu B.D. CHAKMA, MINISTER** : Pu Speaker, tuna member zahawm tak zawhna hi ziakin a rang thei ang berin ka thehlut mai ang. Ka lawm e.

**SPEAKER** : A nih leh zawhna panganaah kan kal thei e. Starred Question No.5-na zawt turin Dr. K. Beichhua i lo sawm ang.

**Dr. K. BEICHHUA** : Rural Development minister zahawm tak hnena ka zawhna chu hei hi a ni e :-

- a) Backward Region Grant Fund hi Central atangin Central sorkarin engtik ni khan nge state-ah a lo released ?
- b) Mizoram sorkar hian Lawngtlai leh Saiha District-ah a release tawh em ? tih hi ka zawhna a ni e.

\* Speech not corrected

**SPEAKER** : Rural Development Minister ka sawm e.

**Pu R. LALZIRLIANA, MINISTER** : Pu Speaker, Dr. K. Beichhu-a zawhna chhanna :-

- a) Backward Region Grant Fund hi central sorkarin ni 10.9 2013- ah a rawn released a ni.
- b) Release tawh e.

**DR. K.BEICHHUA** : Pu Speaker, zawhbelhna ka nei duh a. Backward Region Plan Fund hi a guideline-a kan hmuh danah chuan state-a a rawn luh atanga within 15 days-a a thlenna tur hmuna thleng ngei tur a ni tih a ni a, chutiang a nih loh a tikhawtlai emaw bank-a lo dah chuan a interest nena pek tur tih a ni a. Thla 9, 2013-a hmuh tawh a nih si a, tuna released lo ni ta se bank interest hi state hian district hnenah a pe em tih ka zawhna pakhat a ni a. Lo pe lo se eng ang in nge state hian a hman tih ka zawt duh bawk a ni.

\* Speech not corrected

**SPEAKER** : Minister-in chhang se.

**Pu R. LALZIRLIANA, MINISTER** : Pu Speaker, tuna zawhbelhna chhanna kha hetiang hi a ni. Central sawrkar hian dan naranin bituk a rawn nei thin a, BRGF tih te, BADP tih te leh central sponsored scheme dangah pawh hian an release hun turte rawn sawi a ni thin a. Amaherawhchu a tlangpuiin state sawrkarin an tlin lova, tu sawrkarah pawh an tlin lova, Tin, tuna a zawhna tak phei hi chu central sorkar atngin ni 10.9.2013-ah released a ni a. Tichuan, ni 29.11.2013-ah Lawngtlai District-ah phei chuan released leh a ni a. Chutiang chuan Saiha District-ah pawh release tur niin, amaherawhchu kan treasury-ten limit an neih avangin hetiang hi special permit dil a ngai a. Chuvangin, an release thuai thei lo thin a. Hetiang hi chu a interest pek a la awm lo.

**SPEAKER** : A chiang thawkhat e. Zawhna 6-naah kan kal tawh ang a. Pu R.L. Pianmawia zawt turin i sawm ang u.

**Pu R.L. PIANMAWIA** : Pu Speaker, Health & Family Welfare Minister zahawm tak chhan atan –

- a) Doctor indaihlohna tiziaawm turin hmalak a awm em ?
- b) Hnathawktu tur Nurse leh Health Worker lak thar tumna a awm em? tih a ni e.

**SPEAKER** : Minister chhang turin i lo sawm ang.

**Pu LAL THANZARA , MINISTER** : Pu Speaker, Tuivawl bialtu MLA zahawm tak Pu R.L.Pianmawia zawhna –



- a) Doctor indaihlohna tiziaawm turin hmalak a awm em tih chhanna chu ‘Awm e, hma lak mek zel a ni’ tih a ni a.
- b) Hnathawktu tur Nurse leh Health Worker lak thar tumna a awm em tih chhanna chu - Staff Nurse regular posts 20 (sawmhnih) leh Health Worker (30 Male & 20 Female) 50 nos. M.R. Skilled-II a lak tum a ni.

**SPEAKER** : Zawhbelhna.

**Pu R.L. PIANMAWIA** : Pu Speaker, ka zawhbelhna chu – Nurse leh Health Worker lakbelh tumna a awm tih chhanna lawmawm tak kan dawng a. Heng hi lakbelh ni ta sela Ratu PHC-ah hian tunah Nurse pakhat chauh awm a, a mamawh tawk min pe thei angem?

Tin, Health Worker hi heng Pehlawnah te, Chhanhhuahna Khawpuiah te, Sunhluchhipah te, North Tingmunah te hian mipa kan nei lova. Tin, New Vervek leh Sailutarah leh Khawpuarah te hian hmeichhia kan nei lo thung a, heng lak thar turte atang hian heng mamawhnaah te hian min dah sak thei ang em tih ka zawhbelh e.

**SPEAKER** : Minister-in han chhang se.

**Pu LAL THANZARA, MINISTER** : Pu Speaker, Pu R.L. Pianmawia zawhbelhna chhanna chu, an mamawh dan Zoram pum en chhuaka hma lak tum a ni.

**Er. LALRINAWMA** : Pu Speaker, kan Health minister zahawm tak chhan atan zawhna pakhat zawh ve ka duh a. Health Supervisor hi thingtlangah an indaih lo nasa mai a. Kan bial chhung Chhingchhipah pawh khian pahnihah pakhat chauh a awm a. Tin, ka hriatsual loh chuan E.Lungdar PHC ah pawh khian an nei lovin ka hria a. Aizawl lamah hian kan awm deuh nualin ka hria a. Heng hi sem rual dan emaw rualkhai zawka kal dan a awm thei em ? ka lawm e.

\* Speech not corrected

**Pu LAL THANZARA, MINISTER** : Pu Speaker, Er. Lalrinawma member zahawm tak zawhna chhanna chu heng hi tunah hian en fel tum mek a ni a, hma lak mek a ni.

**SPEAKER** : Awle, zawhna 7-na, Er. Lalrinawma, MLA zahawm takin zawt se.

**Er. LALRINAWMA** : Pu Speaker, ka lawm e. Ka zawhna chu-

- a) Mizoram State Agriculture Produce Marketing (Development & Regulation) Act, 2008 hi Rules siam a ni tawh em ?
- b) NLUP hnuaiakhuhitheih chingtute tan hian a hralhna tur sorkarin engtiangin nge hmahlir a neih ? Ka lawm e.

\* Speech not corrected

**Pu H. ROHLUNA, MINISTER** : Pu Speaker, Tuikum bialtu zahawm tak Er. Lalrinawma zawhna chhanna chu hei hi a ni :-

- (a) The Mizoram State Agriculture Produce Marketing (Development & Regulation) Rules hi siam a ni tawh.
- (b) NLUP hnuaiakhuhitheih chingtute hamthatna turin MIFCO hnuaiakhuhitheih Fruit Juice Concentration Plant, Chhingchhip chu a theih ang anga thuam changtlun a ni a. Kuthnathawktute thar chhuah an leisakna atan MIFCO hnenah pawh NLUP Implementing Board atangin a remchan dan angin sum pek thin a ni.

\* Speech not corrected

**SPEAKER** : Zawhbelhna a awm em ?

**Er. LALRINAWMA** : Zawhbelhna, lakhuihtheih chingtute chungchanga sawi ka'n duh lai bik chu kan minister zahawm takin min lo hriat sak atan. NLUP hnuaiakhuhitheih hian 2011-12 chhungin Serchhip district-ah ringawt beneficiaries chhungkua 204 an awm a. Tichuan, Mizoram pumpuiah hian 1182 an awm a ni.

Tuna kan MIFCO khawla Juice Concentration khawl khi tunah pheih chuan a function theih lo niin ka hria a. A chhan chu ni khatah hian a tam theih ang bera sawr pawhin quintal 45 bak a sawr theih lova, mihringin vel chawp a ngaih avangin. Tichuan, tun anga AVP hmalaknate a lo hlawhtling a nih chuan lakhuih hi thla hnih chhung vel, a tlangpui thuin a rah hi seng a ni thin a. A vang laiin kar khatah vawi hnih te an lo a. Tichuan, chhungkaw khat hian tin khat hmun pawh nei ta ang sela, kar khatah vawi hnih an lawh chuan tin khat hmunah quintal 50 vel an lo theih anga ngaih a ni deuh tlangpui a, a chhehvel anga chhutin. Tichuan, quintal 118200 vel hi vawi khat lawha thar tur anga ngaih a ni ta a.

Tichuan hman kumah khan lakhuih chungchangah hian buaina kan tawh chiam tawh a. Tichuan tuna khawl khi tihchangtlun a nih si loh chuan kan buaina ngai bawh kha kan hmachhawn leh turah ka'n ngai a. A chhan chu zep thu pawh a awm lova, kan

lakhuih hi a thur deuh hlek a, phai lam te nena han khaikhin ralah pheih chuan a thar rual lai a nih pheih chuan hralh hi a kal lo deuh zawk a. Chutiang a nih si avangin khilai lakhuih herna khawl khi tih changtlun dan, khawl tha zawk, darkar khatah quintal 20, 30 her theih khawl hi a bun theih lo'm ni tih leh hma min lo lak sak theih lo'm ni tih kha ka'n zawt a ni e, ka lawm e.

\* Speech not corrected

**SPEAKER** : Minister-in han chhang sela.

**Pu H. ROHLUNA, MINISTER** : Pu Speaker, member zahawm tak thahnemngaihna a lawmawm khawp a, Fruit Juice Concentration Plant Chhingchhip MIFCO hnuaia mi hi NLUP Implementing Board atangin tihchangtlun nan kan sawi tawh angin nuai 143 chuang pek tawh a ni a. A theih ang angin sawrkarin kut hnathawktute mamawhna hriain siam that a tum a. Amaherawhchu, sum harsatna avangin duh angin a kal chak theih loh a ni tih chu tlang hriat a ni a.

Tin, a chingtute lam atang te leh a khawl te nen, a chingtuten an thar that lain a khawl lamah duhthu a la sam lo a, khawl a that lain a chingtute lamah thar chhuah a tha lova, kum kalta lam han enin. Chuvangin duhthusam angin khi khi a function chak theih lova. Amaherawhchu, tunah hian sawrkarin NLUP dawng kut hnathawktute chawikanna'n leh an hlawhtlinna a han hmuh chhoh hian MIFCO hnuaia Fruit Juice Concentration Plant hi Lakhuihtheih mai ni lovin, Saptheih leh theih dangte pawh sawngbawlina turin tihchangtlun zel a tum a. Chu chu a theih ang angin sawrkarin sum awmdan azirin hma a la chho zel a ni tih member zahawm takin min lo hriat sak se.

\* Speech not corrected

**SPEAKER** : A nih leh zawhna 8-naah kan kal theih a, Pu Pianmawia zawt turin i lo sawm ang u.

**Pu R.L. PIANMAWIA** : Pu Speaker, Finance Department changtu Minister zahawm tak chhan atan Sakawrdaiah SBI/MRB/Apex Bank din tura hmalak theih a ni em tih a ni e.

**SPEAKER** : Finance Minister

**Pu LALSAWTA, MINISTER** : Pu Speaker, bank hi hawn theih a ni a. Sakawrdaiah te, khaw dangah pawh. Amaherawhchu, Mizoram sorkar thu pumhlum a ni

lova, bank lam te pawhin a that tur leh tur loh te ngaihtuah a inrawnkhawma tih chi a ni e, tih kha ka chhanna a ni.

**Pu R.L. PIANMAWIA** : Pu Speaker, Finance Minister hmasa hun lai pawh khan lehkha te kan lo theh lut tawh a. Sorkar angin theihtawpin hma kan lo la ang tih a ni a. Tunah hian a tharin Finance Department hian Sakawrdaia bank hawng thei tur hian hma min lak sak thar thei ang em tih ka zawt e.

**Pu LALSAWTA, MINISTER** : Pu Speaker, hmalakna hi kan chhonzawm dawn a, kan theih ang tawkin. Amaherawhchu, kan sawi tawh ang khan kan sorkar thu vek a ni bik lova, a bank neitute nen inrawna tihchhoh kha a ni a. Tun dinhmunah hian Sakawrdaia dah hi a viable lo niin an la ngaiin ka hria a, chuvang mai chuan kan la muang chang a nih ka ring.

**Pu K. SANGTHUAMA** : Sairang ka bialah khuan State Bank of India hian branch an la nei lova. Chu chu kan Finance Minister zahawm tak kha khulaiah khuan hma min lakpui thei angem tih ka'n zawt ve leh bawk a ni e.

**Pu LALSAWTA, MINISTER** : Pu Speaker, member zahawm tak, Pu K. Sangthuaman a rawn zawhbelhna, Bank din belh emaw hawn belh emaw hi kan sawi tawh ang kha a ni a, anni hi mipui rawngbawl tur sumdawng paa ti an nih avangin uluk taka inngaihtuah vek an ni a. Amaherawhchu, an thu thu chu a ni bik lova, sorkarin helaiah hian a tul a ni, mipui rawng in bawl a ngai a ni kan tih tlat chuan an zawm ve pawh a ngaihna a awm thin a. Chuvangin, tuna a rawn sawi ang pawh kha a tul dan angin kan lo bawhzui ang nge tih kha ka chhanna a ni.

**SPEAKER** : Zawhna pakwana, Er.Lalrinawma MLA zahawm tak zawt turin sawm ila.

**Er. LALRINAWMA** : Pu Speaker, ka lawm e. Horticulture Minister zahawm tak chhan atan ka zawhna chu hengte hi an ni :-

- a) Tun kum kal ta 2012-13 chhung khan Horticulture Department-in price support atan engzatnge a hmuh ? Eng angin nge hman a nih ?
- b) NLUP leh RKVY hnuatia tuna Sapthei ching tura a thlan te hi engtik hunah nge tanpuina pek an nih tih a ni e.

\* Speech not corrected.

**Pu PC LALTHANLIANA, MINISTER** : Pu Speaker Tuikum Bialtu zahawm tak zawhna chhanna chu hetiang hi a ni :-

- a) 2009-2013 chhung khan Horticulture Department in price support atan sum engzatmah hmuh a nei lova, sum hmuh a nih loh avangin a hman dan hi sawi tur a awm lo a ni.
- b) NLUP hnuai tuna Sapthei ching tura thlan te hi NLUP Implementing Board ruaiin verify mek an ni a, hma la tha hote chu NLUP Implementing Board-in sem theih a tih hun leh fund awm dan azirin pek an ni dawn a ni. Tin, RKVY hnuai Sapthei chinna tura beneficiary leh kuate thlan tawh pawh a pawisa hi K deposit atangtein released fel tir a ni a, treasury lamah kan la draw thei lova, kan la pe mai thei lo a ni. Kan draw hun hunah hmalak a ni ang tih kha ka chhanna a ni e.

\* Speech not corrected.

**SPEAKER** : Awle, zawhbelhna question neituin zawt se

**Er. LALRINAWMA** : Pu Speaker, Hortoki leh a chheh velah hian Hatkora hi an hralh thei miah lo mai a, hei hi Horticulture hnuai ami niawm tak a ni a. He mangan-na hi kum hnih kum thum kal ta atang tawh khan a niin ka hria a, kei pawh ka zu kal lain min hrih a, a rapthlak khawpin ka hria a. Chuvang chuan Horticulture Department lam hian an hriatpui em aw tih minister zahawm tak ka'n zawt a.

Kan sawi belh duh lai chu, ka bial Tuikumah hian khaw 11 kha Sapthei ching turin an thlang a, RKVY hnuai 'sum a awm tawh a ni', an ti a. Han zawh chianin lo te an vat tawh a, mipui an chiai tawh em em a. Chuvangin NLUP lam atanga ala rem chiah lo a nih pawhin RKVY hnuai a rem tawh tih lai pawisa hi, tunah lo vah te a ni tawh a, a chinte pawh a lo hun chho mai dawn a, chungte chu a pek chhuah mai theih lawm ni tih ka'n zawt belh duh a ni.

\* Speech not corrected.

**Pu P.C. LALTHANLIANA, MINISTER** : Pu Speaker, Hatkora chingtute hralh theih loh harsatna kha sawrkar ang leh mimal angin ka hriatpui lem lo tih ka'n sawi duh a ni. Tin, price support nei turin sawrkarin crop tinah hian

minimum price a ruahman ang a, sawrkarin crop tina minimum price a ruahman chuan kha minimum price chung atanga kut hnathawktuten harsatna an tawk a, an hralh thei lo a nih chuan price support kha sawrkarin a pe tur a ni a, chutiang policy kan neih loh avangin kan hnuai ang pawh nisela khatiang ang Ser chi kha han dawm maina a awm lo a ni.

A zawhbelhna pahnihna, khi lai tlangdunga Sapthei ching tura thlante vawiin thlenga pe thei lo tih kha Pu Speaker, he pawisa RKVY ami hi 2012-13 ami tawh a ni nghe nghe a, chuvangin pek ran theih ang ber kan tum ang a. Tunah hian kan draw tawh tlem azawng atangin planting material te lei a ni tawh a. Tunah hian nuai 381,000 treasury-ah draw lohvin a la awm a, chung chu finance lamah te pawh min draw thuai tir tur te pawhin kan lo sawi ang a, lo thlaphang lo phawt mai sela, an hmuh tur a nih chuan an hmu ang tih ka sawi duh a ni.

\* Speech not corrected.

**Pu R.L. PIANMAWIA:** Pu Speaker Forest Minister zahawm tak chhan atan - Sakawrdaiah hian Forest Department Quarter thliin a chhem chhiat tawh te sak thar leh tumna a awm em tih a ni e.

**Pu LALRINMAWIA RALTE, MINISTER :** Pu Speaker, Pu R.L.Pianmawia zawhna, Sakawrdaiah hian Forest Department quarter thliin a tihchhiat tawhte sak thar leh tumna a awm em tih chhanna chu - Sakawrdaiah hian kan hriat theih chinah Department-in quarters a neih ngai loh avangin chutiang thli chhem chhiat sak that tur kha a awm kan hre lo a ni.

\* Speech not corrected.

**SPEAKER :** Zawhbelhna, zawhna neituin zawt se.

**Pu R.L. PIANMAWIA :** Ka hre soal a nih loh chuan pakhat satuah pawh ka tang ve a. Chuvangin an nei lo a nih chuan a hmun hma leh engemaw velah hauh tawh lovin kan minister khan min pe thei em ?

**Pu LALRINMAWIA RALTE, MINISTER :** Pu Speaker, a lawmawm e. Ni e, kan han inzawt a, party lamah kan hotu kan senior a ni a, a lo sa a nihawm chu maw. Tunhnaiah hi chuan DFO ni lai leh a hmaa lo awm tawh te pawh kan han inzawt chhawng thin a, an neih hi an hre lova. Amaherawhchu, ram an nei a ni, hmang tangkai lo deuhvin. Chu chu Division hrang hrangin building sak kan mamawh dan pawh hi a tak takah chuan a

inang chiah lova, hna neih dan pawh a inang chiah lo a ni. Mihring dah pawh hi uniform-a dah rual put put pawh hi a tul chiah lova. Kan mamawhna te a awm a nih chuan Pu Speaker, hman tangkai vat a ngai ang a, mamawh lova ram humhalh ngawt kan lo ni rei lutuk a, kan mamawh lawk loh te a nih chuan member zahawm tak ngenna ang khan Department-ah a rang thei ang berin kan lo en ang a, mipui leh khawtlang hruaitute hnena hlan let leh pawh kha a tha zawk mai thei. Ka lawm e.

\* Speech not corrected.

**SPEAKER** : Beisei aiin a chiang.

**Pu LALRUATKIMA** : Pu Speaker, a chiang khawp mai a, a lawmawm a. Amaherawhchu, kan Assembly question chhanna hi official ten anrawn ruahman a ni a, khatianga helai hmuna kan minister zahawm tak te thu dik tawk lo an han hrilh ta mai kha a fel lo hlein ka hria a. Chuvangin kan MLA zahawm tak ten zawhna kan han siam hi thil hrechiang taka zawt vek kan ni a, a satu ngei pawh kha a lo ni si a. Assurance an han pe tak nain ka ngaihtuahna a kal thui khawp mai. Tun hnu zelah Department enkawltute leh official lam te pawhin fimkhur nan hengte hi kan hman a tul hle mai tih ka'n sawi belh duh zawk a ni e.

**SPEAKER** : Rawtna a nih chu, zawhna a ni lo. 11-naah kal ila, Pu Lalruatkima.

**Pu LALRUATKIMA** : Pu Speaker, ka lawm e. Urban Development & Poverty Alleviation Department Minister chhan atan :-

- a) Aizawl khawpui chhunga parking fee atangin kum 2011-2012, 2012-2013 leh 2013-2014 chhungin sorkarin sum engzat nge a hmuh ?
- b) Ch.Saprawnga Truck Terminal a parking fee atangin Kum 2011-2012, 2012-2013 leh 2013-2014 chhungin sorkarin sum engzat nge a hmuh tih ka zawt e.

**SPEAKER** : Urban Development & Poverty Alleviation Minister chhang turin sawm ila.

**Pu ZODINTLUANGA, MINISTER** : Pu Speaker, kan member zahawm tak Aizawl West-II bialtu zawhna chhanna chu –

- a) Aizawl khawpui chhung parking fee atanga sorkarin sum a hmuh zat chu hetiang hi a ni :-
  - i) 2011-2012 = ₹ 19,29,754.00

ii) 2012-2013	=	₹ 21,97,835.00
iii) 2013-2014	=	₹ 24,24,050.00
Total	=	<b>₹ 65,51,639.00</b>

Ch.Saprawnga Truck Terminal A.M.C. parking fee a hmuh dan chu hetiang hi a ni : Kum 2011-2012 ah nuai 13,42,350, kum 2012-2013 ah nuai 13,97,280, kum 2013-2014 ah nuai 12,37,120, hei hi February 2014 thleng kha a ni a. A vaiin nuai 39,76,750 a ni.

\* Speech not corrected.

**Pu LALRUATKIMA** : Pu Speaker, ka lawm e. Kan Aizawl khawpui chhunga parking fee khawn hi a enkawltu ber A.M.C te an ni a. Ka hriat sual loh chuan tuna kan figure-ah khan inmil lo lai a awm a, an sum hmuh tura an tarlan 2013-2014 chhung khan nuai 29,40,000 a ni a. Kum khatah kha ti zat lai mai hmuh a nih lai khan, ka ngaihtuahnaa awm chu; Millenium parking fee ah sawn kumtin tender an chhuah thin a, saw tah sawn kum khatah nuai 30 chuangin an chhang a ni. Aizawl khaw pumpui parking fee-ah erawh hi chuan kum khat ah nuai 30 pawh kan hmu tling lo hi eng nge a chhan ni ang aw tih ka ngaihtuah a. Chuvang chuan sawrkarin sum kan harsa a, additional resource mobilization chungchangte kan ngaihtuahnaah a awm a, ngaihtuahna nasa tak kan hman laiin, tun dinhmunah Millenium Centre parking fee khawn khawm zat pawh sawrkarin Aizawl khawpuihian parking fee-ah kan khawn khawm lo ni te pawhin a lang a. Chuvang chuan kan minister zahawm tak khan min lo enfiah sak a, helam kawngah hian a collector te hnenah tlawm te tein parking fee khawna tur tender hna thawh tur hi pek a ni a. Chumi avang chuan sawrkarin revenue a hmuh tur angte pawh a hmu lo niin a lang a ni.

Hemi chungchangah hian ka sawi belh duh chu, tun kum lokal turah pawh hian nuai 26 chauh mai sum hmuh tur A.M.C in a dah a, chuti a nih chuan kan thanna percentage kha a tlem hle mai a. Chuvang chuan parking fee chungchangah hian thil fello engemaw induhsakna party mi te, mahni chhungkhat lainate induhsakna a awm a ni mai awm mang e tih zawhna te pawh A.M.C Boards of Council meeting-ah te pawh a awm a. Chuta chhanna te pawh chu a nuihzatthlak viau a ni. Chuvangin hemi kawngah hian thahnemngai turin Aizawl khawpui chhunga parking fee kan collect-naah hian kan minister zahawm tak hian hma min lak sak thei lawm ni tih ka zawhbelhna a ni e. (Speaker : Rawtna a ni lo maw) rawtna bakah khan min enfiah sak turin ka ngen a ni.

**Pu ZODINTLUANGA, MINISTER** : Pu Speaker, Aizawl khawpui chhung parking fee hi kum 2011 leh 2012 thleng Transport Department-in an enkawl a, kum 2012-2013 atang khan Aizawl Municipal Council-in khawpui chhung hi an enkawl ve a. Kan hriat theuh angin, Aizawl Municipal Council hi autonomous body niin anmahniin ro an inrel ve a.



Parking fee chungchangah te pawh anmahniin tender te pawh an inchhuah ve a, sawrkarin an tender leh parking fee an khawnah hian a rate kan va bituk sak lova, anmahni chhungah an rorelna kutah kan dah a ni.

Tin, kan member zahawm takin a rawn sawi Millennium Centre saw kan hriat ah chuan mihausate dawrkai dawr tura sum tam tak leina tura va chawl tur te an nih avangin, Millennium Centre dawr enkawltute (Committee) sawn parking fee saw tam tak takin an charge thei a ni, reilote awm pawhin cheng tam tak kan chawi a ni. Chung avang chuan A.M.C te tana Millennium Centre rate a Aizawl khawpui chhung tih hi chu .... kei a mimal takin a rem pawh ka ring lo va. A chhan chu mi harsa te te te Aizawl-ah Scooter te, Bike te, Motor te an han park a, cheng nga, cheng sawm te an han lak pawh hian mi tam takin harsatna kan la tawk a ni.

Chungte avang chuan Aizawl Municipal Council-ah elected body an awm a, helai Aizawl khawpui chhung enkawl turin subject transfer-ah engemaw zat kan pe chhuak zel a. Heng lai hi chu anmahnin Pu Speaker, a inmil chhoh dan azir zelin a fee te pawh a tul angin an rawn tipung chho zel turah kan dah a ni e. Ka lawm e.

\* Speech not corrected.

**SPEAKER** : Awle, Pu S. Laldingliana, Starred Question 12-na zawt turin i sawm ang.

**Pu S. LALDINGLIANA** : Pu Speaker, a hmasain Starred Question 8-naah khan kir leh lawk ka duh a. Ka ban kha nasa takin ka lo phar ve a, mahse min hmu thei si lova. I remtihain ka bial chhung Tawipui 'S' ah sawn State Bank of India in engemaw chen Branch an siam (run) tawh a, amaherawhchu, kum thum kal ta khan an pawt kir a. Chu chu kan minister chhanna atang khan sorkar-in thar thawh leha hmalak a tum a nih chuan Tawipui 'S' ah hian Bank hi min dah sak leh tura hma min lak sak leh turin ka ngen leh hram duh a ni.

Pu Speaker, ka zawhna chu Minister zahawm tak Tourism Department enkawltu chhan atan New Lungrangah hian Tourist Lodge sak ve theih a ni ang em tih a ni e. Ka lawm e.

\* Speech not corrected.

**SPEAKER** : Tourism Minister i sawm ang.

**Pu JOHN ROTLUANGLIANA, MINISTER** : Pu Speaker, kan member zahawm tak Pu S. Laldingliana zawhna, a zawhbelhna lampang kha chu ka chhan turah ka ngai lova. Lungrangah hian Tourist Lodge sak ve theih a ni a. Amaherawhchu, tun dinhmunah Tourist Lodge sakna turin ruahmanna a awm rih lo tih a ni e.

**SPEAKER** : Zawhbelhna.

**Pu S. LALDINGLIANA** : Pu Speaker, Lungrang khua hi Chhungkhum leh Chawngte inkara awm a ni a. Helaiiah hian tun hmian PWD hian Rest House an lo nei thin a, mipuiin an chhawr tangkai khawp mai a. Amaherawhchu, sum harsat vang nge ka hre lova, kum engemaw zat kal ta atang khan enkawl zui tawh lovin building te pawh a tlu sawp tawh a. Tunah hian khawthlang lam kal tur tan Chawngte leh a thlang lam kal tur tan Chhungkhum atanga Chawngte inkarah hian riahna tur ang chi Bangla emaw, Rest House emaw hi pakhatmah a awm lova. Sorkar term hmasaah pawh khan kan minister zahawm tak khatih laia changtu hnenah khan kan ngen thin a, tum a ni a, mahse kan hlawhtling lova. Chuvangin tun termah hian kan minister zahawm tak hian khawngaih takin Lungrang-ah hian Tourist Lodge sak a nih theihna tur hma min lak sak turin kan ngen leh hram a ni. Ka lawm e.

\* Speech not corrected.

**SPEAKER** : Zawhbelhna em ni ? Awle, Pu R. Lalpianmawia.

**Pu R. L. PIANMAWIA** : Pu Speaker, ka zawhbelhna chu ka bial Darlawnah leh Sakawrdai-ah Tourist Lodge hawn mai theih tura sak zawh tawh, hawn nghakin a awm reng tawh mai a. Engtiknge min hawn sak theih ang ?

**SPEAKER** : Pu Sangkunga'n han zawt ve leh sela, tichuan a chhang dawn nia

**Pu T. SANGKUNGA** : Pu Speaker, ka lawm e. Kan hriat angin E. Tuipui constituency khi kan pi pute sulhnu leh thil hlui en tur awm chhun a ni mai a. Tunah chuan Upa Pawl an ni emaw, Zirlai an ni emaw, University leh College te pawh zirlaite an kal chhoh duh reng reng chuan India ram atanga mi pawimawh reng reng khilaiiah khian khel lovin an lut a ni a. Amaherawhchu, Khawbung leh Champhai inkarah khian Tourist Lodge a awm lova. Chu chu kawngpui tlangdunga

khang hmun pawimawh deuh han tlawh turte tan entirnan, Dungtlang te, Khuanglengah te khian Tourist Lodge awm se chuan a rem khawpin ka ring a.

Tin, chubakah Vanchhia-ah te, Lianpuiah te, Dungtlangah te khian mimal inah khatianga tlawhtu Bus-a a rual ruala kal te an insem darh ta a. Daikal in te a lo inanglo a, dik tak chuan, zingah mahni rooma attached bathroom nei deuh vek thin kha inah sawm rual te an han thlen hi chuan a buaithlak em em mai a. Chuvangin, khing laiah khian kan khualzin mi foreigner thlengin an lo kal tawh a ni a, khingah khian Kan Tourism Minister hian Tourist Lodge mikhualte tan min siam sak ta se, a dang a pawimawh kan han tih ai hi chuan khilai khi chu han en mai pawh hian a pawimawh a ni tih a hriat baw k a. Tourist Lodge pahnih khat te min sak sak thei angem tih ka zawt a ni.

\*Speech not Corrected.

**SPEAKER** : Minister chhang turin, aw, Pu Ngurdingliana i zawt law law dawn em ni ?

**Dr. NGURDINGLIANA** : Pu Speaker, ka lawm e. Kan member zahawm tak Pu S. Laldingliana rawn sawi Bank chungchangah khan kan Finance Minister khan min rawn chhang fiah a. Chuvangin ka rawn zawt lo ang a. Ka bialah pawh Sesawngah leh Phullenah kan bei mek a. Criteria hrang hrang a awm a, kha kha rawn fulfill kan tum a, kha kha a lawmawm ka ti a.

Tin, Tourism Minister zahawm tak Pu John Rotluangliana ka zawh duh chu – term hmasa a kan minister zahawm tak Pu Hiatoa'n ka bialah Vanzauah sorkar hmasa hmalaknain Tourist Centre pui tak mai min din sak a, lawmawm ka ti a. Mahse, kan hmang tangkai lo tlat mai a ni, tunah Khanpuiah pawh Tourist Lodge awm mai mai a awm a. Zawhna fiamthu deuhin ka rawn zawt a, a ngaihda/a tih dan ka hria a ni ka rawn tih kha. Tunah hian awm mai mai pahnih ka bial chhungah pawh hian a awm a. Khi khi khawngaih takin tangkai zawka zirlai, KTP Conference a ni emaw, YMA Group Conference a ni emaw, Vanzauah khian a khaw thenawm atang khian tlaiah hian nula tlangval an kal thin a. Khi khi Eco-Tourism a min leh sak hi khawngaih takin cheng vaibelchhe 400 chuang sen tawh- na sulhnu khi min ngaihpawimawh sak turin ka rawn ngen a ni e, ka lawm e.

\*Speech not Corrected.

**SPEAKER** : Ngenna te, zawhna te a ni a. Minister in chhang vek teh se.

**Pu JOHN ROTLUANGLIANA, MINISTER** : Pu Speaker, ka lawm e. A zawhna neitu member zahawm tak Pu S.Laldingliana rawn zawhbelhna kha. Ni e, Chhngkhumah te sawn an la sa tawh zawk a, engpawh nisela, sawti lamah sawn Tourist Lodge kan sa nasa em em a. Amaherawhchu, Lungrang hi a pawimawh hle a, Pu Dinga bial mai piah lamah Pu Nihara bial lampangte tan pawh. Chuvang chuan hei hi ngaihtuah hmasakah kan lo nei dawn nia tih kha ka chhanna nisela.

Tin, member zahawm tak Pu T.Sangkunga zawhna, khitalai Khawbung, Dungtlang, Khuanglengah emaw a tih kha, tunah hian central sorkarah rawtna kan thelut mek a, Dungtlangah khian a lo chhuah vele hma kan la thei ang. Tin, kan member zahawm tak Pu R.L.Pianmawia zawhna Sakawrdai leh Darlawn ami khi engtikah nge hawn theih a nih ang tih kha, kan hawng thei tawh a, engkim kan peih tawh a. Amaherawhchu, inthlan te puan a nih avangin kan hawng rih lo mai a ni, MP inthlan tihfel zawh hunah kan hawng dawn nia.

Tin, khiti lai Pu Ngurdingliana kan member zahawm takin a zawhna Vanzau a tih lai kha. Khitalai khi tunhma atanga lo tih kha a ni a, pawisa tam tak a kal tawh a. Kan beisei aiin khiti lai khi a lun lo lehngal a. Engpawh nisela, tunah pawh hian Tourism Ministry lam atangin sum engemaw zah tuilakna tur atan min rawn sanction a. Chu chu PHE lam leh electric lakna turin P&E Department lamah te ruahmanna an siam mek a. Chungte siam zawh a nih hunah chuan hei hi hei aia changtlung zawk hian enkawl chhoh kan tum mek a ni tih kha Pu Speaker, ka chhan theih a ni e, ka lawm e.

**SPEAKER** : Awle, a lawmawm e. Tunah zawhna 13-naah kal ila, a neitu Pu K.Sangthuama ilo sawm ang u.

**Pu K. SANGTHUAMA** : Pu Speaker, ka lawm e. Zawhna No.13-na Tanhril leh Mizoram University inrina hi Chiang zawkin Land Revenue & Settlement Department hian a survey thei angem tih ka zawt e.

**SPEAKER** : Aw, Minister in-charge sawm ila.

**Pu R. ROMAWIA, MINISTER** : Pu Speaker, Aizawl West-I bialtu member zahawm tak Pu K.Sangthuama zawhna chhanna chu hetiang hi a ni e – Mizoram University leh Tanhril inrina hi survey tawh, Land lease awm sa a ni a. Department- in complaint kan dawn hriat a ni lo va. Chiang lo te a awm a nih chuan survey chian chu a theih ang.

**SPEAKER** : Zawhbelhna.

**Pu K. SANGTHUAMA** : Pu Speaker, zawhbelhna ni chiah lovin rawtna tlem sawi ka duh a. Khutilai khu huan neia eizawng Tanhril leh a chhehvel khu an ni vek a. Heng ho hian tin 3000 hmun dawn lai ram an nei a, chu tih lai chuan an kalkawng leh engemawah khuan an paltlang thei lova. Nimahsela an huan khu tlak lam atanga kalin eizawng tam tak an awm a. Tin, University lamin an ram bak deuh khu chhuhsak leh tum awm deuh ten an sawi a. Engpawh nisela, kan minister zahawm tak kha ka ngen duh chu, khulai khu department in min enchian sak selangin, tunah rambuai han tih a inchuh luh luh chu a awm lo nain, an eizawna kawng te leh an ram ni chiah lo khu rin luh tumna a awm ni awmin an sawi a, chu chu khawngaih takin min lo enchian sak turin ka ngen duh a ni.

**SPEAKER** : Zawhna a ni lem lova chhan ngai lovah ngai ila 14-na Dr. K.Beichhua.

**Dr. K. BEICHHUA** : Pu Speaker, ka lawm e. Ka zawhna PWD Minister hnena ka zawhna chu hei hi a ni e :-

Kawlchaw leh Zero point inkar kawng hi siam tha tura hmalakna a awm em tih a ni.

\* Speech not Corrected.

**SPEAKER** : Awle, Chief Minister zahawm tak sawm ila.

**Pu LAL THANHAWLA, CHIEF MINISTER** : Pu Speaker, member zahawm tak zawhna chhanna chu, “Awm e” tih a ni.

**SPEAKER** : Zawhbelhna.

**Dr. K. BEICHHUA** : Pu Speaker, ka zawhbelhna chu helai kan kalkawng hi National Highway, kan economic growth a ni a. Saiha district tan hian helai kawng hi a chhiat chuan khawvel hmun dang nena kan inpawhna hi a chat deuh ti tih a ni a. Chuvangin khilaiah khian kawng min kum li vel a awm tawh a. Vanduaithlak takin nikum lam atang khan pakhat a bulah sawn a min belh leh a. Chu chu fur chhung hian engtiang zawnga hmalak pawhin siamthat ngaihna a awm lova, khi kawng tha lovina Saiha district mipuite harsatna min siam sak hi Pu Speaker, member zahawm takte pawh hian min hriat sak a thain ka hria a. Furah chuan kan ei in chakkhai lakna zawng zawng khitalai kawng a nih avang khian ei leh barah harsatna tam tak min siam sak thin a ni. Chu loah chhiatni that niah pawh hmun dang

atanga han inphurh ngaihna a awm lova, ke pawn kan kal thei si lova. Chutiang nikhuaah chuan ruang tak ngial pawh zawn thei lovin ruang te pawh a chhe hman hial thin a ni.

Chuvangin kan minister zahawm tak hian hei hi tun thal chhung hian, khilai khi kumli vel harsatna kan tawh tawh a ni a, furah chuan tihngaihna a awm si lova, chuvangin thal chhung hian khawngaih takin hma min lak sak thei angem tih kha ka zawhna a ni.

\* Speech not Corrected.

**SPEAKER** : A zawhna a rei deuh hlek a hun a tawp ta e, engtinng, nakinah chhanna kan beisei dawn nia, hei zawhna hun a tawp tlat.

Tunah chuan business dangah kan kai tawh ang a, Laying of papers :-

1. Annual Report for the year 2012-2013 of the Joint Electricity Regulatory Commission for the State of Manipur and Mizoram.
2. Joint Electricity Regulatory Commission for Manipur and Mizoram (Electricity Supply Code) Regulations, 2013 ( hereinafter referred to as “the code”)
3. Mizoram Information Commission (MIC)s Annual Report for - 2012-2013 ( 1<sup>st</sup> April, 2012 – 31<sup>st</sup> March, 2013 ) te hi House-ah kan Chief Minister zahawm tak lay turin ka’n sawm ang e.

**Pu LAL THANHAWLA, CHIEF MINISTER** : Pu Speaker, i phalna leh he House remtihpuinain heng Report pathumte :-

- 1) Annual Report, Joint Electricity Regulatory Commission, Manipur leh Mizoram-te Joint Report 2012 leh 2013,
- 2) Joint Electricity Regulatory Commission for Manipur and Mizoram (Electricity Supply Code ) Regulations, 2013, tun hnu zelah chuan sawi zawm anih chuan ‘code’ tih mai tawh tur leh
- 3) Mizoram Information Commission (MIC)s Annual Report for 2012-2013 (1<sup>st</sup> April, 2012 – 31<sup>st</sup> March, 2013) te hi he House zahawm takah ka rawn pharh e.

**SPEAKER** : A copy kha member-te hnenah pek nise. Tunah chuan Pu Lalsawta, minister zahawm tak paper pathum lay leh turin i sawm ang u.

**Pu LALSAWTA, MINISTER** : Pu Speaker Sir, Mizoram Governor zahawm tak recommend-na leh i phalna leh he House zahawm tak remtihna-in heng Finance documents pathum :-

- 1) Appropriation Accounts 2012-2013 Government of Mizoram.
- 2) Finance Accounts 2012-2013 Volume-I
- 3) Finance Accounts 2012-2013 Volume-II

te hi he House zahawm takah hian ka lay a, ka rawn chhawp chhuak a. Tin, documents dang pahnih :-

- 1) Notification relating to Money Circulation Scheme (Banning) (Mizoram) Rules, 2013
- 2) Statement of Six Monthly Review of the Finance Minister on the Fiscal Position of Mizoram for the Second Half of 2011-2012 and the First Half of 2012-2013 te hi he House zahawm takah hian ka rawn lay e.

**SPEAKER** : A copy kha member-te hnenah sem nise. A dawt leh chu 1<sup>st</sup> Report of Rules Committee, Rules Committee Report hmasa ber House ah ka rawn lay a. Hei hi tlema member zahawm takten min hriatpui tur chu Subject Committee lai kan nei a. Member kan tlem em avangin a member tur kan inhmuh zawh tak loh avangin 5 zinga 2 kha Rules Committee hian a paih a. Chumi Report chu a ni a, tunah a copy member-te hnenah sem ni se. Tunah chuan Pu John Siamkunga paper pahnih lay turin kan sawm a ni.

**Pu JOHN SIAMKUNGA** : Pu Speaker, vawiina ka report rawn present tur hi Sixth Legislative Assembly hun laia Committee on Subordinate Legislation-in an hna lo thawh tawh, an la thawh zawh hman si loh te kha tuna Seventh Legislative Assembly hnuaiia committee din, Committee on Subordinate Legislation hian kan hma chho ta a. Tichuan sitting wawi li neiin department hotute pawh koin heng Rules chi hrang hrang, department pahnih ami rules paruk lai hi kan han ennawn leh a ni a. Vawiinah Report kan han peih thei ta hi a lawmawm a. Tichuan Pu Speaker, i phalna leh he House zahawm tak remtihna-in heng rules chi hrang hrangte hi House-ah ka rawn report a. Chungte chu :-

- (1) Urban Development & Poverty Alleviation Department hnuaiia mi rules pahnih, pakhatna chu Mizoram Municipalities (Procedure and Conduct of Business) Rules, 2007 leh The Mizoram Grants-in-aid to Aizawl Municipal Council Rules, 2008 te an ni a.

Tin, chubakah chuan School Education Department hnuai ami rules chi hrang hrang kan ennawn leh kan siam that leh a then kan han paih te a awm a. Chungte chu :-

- (1) The Mizoram Education (Transfer and Posting of School Teachers) Rules, 2006.
- (2) The Mizoram Education (Grants-in-aid for General Maintenance of Private Schools) Rules, 2006
- (3) “The Mizoram Education (Establishment and Management of Private High Schools) Rules, 2006”
- (4) “The Mizoram Education (Establishment and Management of Private Higher Secondary Schools) Rules, 2006” relating to School Education Department te an ni. Ka lawm e.

\* Speech not Corrected.

**SPEAKER** : A copy kha member zahawm tak te hnenah sem ni se. Le, tunah chuan Motion of Thanks sawihonaah kan lut tawh ang a. Hei hi move tawh a ni a, sawiho theih tawh mai niin a lang a. Mi pakhatin minute 5 theuh sawi tum ta ila, kan duh tawk em ? (**PU LALSAWTA** : Pu Speaker, minute 10 tal ni thei se a va tha awm ve? Thusawi tur hi a tam ve si a, minute 5 ringawt hi chuan kan sawi zo hman lo deuh ang a, khawngaihin minute 10 ah ti ta ila, kan sawi zo hman tho ang chu maw?) Awle, minute 10 (sawm) tih a ni a, minute 10 (sawm) ah sawi zawh i tum ang u aw. Tunah discusion kan tan ang a, sawi duh chuan sawi tan rawh u le, moved tawh a nia,..... i move tawh a, a sawi ho theih tawh mai. Aw duh chuan a sawi hmasa thei tho va; mahse, a move tawh a, a moved tawh kha chuan sawiho theih tho. Mahse, a neitu a nia, han sawm leh ila,

**Pu R. ROMAWIA, MINISTER** : Pu Speaker, hmanniah kha chuan a Motion kha arawn thehlut a, kan lo phal a, chu chu, vawiinah hian kan sawi dawn a, a Motion khan enge a content? Eng ang taka lawmthu sawi tlakna nge tih kha House te minrawn hrilh ang a, a lo lawm viau tak tak te a nih chuan House-in kan lo lawmpui ve a, kan lo adopt mai tur niin a lang a, chuvangin a rawn thehluttu khan a lawmzia te kha rawn sawi selang kan va ti ve aw!

**SPEAKER** : Awle, awle, a tha e. A nih leh Motion neituin sawi hmasa ber sela.

**Pu T. SANGKUNGA** : Pu Speaker, ka lawm e. Kan Governor thusawi ropui tak mai lawmthu sawina Motion move tura min ruattu kan CLP hruaitute chungah lawmthu ka sawi a. Tin, ka bial mipui 25 East Tuipui bial amite, he House-a ding thei tura min dahtute chungah lawmthu ka sawi a. Tin, he House calm tak mai, India ram House dang te leh Parliament House ang lo taka member awm zawng zawngte leh



ruling leh opposition te kan ram hmasawna tur ngaihtuah a, uluk taka sawiho thin te hmaah kan Governor-in kan sorkar hmasawna hrang hrang leh a la tih tur thenkhat-te tela a han sawi hi sawi chakawm hlein ka hria a.

A hmasaberah chuan a thusawi point No. 1. 68<sup>th</sup> National Championship for Santosh Trophy-ah kan zu champion kha sawi loh theih loh niin ka hria a. Hei hi a bik takin keini inkhel thang tawhlo phei chuan mumangah pawh kan man phak loh a ni a, Vai rama inkhel hi ka en ve zeuh zeuh thin a, tlanah hian kan pha lo em em thin a, tun hma khan chawn te tak te ten ngal te tak te te an tlan khalh zung zung mai a.

Tin, Maradona lo chhuah hma phei kha chuan football hi palian, ft 6 chunglam khelh tur ni a ngaih a ni. Amaherawhchu kha ngaihdan kha Maradona khan a rawn thlak Chiang Khawp mai a. Pa te tak te pawhin football-ah hian hming a chher theih tih a rawn pho lang a. Chutiengin keini Maradona aia tawi te pawh kha an awm a hmanni khan, kha an tlan zung zung mai leh tlan thuah pawh hnam dang te aia an hniam ta reng reng lo, an tha zawk mah kha ropui ka ti a.

Hemi chungchangah hian kan House Leader leh Sports Minister hi fak lo thei kan ni lo. Tuna synthetic football ground engemawzah kan nei hi a chhan pakhat a ni tlat a ni. Keini hian kan pet khu rum rum mai a, grass chung a zuk khelh leh khan a buaithlak em em a ni. Russian team pawh an rawn kal a, grass a khel thang, Assam Rifle field khu rum rumah kan lo hneh der mai a ni, khatiang kha kan hmasawna a ni a sawi loh theih loh niin ka hria a.

Tin, a dawt lehah chuan Catch Them Young Policy kan sorkarin a tichhuak a, kan Sport Minister a bik takin kan House Leader nen an fakawm. Naupan tet atanga kan infiamna tur discipline kha kan luh chillh loh chuan a tih theih loh. Football bik te hi naupangin an tih loh chuan upat hnuah chuan an khawng deuh ur mai a ni. Chuvangin he Catch Them Young hian kan championship pawh hi a hril a. MFA te hma an sawn em em a, tun hma inkhelh dawn a zuk camp chauh thin kha tunah chuan thla 3 an camp avangin hei hian team work tha te, fitness te a siam a, an association te pawh fakawm ka ti.

A dawt lehah chuan Pu Speaker NLUP ka sawi duh a. Hei hi tunah hian chhungkaw 1,20,000 in an hmu tawh a, 15,000 min tihbelh leh dawn a; 1,20,000 in an hmu tawh a, 15,000 an hmu leh ang a avaiin 1,35,000 beneficiary kan nei dawn a, hei hi ropui ka ti a, ₹10,000 aia tam te beneficiary 1 in an dawng a. ₹ 1,00,000 dawng tur hian Pu Speaker, contract thawk ta ila, tha tam tak leh hun tam tak khawh ral a ₹ 5,00,000 man vel thawh hian ₹ 1,00,000 te hlep theih chauh a ni. Chhungkaw 1,35,000 vel hi contract 5,00,000 theuh kan pe ang a ni a, contract duh ram te kan ni a ropui ka ti a. Hemi hmanga miin theih tawh an

chhuah tak tak chuan changkanna a awm, hmun tam takah, saw lai Chhimtuipui kilah pawh sangha dil an han lai te tunhma ang a nilo, JCB in an lai hut hut mai a. WRC-ah pawh hmasawna a awmin ka hria.

Tin, a dang leh ah chuan saah hian kan harsa dawn a, PRRS natna a awm reng a, China economy a that avanga Burma bawng leh sial China rama a luh dawn kha chuan Pu Speaker, a move-tu chu an pe tam thinin ka hria a, a duh ang chin kha chu an sawi thinin ka hria a, ka sawi hnem deuh avangin khawngaih in i duhsakna ka dil a. Hemi motion hrang hrang hi sawifiah ka'n dil nghal che a, tunhmaa in tih tir thin ang khan.

Tichuan he NLUP hmang hian sial te, bawng talh chi te kan vulh hnem loh chuan khu lamah sakhaw dang biaten bawng rawn tih suan an haw tial tial a, Burma PRRS awm reng hi Burma vawk in neih chhung chu Delhi ah khan Ministry kan zuk kal khan a reh miah lo vang an ti a. Vety chanchinbuah te pawh an flash nasa hle a. Chuvangin kan economy NLUP avang leh thil dang dang avangin a lo thang nasa a, hei hi kan mamawhna a nasa dawn a, chuvangin hemi hnuai a sial leh zo bawng tam tak mai kan han vulh hi ropui ka ti a. Tin, chumiin a kaihhnawih RKVY bonus kan ti mai thin vbc 400 chuang zet mai kan dawng baw a. NLUP atanga central fund ringawt ACA ah vbc 1208.82 kan dawn bakah bonus vbc 400 chuang tunah hian kan dawng tawh a, hei hi sial leh bawng hungna tura Barbed wire lei nan te, tuizem siam nan te, terrace laih nan te Department-in an sem chhawng leh a hei ringawt pawh hi NLUP awm lo se Agriculture-a kan budget a pun dawn loh avangin hmu miah lo tur kan ni a. Kan Governor thusawiah lawmthu sawi tur tam tak NLUP hnuai a hian a awm a ni.

A dawt lehah chuan, Law and Order fel ta em em mai hi kan Governor thusawi palina kha fak tlak ka ti a. Hmeichhia leh naupangte zana thlamuang taka an len chhuah ngamna India ramah a vang em em a ni. Hetah hian kan Home Minister te, House Leader te, kan Police te an fakawm thlawt a ni. Kan Governor Speech point 4-na hi a lawmawm thlawt a ni.

Tin, point no. 5-ah hian agriculture product 15.02 % in a than phah hi a ropui ka ti. NLUP avangin hmun tam takah cultivation kan bansan a, chuti chung pawha WRC nasa taka kan deveavangin Agriculture hian hma a sawn a. A dik tak chuan chemical pawlh vai buhfai kan ei ang ringawt hi chu a hrisello ching pawh an tam duh a ni. Aizawl-a fa nei thei lo hi 'Champhai-ah han awm ula, Champhai buhfai ei ula in rai thei mai thei a ni ka ti a. Pahnih chu naupai in an lo haw a, an chawl leh vang vang a, 'han chho leh teh u' ka ti a, khatiangkhan keimahni buh thar chhuah hi kan ngeih em em mai a. Science-ah pawh kan zir a, vitamin te a tam a,

nau neih nan te a tha a ni. Presbyterian kohhran pawhin fa neih pun a ti nasa a, chuvangin agriculture-in buh an thar tam hi, supplies buh a tlemna chhan hi chu Silchar lamah a enkawltuten an hralh nasat vang a ni. Hengte hi tihtawp chhoh pheichuan kan thatna tur a tlingin ka hria a.

Tin, Referral Hospital leh Medical inkawp hi, ka rinphak bakin kan House Leader leh Health Minister te hi fakawm hlein ka hria. Health Department-ah hian kum 7 ka lo awm ve tawh a, a harsatzia ka hria a ni. Sawlai Referral Hospital kan siam dawn sawn Pu Speaker, Deputy Secretary, Health ka nih lai a ni a, Sub-Committee ah member secretary ah min dah a, khatih laia kan Chief Secretary Pu Fakzuala khan 'a hmun hi nang zawng rawh, compensation tel lova hmuh tum rawh' a ti a. 'Chhim lamah chiah a awm', ka ti a. Hualngohmun saw kan va zawng a, Presbyterian Biak In hmun thar an sak tawh avangin, 'a hlui kan pe ang che u a, Thlanmual ram te, YMA park zawng zawng te', an ti a, kan tinghet tep a. Sawlai area saw fak ka duh avanga chu chu sawi ka ni a. Falkawn te, Melriat te, Kelsih te sawn, 'in duh ang a lian hi man lovin, compensation tel lovin kan pe ang che u', an ti a. Amaherawhchu, Falkawn- ah hian an V/C te leh YMA hruaitute an fel em avangin, 'kan field te, Bazar hmun zawng zawngte kan pe vek ang che u', an ti a. A rem em avangin kan insawn ta a. Hmundanga compensation lem tam tak awm thin te kha an in ding lai te saw ₹ 30,000/- (singthum) lek lek pein hmun kilkhawr zawkah kan sawn sak a. Vawiinah hian Medical College leh Referral Hospital kan neihna tura thawk ropui, saw khua saw fak loh theih loh niin ka hria a, chuvangin anni ho khatih laia V/C Pu Vanhlira te, Pu Lalzamlova ten tuna kan Congress Col.Sangzuala bial ami Hminga te ho tan avanga sawlai hmun saw nei thei kan ni a, hei hi sawi tel loh theih loh niin ka hria a lawmthu sawinaah. He Medical College kan hmuhna hi Memorandum, chutihlaia Prime Minister Shri. H.D. Deve Gauda hnenah tuna kan House Leader ho nen, Council of Ministers hovin 23<sup>rd</sup> Oct, 1996 kuma an theh luh kha a ni a, a copy ka dil a, ka lo la kawl tha a, anni dil chhuah liau liau kha a ni a. Hetah hian Department te dil theuh tur rawn sawi rawh u an ti a, Health Department khan, 'Referral Hospital kan duh e, District Hospital ringawtah chuan phaiah kan in sengso hnem lutuk', an ti a, phekhnih lai kan ziaa. Khatihlai kan House Leader office a thawk a, Secretary Pu Goswami khan nalh em em mai leh tawi te te kan theh luh kha alo siam thin a, chutah chuan kan hmu nghal hlawl mai a ni. Amaherawhchu, a sanction-ah khan administrative approval kha a har khawp mai a, Dr. C. Silver-a khuta Union Minister of Health a nih khan min clear a, a clearance hi kan nei har khawp mai a. Chuvangin khatihlai daih a an lo ruahman kha a ni a. Amaherawhchu, pawisa a awm chiah a, sorkar alo inthlak ta a. A hospital sa ta lo khan a sak hma theih theih khami project in a tih theih building sak tih vel kha an han inchuh tak tak mai a, ka hnenah te khan 'a awm tawh em?' an ti a, an rawn lut chhen mai a ni. Khatiang khan quarter te an han sa tak

tak mai a, a Hospital a awm chuang si lova, darthlalang te a keh a, kan then chawk chawk mai a ni. Chuvangin a dintuin khatianga anga ti lova thahnem ngaihna kan neih thui dan alo inthlau khawpin ka hria a.

Pu Speaker, a tam si a ka'n dil belh hlek duh che a. Point a tam si a, kan Governor thusawi ropui tak mai, nidangah pawh khan an pe tam thin a nia, darkar khat te chu an pe dawn lawm ni te pawh min ti a, ka thiante pawhin (Speaker : Minute 5 chu ka pek belh mai ang che) a move-tu kan nia, minute 10 kha chuan a move-tu hi chu a cover ngai lo reng reng a, Pu Speaker, kha kha min hrethiam turin ka'n ngen duh che a.

Tin, a dawt lehah chuan heta an thehluh hi ropui ka ti, a hlawhtling vek mai a ni, chu chuan central sorkar neih kher loh pawhin heta kan Cabinet Minister rual fel tak kan siam chuan kan sorkarin a hmuh theih tih a hriat khawp mai a. Central leh helaia kan sorkar hi rilru te an ni lova, an fakawm em em mai a. Hemi tuma hemi chhunga awm Prime Minister kan lo dil chu rail kawng tuna lo chhuak chiah hi an dil a, an hmu tel a ni. Tin, Tuirial leh Tuivai khuah an dil a, an hmu tel, tuna kan sawi kan sawi hi 1996 a Memorandum a chuang vek kha a ni, helicopter tumna kan tih zawng zawng te hi heta an dil hi a ni.

Tin, BADP Bangladesh Border chauh a awm kha Burma Border-ah min pe ve rawh u an ti a alo chhuak bawka ni. Hetah hian a awm vek a ni, Health Care Scheme kan tih te pawh hi tah hian a awm vek. Tin, A.R sawn chhuah a Assam Rifle ground neih te hi an lo theh lut a. Chuvangin, tuna hmasawna kan sawi zawng zawng deuhthaw mai hi, kawngpui laih zawng zawng te, Sairang thlang rail kawng tih te, heta an dil hi reiloteah a rawn hlawhtling vek ringawt mai a ni. Chuvang a nia kan Referral Hospital pawh saw a lo chhuah. Chutianga bawka chuan Medical College-a tuna an han upgrade phei chu kan beih chhung zawng khan mihring ruang zai tur in ngah dawn em ni tih te, chi hrang hrang kha question an siam tam mai thin a. Tuna kan House Leader te an sorkar loh chhung phei kha chuan Roman Catholic te kan pe lek lek a ni, Falkawn ho phei kha chu thinrim lo phei selang chuan kan pek ka ring. Khum 400 tura kan ruahman te kha khum 50 in an han ti tlem mai a. Sawta kan Y.M.A hruaituin an zia mai a, Vahrit aiah Chepa tih article an zia mai a, chutah a minister concern an han pe a, Saitualah an sawn vang vang mai a. Chutah alo tantu deuh hruaitute chu Tualpuiah te a hran hranah khan an sawn darh vek mai a ni. Phunthia ang deuh hlek kha a nia, a tih thiam loh bakah khatianga a tira khum 400 lo ti tute kha chu an sawn zel mai a ni. Sorkar hnathawk hi Y.M.A hruaitu an lo tam mai a, chuvangin khati khawpa kum sawm chhunga hlawhchham chian, kohhrante kan pek lek lek, Medical College kan han nei mai tur phei hi chu he House chhung zawng zawng hian lawmthu sawi mai loh chu tih tur kan nei lovin ka hria a.

Tin, Education hnuaiah hian Pu Speaker, an building sak zozai hi chu sawi lohah lum ta ilar, Polytechnic paruk sak tur hi ropui ka ti. Planning Commission Vice Chairman hmana Airport a kan hmuh pheih kha chuan skill labour Mizoram a tlachham zia a sawi a, vai kan tih, in sa tu, kan tih zawng zawng, glaze tile phahtu kan tih zawng zawng, heng ho hi engatinge an lo pun, hnawhchhuah theih an nilo reng reng. Keimahnin skilled labour kan ngaha kan intodelh a ngai. UNO chuan India ram hian labour a ngah a, skilled labour a tlachham a ni. China chuan a pahnihin a ngah an ti a. Chuvangin India ram hian skilled labour kan neih theihna turin skill development kan thalaite tan nasa taka ruahman a ngai a, heta Polytechnic heti zozai mai kan han sa tur, kan han nei thar tur hi lawmawm ka ti a.

Tin, Power & Electricity hnuaia sawi loh theih loh chu Tuivai lui khuah tur hi a ni, he Tuivai megawatt 210 awmna hi Power Department-a Jt.Secretary ka nih lain nasa takin kan bei a, keimahin Chief Minister ka va hmu ringawt mai a ni. 'Ka pu, he ramin a mamawh chu he Tuivai megawatt 210 hi a ni, compensation chu Tuivai te, engkim Bairabi ka zuk en a, heng zawng zawng, serthlum hmun leh teak hmun a compensation a lei hi ngawpui vek a ni, ka pu, en teh', min lo ti a. Chuvangin 'compensation awm lo Chhimtuipui te, Tuivai te hi kan khuah chi a lo ni e. Ngopa bulah tlang chhengchhia a luan hual a ni ringawt mai a', ka va ti a, ka bei ngar ngar a, a hlawhchham a. Pu C. L Ruala kan House Leader hmasain a tih ang khan, 'I minister fel deuh hi Delhi ah camp tir chawt mai teh' ka va ti a, 'Awle, ka ti ang e,' a ti a, a ti ta si lova, um reng tu, khimi um chhuak tur chuan a ngai. India ramah an la neih ngai loh a ni tih ka hrechiang a. Khatihlai pheih chuan tuna kan Opposition Leader zahawm tak Pu Zawma MP lai kha a ni a, No Confidence Parliament a an move tum khan, Durtlang atangin 'Pu Zawm, ngawi teh, Tuivai .....hian i vote hi thleng mai teh a,' ka zuk ti a, a la hria emaw ka hre lo a. Chutiang khawpa innel kan ni a, hei hi ka lo vei ve a. Tuna hetiang India rama la awm ngai lo reng reng, kan Chief Minister zahawm takin a zuk sawi chhuak mai hi ropui ka ti a, khang a harsat zia hretu keini ang tan chuan lawmna hi a zual a ni. Chuvangin kan Governor-in hemi a rawn sawi chhuak hi ropui ka ti a, sawi loh theih niin ka hre lo a.

\* Speech not Corrected.

**SPEAKER** : Awle, i khaikhawm thei tawh e.

**Pu T. SANGKUNGA** : Aw, khaikhawm rualin Pu Speaker, Software Technology Park, Pu Ch.Chhunga bus terminal a kan nei tur hi Youth Commission atang chuan a lawmawm zual a ni. Kan local entrepreneur ten hetah hian eizawna thar tam tak an hmu chhuak dawn a. Tuna kan Governor thusawi point 14-naa lo lang hi ropui ka ti a, Call

Centre te, BPO te, Medical Transcription te, tam tak heta tang hian hna a in tan dawn, hei hi ropui ka ti lutuk a.

Kan IT Department a mithiam kan sawrkarin secretary a a han lalut thar te pawh hi a chhawr tangkai dan an thiam chho a ni awm mang e tiin kan Governor thu sawi atang khan ka lo hmu a.

Tin, ka khaikhawm pah thoin Pu Chairman, 'Green Mizoram' kan tih te hi ropui ka ti a. Chaknakyapuri-ah khuan mi hausa Dalmia, India ram mi hausa 10 chhiar zinga pakhatin, Chanakyapuri-a kan House ri chiah 85 hectares khu nungcha leh ramngaw atana a dah ringawt avang khuan in hmunah han Kg mai se, 85 hectares te chu a rapthlak dawn a ni. Mahse Delhi alo hrisel theih nan 'Lung of Delhi' an ti tawp a, a chhehvela municipal-in a ti tha nen, khulai ngaw khu khawvela Green City an tih zingah a tel phah a ni. Chuvangin hetia Green Mizoram te kan Governor thusawia a emphasized dan hi han sawi a chakawm hle na a, kan hmanloah ngai ta ila.

Tin, mirethei in 3661 kumkhat chhunga RD Department-in an sak te hi rura tak a ni, hetiang te hi a ropui takzet a.

Tin, Trade & Commerce te hi Pu Speaker, kan Zo hnahtlak unaute inzawmkhawm nan a tha lutuk. Kawng a chhiat chuan tumah an inpawh lo, Lianchhiari leh Chawngfianga te kha an khaw inkar khi 4 km lek a ni a, an tar dawn lamah an in hmu chauh a ni, kawng a chhiat avangin. Chuvangin hetiang a kawngpui tha kan laiha kan inpawh chuan, 'In unau ang u,' tih a ngailo, kan in ngai ngawih ngawih ang. In hmuh hi in ngaihna a ni, chuvangin hei hi kan Mizo inzawmkhawmnaah pawh hian a pawimawh em em a ni. Tourism hi changkangin intlawhpawh tha ta ila, indopui-II na kha a chhuah an ring lo. (SPEAKER : I hmang zo tawh em hun?) Ka zo tep Pu Speaker, ka lawm khawp mai.

Tin, Tourist Lodge te pawh 7(pasarih) kan han sa a, hmun tinah a awm a. Nichina ka sawi ang khan Khuangleng te, Vangchhia, Lianpui area zawng zawngah khian ala awm lova, kan minister sawi bakah khan khilai area te pawh khi an rawn cover zel turah kan ngai a, lawmawm ka ti a.

Tin, a tawp berah chuan Pu Speaker, PWD ropui ka ti. Ka bial panna Biate leh Tuipui inkarah ringawt khian hmanni khan 8 something crore central-in a rawn released tawp mai a, ropui ka ti a. Tin, Champhai atanga Khawbung black-top kum tin maia siam that nan crore 2 vel awm thin kha Dungtlang-ah km chanve vel an black-top tih loh chu ka bial khan an chhawr ngai reng reng lova, khawi tak black-top ang maw kan tih thin kha tun sorkarah

chuan an bei tak tak a. Khawbung atang te hian a rawn dum chho zur mai a, kan lawm khawp mai a. Chuvangin, hengah te hian an thawh that hmuntina kan ram neih hian a daihlo ang tih ka hlau a, an lai min nasa lutuk ang tih ka hlau a. Aizawl vel black-top nasat zia te, kan Governor thusawi No.20-na a pawimawh em em a ni.

Chutichuan, Pu Speaker, a point tin hi lawmna tur hlir a lo ni e tih hla sakna tham niin ka hria a. He lawmthu sawina motion pulut tur a min ruattu kan House Leader leh a thawhpuite chungah lawmthu ka sawi a, chung tawite chuan kan lawmthu sawina motion chu min pawmpui turin he House hi ka ngen a ni. Pu Speaker, ka lawm e.

\* Speech not Corrected.

**SPEAKER** : Khai le...midang... Dr.K. Beichhua.

**Dr. K. BEICHHUA** : Pu Speaker, ka lawm e. Kan Governor thusawi kha ka lo enchiang a, ka lo ngaithla a, ropui hlein ka hria a. A bik takin Sports lama kan hmalaknate fakawm ka ti a. Chutih rual rual chuan Saiha district han sawi leh ta ila, Saiha district hi tuna Sports minister chak takin a hmalakna hian min lo thleng pheii ve tawh se tih hi kan nghakhlel viau a ni. Artificial grass te kan duh ve hle a, kan awt ve hle a ni. Chumi rual chuan, a bik takin Medical College kan han nei mai tur te kha he sorkar hmalakna a fakawm ka ti a. Opposition nih vanga thil tha fak loh hi kan tih tur niin ka hre lova, he thilah hian kan hotute hmalakna fakawm ka ti a.

Chutih lai chuan thil pakhat 6-naah khan “ rice has always been given adequately at a subsidised rate to the people” tih a ni a. Hei hi kan district ah chuan tunah hian harsatna namen lo kan tawk a ni. A bik takin kan Speaker bialah hian bahra te tunah hian lai tawk an awm a, buhfai erawh hi chu kan district-ah chuan kan indaihlo viau tih he House zahawm takah hian ka sawi duh a.

7-naah khan “Hospitals are also being equipped with modern and sophisticated facilities and equipments to provide better health care” a ti a. Hospitals a ti a ni, Hospital a ti lova, Hospitals, kan hospital te tih a ni a. Helai hi tlem ka sawi duh a. Kan hospital Aizawl Civil Hospital chu a chhuanawm viauin ka hria a, kan hotute hmalakna zarah tunah hian Post Graduate zirlai pawh 9(pakua) lai kan nei a ni, kan state-ah hian a ropui ka ti a. Chutih rual chuan hmalak belhna tur hi ka ngaihtuah hian a awm nualin ka hria a. Sophisticated equipment-te facilities te nena equip thlap han tih tur chiah chu niin ka hre lova. State pumpuih hian Intensive Care Unit hi Aizawl Civil Hospital-ah hian kan neih awmchhun a ni a, khum 6 kan nei a ni. Khum 6 kan nei a, chung chu Nurse indaihloh avangin tunah hian khum 4 chauh run-in a awm a ni. State pumpui a ICU khum 6 chiah awm chu a tlem ka ti

deuh a, chutih rual chuan khum 6 pawh chu la run zo hlei thei lovin khum 4 tunah hian kan run mek a. Chuvang chuan, helai hi kan Health minister zahawm tak hian a dinhmun hi min enchian sak se tha hlein ka hria a.

Tin, Dental-ah hian khum 4 kan nei a, chu chu (Civil Hospital, Aizawl a ni) nurse indaihloh avangin run theihin a awm lova. Chulovah, Cardiology-ah hian khum 3 kan nei a. Mizoramin kan hriat tawh angin kan economic dinhmun te an sang chho a, hnathawk lova BP sang eng eng emaw neuh neuh thau tak tak te kan tam tawh a. Tunah chuan heart problem nei hi kan ngah tawh a, kan tam tawh lutuk a ni. Chuvang chuan, kan state ngaihtuah chuan Cardiology-a khum 3 chauh hi chu tlem ka ti deuh a. Engpawh nise, khum 10 tala hmalak nise kan minister zahawm tak hi hetah hi chuan han insang mar deuh se thil harsa a niin ka hre lova.

Chulovah chuan, Emergency Operation Theatre hi staff neih loh avanga Civil Hospital-ah hian neilo kan ni a, Emergency Operation Theatre hi Aizawl khawpui angah hi chuan kan mamawh hle a ni. Rikrum thil engemaw lo thleng ta se tuna kan dinhmunah hi chuan in manage ngaihna a awm lo. Chuvang chuan, helai hi kan minister zahawm tak hian hma min lak sak deuh se tih kha ka sawi duh bawk a.

Tin, tuna kan Civil Hospital Casualty dinhmun hi ka ngaihtuah nasa thin a, hmanni Disaster Management chungchang a han sawi te phei kha chuan rilru lian taka ka neih chu tunah hian lir han nghing ta se khawilaiah hian nge mock drill kan neih hi kan apply ang tih hi ka rilruah a awm a ni. A chhan chu kan casualty hi khum a tlem tham a, tunah hian theih chu nise Dawrpuin sawti lai medical complex ram an neih tak mai tur anga an sawi saw lak let theih te ni thei phei se chu saw saw la let ta ila, Medical College pawh lo nei ta tehreng pawh ni ila Aizawl district hian district hospital a mamawh dawn hrim hrim a. Chutah chuan Trauma Centre hi khum 50-100 tal kan siam loh chuan kan ramah hian chhiatrupna han thleng ta se kan buai hle dawn a ni. Chuvangin helai hi sum tam tak thil a ni lutuk lova, kan Health Minister zahawm tak hi han insangmar deuh hlek se chuan a lawmawm viauin ka ring a. Chutih rual chuan Aizawl piah lamah Lunglei Civil Hospital-ah sawn tunah I.C.U (Intensive Care Unit) kan nei miah lo a ni. Chu thil pawl zia chu tunah hian mi tam tak kan zaite hi hnimhluma han harh mai thei lo rei deuh hlek ngai ang chi te hi Intensive Care Unit-a ventilator nena tihnuna enkawl ngai tam tak an awm thin a ni. Chunggho chu a bik takin Lunglei Hospital-ah te sawn kan nei lo, district tin neih atan chuan kan la sawi ngam hrih lova, Civil Hospital Lungleiah tal saw chuan I.C.U. hi nei ve ta ila, C.T.Scan leh M.R.I.te pawh hi Civil Hospital Lungleiah sawn nei ve thei ta ila tih kha rawtna ka'n siam ve duh bawk a.



Chulovah chuan Saiha saw thlaler taka awm kan ni a, damloh nikhuuaa hmun hla pan saw keini tan a har lutuk a ni. Chuvang chuan tuna kan dinhmun ngaihtuah saw chuan mi thih lohna turah hian nasa takin kan thi in ka hria a, malaria te saw a tam nasa si a. Chuvangin dialysis khawl hi 'acute renal failure' kan ti a, Malaria vang te, khuai zuk avang te, rannung seh vang ringawt ang chi te, thil dang dang tam takah hian acute renal failure kan tih, kal han fail thut mai te a awm thin a ni. Chu chu dialysis hi chu awm se la chu kan in chhan zung zung thei ang a, chutiang a awm tak loh avangin, malaria ngawr ngawr vanga thihna ni lovin kal fail vang leh renal failure, a khawl han chhanna tur kan neih loh avang sawn mi tam takin nunna an chan tawh a ni, kan la chan mek a ni. Chuvang chuan, dialysis-tal hi Saiha Civil Hospital-ah min dah sak ve thei ta se.

Tin, I.C.U pawh khum tam kan sawi ngam lo, harsat deuh pawn khum hnih tal Civil Hospital Saihaah sawn min dah sak ta se chuan chhim atanga hmar lam a mipuiina kan pan bik deuh tur Hospital angte kha chu khatianga equipt ni ta se a va tha dawn em. Hei hi chuti lutuka finance involvement tam lutuk tur a ni lova. Chuvang chuan, kan Health Minister zahawm tak hi han insangmar deuh hlek se, helai hi min bawhzui sak se tih kha ka ngenna a ni a.

Tin, 8-naah khan en leh ta ila. Construction of New Polytechnic School are being completed at Champhai, Kolasib, Lawngtlai, Mamit, Saiha and Serchhip tih a ni a. Hei hi Saihaah chuan bul tan awm tur hi engmah kan la hmu lo a ni Polytechnic hi. Chutihruual chuan Polytechnic chu sawi loh, Saiha khi U.T. kan nih laia Government-a asset building zawng zawng khi a ngai ngaiin a la awm vek a. Tunah chuan Mizoram District 8 zingah hian Government asset building zawng zawng hi a chhe ber kan nihna hi sawm vel kan niin ka ring a ni. A pakhatnaah chuan D.C.Office chhe ber kan nei a, pahnihnaah chuan Civil Hospital chhe ber kan nei a, pathumnaah chuan College chhe ber, building chhe ber a ni a, palinaah chuan Government Higher Secondary leh High School building chhe lutuk mai, furah chuan thut hleih theih loh bang awng vek, chu loah playgraound chhe ber kan nei bawk a, District Jail chhe ber kan nei bawk a, S.P.chhe ber a ni bawk a, nausen thih tamna ber district a ni bawk a. Chutiang chuan Saiha hian a chhe ber nihna hi kan hauh tam lutuk a ni.

Chuvang chuan, he sawrkar chak tak hian khilai khi Polytechnic building awm tawh angah in lo ngai mai ang e, Polytechnic building hi tan a la ni lova, building dangte pawh khi a ram vek tawh a ni, U.T. hun lai ang kha a ni tih min lo hriatsak la, khawngaih taka he sorkar hian hma min laksak a, in khawngaihna nenin theihpatawp chhuah a sawlai saw min lo ensak turin ka ngen duh bawk a ni. Pu Speaker, ka lawm e.

\* Speech not Corrected.

**Er. LALRINAWMA** : Pu Speaker, ka lawm e. Nimin khan kan Governor zahawm tak khan (SPEAKER : Dar 1 thleng ania kan hun kha) thu a sawi a, thil tam tak a sawi a, lawmna tur tam tak te pawh a awm a. Chutih rual chuan, NLUP te pawh a rawn sawi leh a, ₹ 1,35,000/- hmachhawp a neih theih tur thu te a total-in ka rawn sawi duh a, a lawmawm hlein ka hria a. Sorkarin hetiang kut hnathawktute an khaichhuak leh zel mai laite pawh hi a lawmawm hlein ka hria. Chutih rual rual chuan NLUP chungchangah hian a sem hrim hrim lai a lawmawm rual rualin chu aia lawmawm lai zawk tur awmin ka hria a. A chhan chu a rahchhuah hi a hun tawhin ka hria a, chuti anih loh chuan 2011, 2013-2014 a kan annual plan kan en chuan kan annual plan out-lay-ah khan chiang takin department allied balance te ho pawisa kal dan kha a rawn tarlang vek a. Khatah khan an pawisa dawn zawng zawng a tlangpui thuah Agriculture tih te, Horticulture tih te, Soil & Water Conservation tih leh thil dang dang te khan an pawisa dawn zawng zawng 50% chunglam vel bawr kha NLUP atanga dawng vek an lo ni mai a. Chuti a nih chuan NLUP hi a hlawhchham thieng reng reng lo a ni tih ka'n sawi duh a. A hlawhchham a nih chuan khang allied department ho kha an hlawhchham ang a. Kum rei tak chung hnathawk mumal lohin an kal dawn tihna a ni. Chuvang chuan, helam pang kan hotuten hma an han la a, chak leh zual ila tih kha ka sawi duh bawk a.

Tin, kan ram kal zelna tur atan pawh hian Department chung lam pang ti mai ila, a ministry level a ni ber ang chu, tiangah hian inbiak tawna tha kan mamawh takmeuh meuhin ka hria. Kan hotu zahawm tak pawh hian min lo hriat sak se ka duh khawp mai a. A chhan chu han sawi ta ila, khi kan khaw lam Baktawng lamah khian furniture lampang hi kan ti nasa khawp mai a. Lalpa Kohhranho phei chu Mizoramah a ti hmasa ber berte kan ni a. MIP-ah te pawh Industry hnuaiah trade-ah an thlang a, khatiang khan a lawmpuina te, generator lian te pawh min rawn pe a, kan lawm em em a ni. A lawmna pawh siamin ruaite kan kil nghe nghe a nih kha. Tiang chuan ropui taka lawm a ni a. Chutih rual chuan a lawmna ruai, ha kara sati pawh kan kher thla hman lo tih vel bawrah Forest atangin, “workshop furniture te hi Forest Act hmangin thiat rawh u, Permit nei lo chu thiat rawh u,” min rawn ti leh si a. Tichuan, Forest Act-te kan han en a, khangah te khan Notified forest atanga 8 kms radius chhungah Furniture Workshop phal loh a ni, tih te a lo ni leh si a. Khatiang khan pakhatin min din tir a, pakhatin min thiahtir leh an tum a ni a, khangte kha a buaithlak khawpin ka hria. A ram leilung fate min ngaihtuah ula, kan duh bawk a ni.

Khilai chu sawi leh ta lawk ila, current hi kan mamawh em em mai a. tunah phei chuan current a awm hi chuan thil dang hi an ngaihtuah thei lo, chawlhnte pawh hian thawk duh rum rum khawpin chutiang chuan order a tam si a. Amaherawhchu current hi kan harsa em em si. Chumi rual chuan dispat-ah hianin current hi mega watt thum lai mai pek chhuah a lo ni leh nghal a, kan ram mamawh zawng zawng 4% hial a ei phak a ni a. Tihah

chuan a tual chhung neitupaten current kan mamawh ngawih ngawih laiin Industrial department-in Lengpui Industrial Park-a heti zat lai mai current hmang tura an lo theh chhuah si hi a that rualin keini current mamawh ngawih ngawih site hi chuan thiknate pawh a piang thei deuh rum rum hian ka hria. Tin, anni hian Industrial Policy 2013 leh North East Industrial Pollution Policy zawng zawng kha an enjoy vek bawk si a. Chuvangin, 30% subsidy an han hmu lehngal a, tiang chuan current tam tak khu lamah a lo kal a. Kein, chawlhni pawh sawi hlei thei lovin a ram leilung faten kan furniture workshop siamnaah chhungkaw 250-300 chuang eizawna khatiang karah khan kan tal buai ta thin a ni a. Tunlai phe chu an inhliam thei em em a, a chhan chu rem leh rem lovin hna an han thawk a, an bante an zaitirin chhiatte pawh kan tawk thei viau mai ni hian ka hria a, chungte pawh chu current kan neih that loh vang a ni a. Chuvang chuan feeder min pe thei ta ula, khi khua khi tih kha Power minister pawh khan min lo hriat sak se tihte pawh ka ngen nghal bawk a.

Education chungchang hi Education minister-in min lo hriat sak se tih hi ka sawi ve leh duh a. Bial kan han fang a, Zo khaw lamah, thingtlang lamah, Primary School zirtirtu hi kan harsa em em mai a. A thenah te phe chu zirtirtu Primary-ah Head chu sawi loh, pakhat contract-in an lo thawk a, a then skilled trainer angin an la a. School kha pahnihte khan an lo enkawl ve a. Chu mai piah lamah naupang an ennaah hian tuna TPR an tih mai hmang hian min lo tehkhawng a lo ni a. Hengte pawh hi kan ram tan chuan a tha lo awm mang e, tih ka ngaihtuah a ni. A chhan chu Primary-ah class 4 te an lo awm ve a, chu chu zirtirtu pakhaten an enkawl a, a changin zirtirtu pahnihten, chutiingin room lehlama an awm karah a then kha an lo inkhualtelem nge ni tih te kha ngaihtuah tham tak a ni a. Chuvang chuan education hi Primary/Elementary hi a bul ber a ni a, kei chuan kan sawp chau ni hian ka hria. Chingal thlawr bur ang deuh kan ni emaw ni chu aw ! ka ti a. Chuvangin, a bul tihthat hi a chanve zo kan ni tih lai kha, min han hriat sak selangin. Elementary lama kan tih fuh loh chuan a chung lamah kan buai tawlh tawlh dawn a ni.

Nimin lama lehkhabu min pek Mizoram Social Economic tih buah pawh khan a lo inziak kha, kan Primary school drop-out kha a lo tam tial tial mai a lo ni a. Khangte kha ngaihtuah chian lehzuat takmeuh meuh a ngaiin ka hria a. Zirtirtu Aizawl lamah hian an tam khawpin ka hria a.

Tuna lehkhabu pakhat an chhuah zirtirtute, school leh a list an tih chhuah kha in chhiar ang a, khawpui chhungah zirtirtu an tam lutukin ka hria, Zirtirtu 14 te school pakhatan an awm a, pasarih, sawm, pali, paruk khatiang kha an ni nuk mai a ni. Hengte hi hma min han lak sak selangin. A chhan chu zirna hi a bul thut tak tak, elementary a ni a. Khawngaihin kan Education Minister hian min lo hriat sak selangin, kan ram pum nghawng a ni a. Chuti anih loh chuan a bul ah Primary-ah tlem te an chho ang a

thiam mang lovin, ti khan thiam mang lo zelin kan human resources lam hi a nghawng lutuk ang tih te kha ka hlau va, chu chu ka sawi theih tawk a ni e, ka lawm e.

\* Speech not Corrected.

**SPEAKER** : Kan inthlak dawn a.

**DEPUTY SPEAKER** : Tu nge sawi leh dawn le, Pu K. Lalrinthanga.

**Pu K. LALRINTHANGA** : Pu Dy. Speaker, ka lawm e. Niminah khan Governor thusawi tha tak tak te Motion of Thanks rawn second-tu kha ka ni a, khatah khan second-tu kha min rawn ko ve sela chuan thain ka hria a. Vawiinah hian kan Governor thusawi tha tak tak te hi sawi tur tam tak awmin ka hria a, chutih rual chuan a second-tu ka nih avangin a hmasa lama rawn sawi ve pawh hi a tulin ka hria a ni.

Point 1-na leh 10-naah khan Sports chungchang kan Governor-in a rawn sawi a, chutah chuan kan Mizoram Football Team-ten hlawhtlinna lawmawm tak an nei a, lawmpuina thu he Assembly House, MLA-te rorelna hmuna an rawn sawi kha lawmawm ka ti a. Kan sport ngainatu te, Football Team-te hlawhtlinnaah hian kei pawhin lawmpuina sawi thain ka hria a, an chungah lawmawm ka ti tak zet zet a ni. Hengte hi kan Chief Minister zahawm tak kaihhruainain kan Sport Minister-in hma a lakna te Pathianin mal min sawm sak a, sport infrastructure tha tak tak min siam sakin chung atang chuan kan thalaite thilungah sport lama thahnem ngaihate, rilru peknate siam chhovin kan thalaite'n sport-ah hian eizawanna a awm a ni tih an hmu thar chho ta a. Chuta tang chuan infiamna lamah tih tak zet zet in hma an la a, an practice tha a, hlawhtlinna nasa tak an nei a ni tih hi a chiang a, churang chuan lawmthu hi sawi ngei ngei a tulin ka hria a ni.

Tin, Olympic Vision 2016 tan discipline 9-ah, point 10-naah khan kan thalaite an tel ve theihna turin intensive training hmalak a ni tih kan hmu a. Hengte hian kan thalaite tan hun kal leh turah hmasawna tha tak min siam sak dawn niin ka hria a, 2016-ah chuan khawvelah kan thalai tam zawk te khawvelin an hmuh theih ka ring a, chutiang te avang chuan kan sorkarin hma a laknaah hian lawmawm hlein ka hria. Sport tihmasawn nan infrastructure pakua zet tuna thawh mek (a mal malin kan sawi seng lo ang a,) point 10-naah khan a in ziak bawk a, heng atangte hian hmasawna duhawm tak a awm chho zel dawn niin ka hria a, lawmawm ka ti a ni.

Point no. 2-naah khan kan Governor zahawm takin ‘ka hun chhungin ka Sorkar hmasawmna leh remna leh muanna a tihhlawhtlin hian mi ti lawm em em a ni’ tiin a sawi a ni, ‘ka hun chhungin’ tih kha a sawi deuh kher a ni. Chu chu a ropui hlein ka hria a. Remna leh muanna tur atan kan sorkarin kan Chief Minister kaihhruainaah Home Minister-in hma a laknaah hian malsawmna kan dawng nasa hlein ka hria. Harsatna chi hrang hrang inrukbo te kan tawng thin a. Chung karah chuan kan police-te’n hma an han la a. A rubotute hriain an ruk bote pawh chhanchhuah an han ni ta zel mai hi a ropuiin Zoram mipuite tan hian a thlamuan thlak a, Zorama awm hi a thlamuan thlak hlein ka hria a. Hengte hi hmasawna ropui tak niin ka hria. Chuvangin lawm lo thei lo dinhmunah kan dingin ka hria a. Sorkar hnathawhah hian mipui zawng zawngte pawh hian lawmthu kan sawi ve te pawh hi thain ka hria a, He House hian lawmawm kan tiin ka ring a chungte chu ka han tarlang a ni.

NLUP chungchangah, point 3-naah khan chhungkua 120000 zet pek tur atan ruahmanna a awm a. Chu chu pek zawh vek tawh hnuah chhungkaw 15000 pek belh theih tur atan ruahman niin beneficiary tur te pawh thlan niin 1<sup>st</sup> instalment te pawh khaw thenkhat te chu pek a ni chho tih kan hria a. Chutiang a nih rual chuan ka sawi duh chu nichina ka hmaa thusawitu khan tihlawhtling theih tur a hma la tur khan sorkar kha a han phut niin ka hria a. Khalaiah kha chuan kan hriat atana tha chu sorkar chuan policy a siam a, mipui enkawlina tur atan policy siamin “kan sorkar chuan NLUP kan pe ang”, a ti a. Chutianga a tih ang tak chuan hma a la ta a. 120000 pek tur atan a ruahman kha sorkar chuan NLUP beneficiary te hnenah sum leh pai pawisa a pe a ni. Sorkar chuan a tih tur chu a ti a ni tih hi kan hriat chian thain ka hria a. A tihhlawhtlin thu lamah kha chuan a beneficiary-ten thahnemngai taka hna an thawh a, hlawhtling ngei tura hma an lak ve te pawh hi a tul a ni tih hi hriat a thain ka hria. Sorkar chuan mipuite tan a tih tur a ti, sum leh pai a zawn sak a, pek tur a pe a, a hnathawh lampang a kha mahni ta tur beneficiary hrang hrangten an thawh tur atana pek a ni a, chuvang chuan anmahni lampang khan an thawk ve tur a ni tih hi kan hriat a thain ka hria.

Tin, chutih rual chuan NLUP chungchangah Mizoram sorkar hnathawh a tha zawnga khawvelin a lo hre ve ta hi a ropuiin ka hria. Khawvel ram hrang hrangte pawhin an lo hre ve ta. Minnesota University of USA leh Food and Agriculture Organisation of U.N.O. ten Mizoram sorkar hnathawh zir tlakah ngaiin ruahmannate siamin rawn zir turin an rawn kal a ni tih kan hria a. Chuvang chuan Mizoram sorkarin hna an thawh hi khawvelin an lo hre ve ta. Hei hi a ropui tak zet zet a ni. Chuvang chuan he sorkar hna thawh hi a lawmawm a ni tih kan hriatin lawmthu kan sawi hi a thain ka hria a, chu chu ka’n tarlang a ni.

Point 5-naah khan buh chin chungchang a rawn tarlang leh a. Tah chuan hectre 14636 atangin 16835 ah a pung chho a, 15.02% in a rawn pung chho a ni. Mizoramah leilet neih te kan chak em em a. Leilet nei chhungkua chu kan awt a ni. Chutiang a nih avang chuan Mizoram sorkarin leilet kan neih zau theihna tur atan hma lain 15% zetin leilet siam theihna tur hmun a han tipung thei hi ropui ka ti a, a lawmawm tak zet zet a ni. Chutah chuan buh thar chhuah pawh metric ton 30572 atangin 34515 12.9% zetin a pun chhoh theih beisei a ni a, a ropui hle a ni.

Chutiangte a nih rual chuan a dang a rawn tarlang leh a, Jhum cultivation kha hectares 24307 atangin 5% zet in Jhum cultivation kha a tlahniam ta ni. Mizorama kan ngaihpawimawh ber chu kum tin lo kan vat a, ram a lo bua a, hnim a lo to chho leh ta a. Kum 5 vel a lo leng a, Lo kan han vat leh a, chu chuan ram a tibua a. Sik leh sa te a tidanglamin kan hria a. Chu chu kan ngaihpawimawh em em a ni. (Deputy Speaker : Warning a ni a, minute 2 ila nei) Deputy Speaker, hun min pek belh la ka lawm hle ang. Point 20 zet kha a ni a, a second tu kha ka ni a, ka hmaa sawi ang deuh khan hun ka rawn dil belh che a ni. Chutiang chuan sawrkarin hna a thawk a, chuvang chuan lawmawm ka ti a ka han tarlang a ni e.

Point no 8-naah khan Post Matric student Hostel tur Aizawl ah sak a lo ni a. Thingtlang atangin awmna tur nei lo, Aizawl a chhung leh khat nei lo, awmna tur nei lo leh belh tur nei lo an awm a. Chutiang awm theihna tur atan chuan Post Matric Hostel Aizawl-ah sak a lo ni a. MZP te hnena pek a ni kha lawmawm ka ti a. Harsatna tawktu tam tak ten malsawmna an dawnna tur kawngka a in hawng niin ka hria a, a lawmawm hle a ni. Tin, Polytechnic School Champhai-ah te, Kolosib-ah te, Lawngtlai-ah te, Mamit-ah te, Serchhip-ah te, Saiha-ah te sak belh a ni te hi kan zirlaite tan hmasawmna tur duhawm tak niin ka hria.

Point 9-naah khan Anganwadi chungchang a rawn sawi a, pucca building 1980 zet sak a ni a; tin, chu tih rual chuan additional Anganwadi Center 264 zet mai sanction kan han hmu leh te hi Zoram tan hmasawmna duhawm tak rawn thlenna niin ka hria.

Point 11- naah khan han kal leh ta ila. National Rural Drinking Water Programme-ah khan target 46 zet mai awmah 27 commission tawh a ni a. Khang atang khan mipuiten tui in tur thianghlim kan neih phah dawn niin a hriat a. Chu chu kan hmasawmna duhawm tak niin ka hria. Chubakah chuan '4<sup>th</sup> State Level Scheme Sanction Committee-in on-going 19 zet kan nei a, chubakah a thar 30 a rawn awm ta a, kha kha lawmawm hlein ka hria a. Chutah chuan pawisa pawh nuai 6449.17 zet ruahman a ni a. Helaiyah hian ka han sawi duh chu nikum tun ang hun Session ah khan Thingthelk khuain tui an mamawh nasat zia te ka sawi a. Tui an dawh lai thlalak te kan Speaker te, kan Chief Minister te leh PHE Minister

te kan pe a. Chuvang chuan hma min rawn lak sak a, hengah te pawh min rawn telh ve ta a, lawmawm ka ti tak zet zet a. Heta kan Governor thusawi hi Thingthelh khaw mipuite chuan han hre ve sela an mittui a tla thei hialin ka ring a, lawmawm ka ti tak zet zet a ni. Point 12-naah khan Tuivai HEP (Hydro Electric Power) tih kha kan hmu a, watt 210 zet mai siam theihna tur atan ruahmanna awm hi ropui ka ti a, (**Dy.Speaker** : Minute 5 deuhthawin i pel tawh a) ..point khat chiah ka'n sawi leh ang a, chuan ka duh tawh tawh mai dawn nia. Nichina kan hma a thusawitu khan Mizoram a current kan mamawh dan te, anmahni bial chhunga an mamawh dan te a rawn sawiin ka hria a. Chuta he House-a ka han tarlan duh chu Tuirial Hydrel Project sum duh avanga total bandh nei a, khatianga titawptute party a han zawm duh kha mak ka ti hle a ni. Mizoramin electric current kan mamawh tehlu nen, khang party a han zawm duh kha mak ka ti a. Electric current siam theitu, ngaipawimawhtu lampangah hian rawn kal zawk se a tha viauin ka ring a. Chu chu a tawp nan ka han sawi duh a ni e.

**Pu LALRUATKIMA** : Pu Deputy Speaker, hun min pek belh deuh hlek ka'n duh a, kan House-in rem a tih chuan. Kan Dan 17-na Sub-No. 4 ah khan Governor thusawi hi House-in a adopt hnuah Speaker-in a thawn let leh ang tih kha a ni a. Ka'n enchiang a, Governor-in session kan neih hmasak tuma a thusawi 13-naah khan thil pakhat figure dik lo a awm a. Kan House-a awm reng atan chuan a dik lo deuh hlekin ka hria a. Chu chu ka sawilang duh hmasa a.

Disaster Management chungchangah control and mitigation of landslide-in Ramhlun, Aizawl, Mizoram atan khan crore 555.55 tiin rawn tarlan a ni a. Chuan a DPR te kan la a, kan enchiang a, crore 21.06 chauh a lo ni leh si a. Chulaiah chuan sanction kan hmuh tawh kha crore 5.55 a ni a. Chumi chu figure-ah khan diklo a awm ta a, point chhut lohna turah khan an chhu niawm tak a ni. Official lam te pawh kan zawt chiang a, crore 555.55 kha chu a ni lo tih kha a lang ta a ni. Chuvang chuan, kan House record-a awm reng atan chuan Pu Deputy Speaker, diklo in ka hria a. Chu chu a siamthat dan tur kan dan kha kan en a, ka hmu mai bik si lova. Chuvangin, kan House-in rem a tih chuan kan Governor thusawi hmasa figure diklo kha tihdik dan a awm lawm ni tih ka han sawi hmasa a ni.

Tin, nimin lamah Pu Deputy Speaker, Governor zahawm tak thusawi kan ngaithla a, lawmthu in bul a rawn tan a. Chutah chuan a bik takin 68<sup>th</sup> National Football Championship for Santosh Trophy, Siliguri-a khelh zawh takah Mizoram kan champion hi a lawmawm hlein ka hria a. Kei ngei pawh Mizoram aiawhin football te state pawnah ka lo khel ve thin a, football-ah chuan State inelna sang ber a ni a. Chuvang chuan India ram pumpui champion kan lo ni thei hi a lawmawm a, champion

team te bakah MFA te, hemi kawnga thawktu zawng zawngte thahnemngaihna avang a ni tih hi ka hria a. Chuvangin, lawmpuina leh lawmthu ka rawn sawi tel nghal a ni. Tin, Mizote hian pianphung rengah sports lamah talent tha bik kan dawng a. India ram mai bakah khawvel pawh kan la dapchhuak ve ang tih hi ka beiseiin ka ring tlat a ni.

Tin, dan leh thupek chungchangah tan lak lehzual a tulin ka hria a. Kan inthlahdah mai chuan thil a fello thei a. Nikum lamah November ni 23 khan hel hovin Deep Mondala kha an rubo va. An zinga Mizo pahnih tel ve te kha chu an rawn chhuah tawh a. Vawiin thleng hian Deep Mondala hi ka hriatsual loh chuan heng helhote hian an la chhuah lo niin ka hria a, a paw hle a ni. Chuvang chuan, hemi kawngah hian tan kan lak lehzual a tulin ka hria, khua leh tuite kan him theihna turin.

Tin, tun hnaiah Aizawl khawpui lun lai hmun hnih lai maiah bomb a puak zui a. Chumi kawngah chuan thuneituten tan han la sauh sauh turin ka ngen duh a ni.

Tin, ei leh bara intodelh lo hnam chu hnam huaisen an awm ngai lo tiin kan hruaitu hmasaten an lo sawi thin a. Keini pawh agriculture lama kan hmalakna te a lawmawm a, tan lak lehzual erawh chu a tul a. Nimin lama kan Governor zahawm tak thusawiah khan tun hna maia buh thar chhuah a hlawk thu leh a pun thu a sawi kan hria a. Kum 2013 leh 2014 chhung khan WRC atangin metric ton 34514 thar chhuah a nih beisei thu leh 2012 leh 2013 chhung khan metric ton 30572 thar a nih thu kan hmu a. Chutih lai chuan statistical handbook-ah hian ka'n en chiang a, a data hi a lo inang lo khawp mai a. Metric ton 37502 a lo ni ta daih mai a, kan Statistical Data hi kan ring lo thei si lo va. Helaiyah hian official te hian tihsual an nei nge ni aw ka ti a, a paw ka ti khawp mai a. Khang ang kha hmanah kan lo thar daih tawh tihna a lo ni tihna a ni, hma kan sawn lo nge sorkar department data inmil lo zawk, thilmak tak a ni.

Tin, jhum cultivation-ah pawh khan hma kan sawn thu kha a rawn tarlang a. Hetah hian 2012-2013 chhung khan 24,307 hectare lo neih a nih laiin kum 2013-2014 ah khan lo tlahniamin 23,150 hectare a nih thu kan hmu a. A tlakhniamna percent kha 5.00% lai a ni a. Chutih lai chuan kan economic survey report nimin lama a bu kan dawn kha kan en leh a. Chutah chuan 2013-2014-ah khan 24,706 hectare a nih thu kan hmu leh si a. Chuan 2012-2013 chhunga tlangram lo neih zawng zawng record hi a danglamna kha hectare 399 zet mai a lo ni reng mai a. Chutiang chu a ni a, sorkar department data ve ve a danglam tlat mai hi eng nge ni ang aw ka ti a. Chubakah chuan kan Governor zahawm tak thusawi atanga a lan danin WRC a buh thar punna beisei zat kha 2.09 MT/Ha atangin 2.20 MT/Ha beisei a nih thu



kan hmu a. Amaherawhchu kan economic survey report atang hian kan en leh a, chutah chuan 2012 – 2013 khan 2.10 MT/Ha a lo ni leh daih bawk si a. Kumthar a buhthar chhuahna beisei zat pawh 2.30 a ni leh lawi bawk si a. Khatah khan data inmil lo kha kan hmu a, a pawl khawp mai a. Chuvang chuan helai data inmil lo hi kan official lam te, kan sorkar lamte pawhin inenlet nan kan hman thain ka hria a ni.

Tin, buh leh tuialhtheiah kan hnianghnar thu kan hmu a. Buhfai, diesel, petrol-ah harsatna kan tawk mek a, vawiinah hian petrol leh diesel-ah phei chuan harsatna namen lo kan tawk mek a ni. Tin Mizoram chhungah gas dealer tam tak kan pun thu kan hmu a, a lawmawm khawp mai a. Chutihlai erawh chuan gas erawh hi chu kan la harsa chhonzawm zel zawng a nih hi a, Pu Deputy Speaker.

Tin, kan Governor zahawm tak thusawiah khan tar pension ti mai ang, kha kha mi 25,251 in an dawn mek thu kan hmu a. Chutih lai chuan statistical Handbook-ah bawk hian kan en leh a. Kum 2011-2012 chhung khan mi 26,359 in tar pension hi an lo dawng tawh a, kum kalta nikum hmasa ai khan, kumina dawngtu kan tlakhniamna hi mi 1108 zet mai a ni a, pung awm zawk tak kan nih laiin. Chuvang chuan tar pension hi tihdikloh eng emaw lai chu a awm tih a lang a ni. Tin, nikum lamah khan tar pension kha kan la hlei thei lo va, thla ruk zet mai la lo te khan an awm a. Kuminah erawh chuan kan sorkar hian tan lain a hun takah tar pension pek tum sela a tha awm mange aw ka ti a ni.

Tin, Olympic Vision 2016 kan nei a, hma pawh kan han la viau a, a lawmawm a. Khawvel huap inelnaah kan thalaite a tam thei ang ber an tel theihna turin tan kan lak tlan a tul khawp mai a. Chutih lai erawh chuan world class equipments hi a materials hi kan chhawp tel a tul a. Ka hriatsual loh chuan Sport Council Vision leh Directorate Vision te kha a lo inanglo te an ti a. Chuvang chuan hengah te hian tan kan lak a tul a. Tin, kan Governor-in a sawi Multi Purpose Indoor Hall at Mualpui tih kha khawilaiah nge aw a awm ka ti a. Mualpui Multi Purpose Indoor Hall a ti bawk si a, khalai kha tihdikloh a ni mai thei a ni.

Tin, tui thianghlim hnianghnar zawk kan hmuh theih nan hma lak mek a nih thu kan hmu a. Chutih lai chuan helai House zahawm takah pawh an sawi thin Biate Water Supply Scheme erawh kha chu a lang ve ta lo va, engnge ni a awmzia ? a hlamzuih ta mai dawn nge ni ka ti a ni. Tin, hydel generation a power kan tharchhuah kha 29.75 mega watt a nih thu tarlan a ni a. Amaherawhchu statistical handbook-ah vek hian 29.35 mega watt a nih thu kha a sawi leh a. Chuti a nih chuan hei hi nikuma an tihchhuah a ni a, kum khat chhunga kan thanna hi 0.4 mega watt a ni a, hma kan sawn lo hle mai a, tan kan lak zel a tha a ni. Kan motion move-tu khan a move thiam bawk a, Tuivai Hydel Project kha ka hriatsual loh chuan Y.M.A khawmpuiah khan khuah loh nise ti khan an

rel a, Chairman kha a ni si a, thutna hmun a zirin ngaihdan te pawh a dang ta te pawh a ni mai thei a ni.

Tichuan, Pu Deputy Speaker, (Dy Speaker : Ngawi lawk rawh aw minutes 10 a la awm a, dar 1:00 P.M hian kan chawlh a ngai dawn a, mi pakhatin hun a la duh dawn si a ) Point khat chiah ka han sawi a nge, ni 100 inhlawhna kan kalpui mek a, a lawmawm hle mai a. Sawrkar kum tawp tepah hian ni 56 chhung inhlawhna kan siam sak thu kan hmu a. Mipui inhlawhna kan siam sak tawh hi a percent zawngin 56% chauh a ni a. Tin, Aizawl District-ah hian tun dinhmunah hian ni 49 inhlawhna kan siam tawh a ni. Tunhnai maiah ni 12 kan siam leh dawn a, chuti anih chuan ni 61 kan siam dawn tihna a ni a. Ni 39 zet mai kha inhlawhna kan siam thei dawn ta lo (Aizawl District bikah) niin a lang a. Hemi kawngah pawh hian department enkawltute, kan Minister zahawmtak leh kan sawrkar hian tan nasa lehzualin han la se a lawmawm hlein ka hria a. Pu Deputy Speaker, tawngkam hnih khat lekin ka han sawi ve a nih chu, ka lawm e.

**DEPUTY SPEAKER** : Tunah chuan Dr. Ngurdingliana kan sawm ang a, dar 1:00 P.M ah khian kan chawlh a ngai dawn tih hre chungin han sawi sela.

**Dr. NGURDINGLIANA** : Ka lawm e, Pu Deputy Speaker, kei chuan sawi tam ka tum lova. Kan Governor-in a thusawi , a point 2-na hian min tilawm a, a Mizo tawng a han chhiar chhuah hi ka thiam lutuk lova, a chiang khawp a ni. Heta a tawpa ‘a sentence had all level of governmen’ a tih a ‘efficiency responsiveness accountability fairness and just administration’ leh a tawpa a lawm zia ‘immense which speak me very happy and proud’ tih hi a dik chiah a ni. Kan House Leader kaihhruaina hnuaiah hian MLA te hi kan dik, kan hlep ru lo, hmangchang hriat kan tum a, kan in zir a. Chu chu a rawn sawi dik ka lawm lutuk a. Chuvangin Governor thusawi hi a ropui ka ti a, chu chu kan House Leader leh kan Chief Minister zahawmtakin a naute, a thawhpuite min fuihna a taka rawn tilangtu a ni.

Tin, hemi piah lamah department tin ka rawn khawih dawn lova, ka rawn khawih leh duh chu pakhatnaah, ka hmaa Aizawl West II bialtu MLA zahawmtakin a rawn sawi ang khan keini hi infiam mi kan ni a. Hmanniah pawh kan phulohin Pu Deputy Speaker, Aizawl Lammualah pawh kan team te lo hmuahnaah min din tir a, Santosh Trophy Mizoram team-a Captain hmasa ber te ka lo nih ve zarah kan thian thaten sawrkar hnenah kan aiawhin lawmthu rawn sawi rawh min ti a. Chu chu vawiinah nangmah kaltlangin House hnenah a mawhpurtu

zawng zawng, mi taima tak tak, association ang pawh, sports association ang pawn tam tak in awm, chu chu nangmah kaltlangin sorkar hnenah lawmthu sawi rawh an ti a, chu chu ka rawn din chhan ber pakhat a ni.

Tin, hemi piahlamah hian thil ka sawi leh duh chu sports chungchangah kha chuan a tam mai, an thawk nasa lutuk. Kar hmasa lawka article chanchinbu a ka hmuh kha kan sport department thang lutuk hi department dangte hi sports department ang hian thang ve se, sport department hi chu lo thu rih se tih ang deuh khan editorial a rawn chhuak a. A ngaihnam ka ti khawp mai a, kan hotute chungah lawmthu ka sawi mawlh mawlh a ni.

NLUP chungchangah chuan ka lut thuk lo ang a, a chhan chu kan hre sa vek, hei hi chu kan sorkarin kan no. one policy a ni. Law and order chung changah hian a bik takin keini Chalfilh te, Tuivawl te Rambo bial kan inti bik lova, amaherawhchu AK 47 bial kan ni a, hemi chungchangah kan Home Minister-in ngaihngam taka kan zin theihna tura ruahmanna min siam sak kawngah te, inthlanna kawngah te lawmthu ka sawi a. Tunah hian hel ho hian chet ngaihna an hre lova, rahbehin an awm a. Hemi kawngah hian kan sorkar chungah lawmthu ka sawi a.

Tin, Agriculture chungchangah kan hotute duhsaknain kei hi educationist ka ni a, mahse kan hotuten heta i awm a ngai an ti a, agriculture lamah ka'n kal thut mai a, ka inzir nasa khawp mai a. Kan hotuten a bik takin hmannah North East India hrang hrang atangin Oil Palm chungchang thu min rawn zawt a. Zoramah tuna kan hmalakna hi a lo turu em mai a, chu chu kar leh maiah hian rawn zin an tum lehngal a, Nagaland te, Aruanachal ten, Mizoram hi model-ah min rawn ngai a ni. Chumi kawngah chuan kan Agriculture department te in hmalaknaah lo tang lehzual rawh u, a lawmawm, state dangin min thlir, chu chu an lo kal dawn tih kha ka'n sawi duh a. Hei hi kan Governor-in a rawn sawi a lawmawm ka ti lutuk a.

Tin, department inphum ka ti mai a, Health Department hi in hmalakna a lawmawm a. Zoram dung leh vangah kan hriselna kawngah in tang nasa, public sub-centre te, clinic chungchangah te;, tin, hemi piahlamah engemaw nat thut te a lo awm thin a tun hnaiah. Hei Pu Dy. Speaker, ka sawi duh a, hmanni lawk khan kan Home Minister te nen kan zin tlang a, kan lo haw chu kan damlo sup sup mai a, rannung seh kha a lo ni reng mai a. Hemi chungchangah pawh Health department-in tunah te intirin, zokhuaah te thih thut thut, khawsik kawthalo tih hi a lo tam mai a. Khami va detect kha a lo har lutuk a, mahse tunah chuan kan tlankhalh tawh a. Tunah hian ka hriat sual loh chuan khawtinah Antidoxicilin hi Health department ten in dah tih kan hria a. Hei hi zokhaw lama mi tam tak nun channa a ni

a. Hetia in lo tlawhkhalth a hma in lo laknaah hian lawmthu pawh Health Department chungchangah kan sawiduh a.

Tin, kan Governor thusawi atangin PHE Department-ah ka'n lut leh duh a. Tui tha leh tui hriseh a hnam anga kan zo khua lam thlenga kan in theihna tura hma in lo lakna hi a lawmawm ka ti. A taka hmutu ka ni a. In inphochhuak ve vak lo, amaherawhchu, tunah hian ka bialah ringawt pawh khaw hrang hrangah 'tanky' tam tak, water distribution point te leh a neuh neuh min hlui hnem. Ka bial-ah chauh pawh ni lo, bial danga ka zin pawhin in hnathawh hi ka hmu a. Chumi avang chuan PHE Department chungah lawmthu ka'n sawi a.

Tin, PWD –ah pawh kan Governor-in a rawn sawi ang hian Zoram dung leh vangah nasa takin hma an la a, a lawmawm hle a. Keini pawh a taka malsawmna dawngtu kan ni. Term hmasa khan he House-ah hian kan Chief Minister zahawm tak zawhna zawtin duhsak takin ka bial, hnuchhawn ramah company pahnih vai company an inbun a. Hmanni-ah kan han zin chho va, a lawmawm hle a ni. (DY SPEAKER: minute hnih i la nei e.) Kan hmachhawpte hi tunah hian, kan Chief Minister zahawm tak leh Minister of State te chungah lawmthu ka sawi a.

Tin, Power chungchanga Tuivai Hydel Project kan sawiah khan, hei hi ka bial chhung ami a ni a. Kan member te leh kan Power Minister-in min lo hriat sak atana ka duh chu, kan intawm ve ve a ni. Lui hi khuah chuan a ding lam hi a nek na zawk a. 'meandering' an ti a. A nek na zawk ramah kan bial hi a awm a. Chuvangin, kan mamawh eng hi kan sorkarin min pe dawn. Nakumah Tuirial, a leh pekah Tuivai. Amaherawhchu, hemi kal chhovah hian ram a nekchhiat tur-te ngaihtuahin pheikhai rual taka kan kal hi ka duh a.

Tichuan, a tawp berah chuan 'Green Mizoram' kan tih helai kan rawn tarlan hi kan Forest Department te hmalakna hi lawmawm ka ti lutuk. Tun aia nasa zawka kan kal hi a pawimawh. Khawvel a kal zel a, global warming hi kan rin aiin a nasa dawn a, chumi tlawhkhalthna tura kan Forest Department-ten 'Green Mizoram Project' an nei hi tun aia nasa zawka kan kalpui hi tha ka ti a.

A tawp berah chuan kan Governor thu rawn sawiah khan, a point hnihna-ah khan let ila-kan hotupa, kan House Leader chawimawina-ah ka ngai a ni. Ka lawm e.

\* Speech not Corrected.

**SPEAKER** : Member parukin kan sawi hman a, kan chawhma hun a tawp a, kan chawl ang a, Dar 2 : 00 PM ah kan lut leh dawn nia.

2 : 00 P.M.

**SPEAKER** : Motion sawihona kan tan leh ang a, chawhma khan mi 6-in an sawi tawh a, tunah a 7-na tur ilo sawm leh ang, tunge, aw, tunge. Aw... sawi rawh le.

**Pu T.T. ZOTHANSANGA** : Pu Speaker ka lawm e, hei thuhma ka'n nei zawk duh a. Vawiinah kan Governor thusawiah hian, a rawn ziak tel ve chiah lo na a Champhai bikah khian in 44 sipai ram luah an awm a, compensation central-in a pek tur kha, vanneihthlak takin kan MP Pu C.L.Ruala'n a nawr chhuak a, an hmu mai tur hi ka lawm em a, vaibelchhe ruk chuang zet mai, thuhmaah ka'n sawi duh a. Kum sawm chhunga Chief Minister-in a lo nawr chuah theih loh kha tunah sem mai theih tura a han nawr chhuak hi lawmawm ka ti a. Kha kha a hmasain ka'n sawi duh a ni.

Pu Speaker, vawiinah hian, kan opposition hotute pawh kha a text-ah khan an lut chiang chiah lo bawk a. Mahni ha hawlh zawng tlem han sawi ve ka duh a.

Kan sawrkar kaltaah khan zawhna ka'n zawt a, chutah chuan kum 2008 hnu lama corruption case chungchang, Pu Ramhluna te, Pu Duhawma te, Pu Chatea te pawhin an zawt a, helaiah hian term hmasaa an zawhna te ka kawl vek a ni. Chulaia ka'n hmuh chhuah chhohnaah chuan Pu Speaker, kan sorkar hmasa khan a report-naah chuan sorkar hnathawk disciplinary proceeding kan draw a, khatianga hrem tawk te kha mi 32 zet mai an lo ni a. Tichuan dismiss kan tih te, remove te leh compulsory retirement te leh reduction to lower stage han tih ang chi kha an tam mai a ni. Tin, sorkarin anmahni a hrem avanga hmuh let tur ringawt pawh kha 2,29,00,000 chuang a lo ni a. Kha kha recover leh tura tih a ni a. Heta sorkarin a hrem kha mi 32 zet an ni a.

Tin, chubakah corruption case sorkarin a chhui zatah te khan a case hming leh a chhuitute, chargesheet tawh te kan han zawt leh kha a ni a. Chuta kan zawhnaah chuan ACB in case 24 leh CBI in case 2 a nei a, chuta mihring involve chu mihring 123 zet mai an ni a, mihring 123 ah khan mi 71 te kha official mi an ni. Hemi ka rawn sawi duhna chhan tak chu Pu Speaker, proceeding pangngai leh sorkarin corruption case a pek te kha mi 100 chuang zet mai kha an ni a. Ka'n sawi duhna chhan chu kum 10 chhung sorkar khan tih mumal alo nei hauh lo mai a, a lo hrem ngam mang lo tlat mai a. Sorkara a hel apiang mai kha an lawmzawng khan a tilungawi zel a, khami avang khan sorkar tha leh rintlak tun kan sorkarin a rawn siam leh tak khan harsatna kan han tawk a ni a. Hei Governor thusawiah khan "To witness my Government commitment to provide efficient, responsive accountable fair and just administration at all level of Governance" a rawn ti a. Khalai te kha ka rawn sawi duh chhan chu a ni a.

Kan sorkar kalta khan corruption kha kan haw khawp mai a, a zung nena phoro kan duh a ni. Nasa takin tan kan la a, tichuan sorkar hnathawkte pawh an eiruknaah tim miah lovin kan hrem zel mai a ni. Hemi avang hian mipui tam tak ngawi renga min lo thlirtu neutral kan tihte khan, “E khai, anni hian sual an haw takzet e, chuvangin an kovah hian rorelna pawh nghah leh chi a niang” tiin kan sorkar kha min han sorkar tir leh a ni a. Member 32 kha member 34 ah kan han awm ta daih mai a ni a. Corruption-a fihlim lo, sorkar hnathawkte hrem an han nih tak fo avang khan sorkar hnathawk corrupt, sorkar hrem tuar te leh sorkarin a la man chhuah si loh te khan Congres sorkar hi an hlau ve ngawih ngawih a ni. An hlau ngawih ngawih a, mualpho hlauvin an vote duh ta lova, i ti mai ang. An thiltih dik loh tam takte kha thup reng duhin leh hailan an hlauh avangin postal ballot ah te an lo tang ve a, chuvang chuan a tak takah chuan tunhmaa postal ballot tam apiang an tling a ni, an tih thin kha arawn paih ta dawrh mai a ni. Sorkar hnathawk 100 chuang dawrh mai Congress-in a han hrem leh a han ban ngam kha an hlau a ni. Pu Speaker, chubakah kum 10 sorkarnaah kha chuan official corrupt te khan politician te kha an thurualpui thei deuh zel a, kan sawi tawh thin angin hnungzang thak inhih tawn ang chi kha an ti thei deuh zel a ni. Eirukna kawngah thenkhatte tan chuan paradisa ni ringawt mai a, an thurualpui theih ang chi te kha an sorkar leh hun dingdihlipin an thlir a ni .

**Pu LALRUATKIMA** : Pu Speaker, tu te nge ni ang thurualpui a te chu a sawi thei ang em le aw, kan member zahawm tak khan le.

**Pu T.T. ZOTHANSANGA** : Kha kha chu helaiah kan sawi hman rih lovang a copy ka kawle. Tunhma chuan sorkar hnathawk thlekna lam apiang chak tura ngaihna kan nei thin a, sorkar postal ballot tamna piang kha kan lo chak thin a ni. Mipuite pawhin sorkar hnathawkte an tukhum che kan lo en thin a, amaherawhchu tunlai thangthar khawvel finnaah chuan sorkar hnathawkte kha a deciding factor ber an ni ta lo ve tih kha a lo ni ta a. A tam apiang tlinna ramah dan ang takin tu te pawhin kan pawm tlan dan angin khatiang khan kan han tling chho ta kha a ni a, kha kha postal ballot apiang te kha an chak tawhlo a ni tih kha ka'n sawi tel ve hram duh a ni.

Tin, Pu Speaker, helaiah hian arawn sawi a “the safety of the people is paramount in government’s priority” arawn ti a, he lai hi ka ngaipawimawh khawp mai a, hnam zalen tak mai kan ni a, kan thla hi a muang tur a ni.

Vanduaithlak takin kum 20 zet mai rambuaiah hnuh luhin kan awm a, hruiduk leh hriangpui hmun hnuaiah vangvat leh thosi karah um luh kan ni a, harsatna, retheihna te kha kan nunphung ang hrimin kan nei tawh a ni. Vanneihthlak takin kum 1986 ah remna leh muanna kan han nei a, tah chuan kan unauten sorkarna an han chang zui ta a, mahse

sorkar hnuah an phel a, 1989-ah kan han inthlang leh a, chutah chuan vanduaithlak takin an han tling ta lo hlah a, tahchuan Pi.Hlimpuii bawm khawvelah khan min han um lut ta a ni.

Tichuan High Court leh rigging tih te kha common takin Mizoramah hman a lo ni ta a. Kum 1998 ah kan han inthlang leh a, Congress kan han tla a, engmah sawi zui a awm lova. 2003 ah kan han inthlang leh a, tahchuan hel leh engemawni ti ti te awm mahsela inthlan zawhah MNF in sorkarna an han siam khan keini chu kan ngawi zui leh mai a.

Tichuan 2008 ah kan han inthlang chho leh a, chuta kan han inthlan chhohnaah chuan vanneihthlak takin sorkarna kan han chang ve leh ta a. Tahchuan rigging leh EVM mawhpurna kha a rawn lian leh ta a ni, mipuiin ro kan relna leh kan kutthlakna hi pawm thiamlo party kan awm ni hian ka hria a, hei hi a pawl khawpin ka hria a, mahni chaklohna pawm ngamlo party hi kan awm a ni lo maw ? tih kha ka ngaihtuahna ah a awm a ni.

Party pakhat hotuin a sawi angin kan hotu lawk zual pahnih pathum pension hunah chuan hetiangte hi chu a reh ve mai ang te an ti a. Tun tumah te chuan case nei te zingah ka tel lehngal a, mi 23 vel zet mai case nei kan han awm a, Pu. Robiaka kha case a nei ve dawn emaw kan ti a, amaherawhchu a khingpui pa khan case a file duh ta tlat lo mai a, a neilo hlah mai a, 23 in kan han nei a.

**SPEAKER** : I khaikhawm thei tawh e.

**Pu T.T. ZOTHANSANGA** : Aw, ka'n khaikhawm tan ang e. Mizoramah hian remna leh muanna kan duh a, tute emaw an sorkar a, harsatna siam sak hrim hrim party kan awm ang tih hi ka hlau khawp mai a. He kan ram hian kum 20 in mi hnungah kan kal tawh a, kum 20 mi hnunga kal tur hian mi te um pha turin chak takin kan tlan a ngai a. Chak taka kan tlanna turin sorkar felfai tha kan nei a, chu chu kan han kal dawn a, harsatna court case leh engemaw tih ang zawnga mipui rilru tihchiai tumna ang chi kha thalo ka ti a. Kum 20 lo tichiaitute khan sim tawh sela ka duh a ni. Chuvang chuan vawiinah hian a theih hram chuan insum theih hram hram se ka duh a ni.

Tin Pu Speaker, para 10-na kan en chuanin Champhaiah Chhangphut field tha tak min pe a, tunah hian kan sa zo tep tawh a, kan tizo tep tawh a, lawmthu ka sawi duh a.

Chumai bakah para 5-na kan en chuan Custom Hiring Center Champhaiah min rawn pe ve dawn a kan lawm tawp a ni. Custom Hiring Center kan han tih hi Power Tiller te, Tractor te kan sawrkar hmasak khan zali zanga chuang

kan sem tawh a ni. Lawi te, Bawng te kan nei tawh si lova, khatiang khan Agriculture lama kan hotu te leh kan Department te, Minister te hovin khatiang ngaihtuahna tha deuh an lo chhuak kha tha ka ti hle a, Tractor Power Tiller lei khawm an han pe ang a, nuai 24 man kha a duh duhin tlawm te a an hire-na tur kha a ni a, kha kha a tha ka ti khawp mai a, Governor-in hetiang a rawn sawi hi lawmawm ka ti a ni. Tin, Pu Speaker thil pakhat kan Lok Sabha M.P. Pu Ruala hian a nawr chhuak leh mek a, chu chu 7.5 crore vel a ni. Tunah hian a sum hmasa vbc 2.5 chu a rawn released tawh a, tichuan a dang zawng kha a rawn kal leh dawn a, tuna kan MP in, sawrkar hmasa pawhin an tih loh an nawr chhuak hrim hrim, Textile Ministry-ah an kal a, finance-ah an umzui a, tianga a lo chhuak ta mai pawh hi lawmawm ka ti a, hei hi chu thlan chhunzawm a tha mang e ka ti a ni. Vawiinah hian kan Governor thusawi hi a tha a, kan luh chilh thuk hman lova, tha tak tak vek mai a ni a, chu chu a move-tuin a rawn move thiam bawk a, lawm takin ka thlawp e.

**Pu LALTHANLIANA** : Pu Speaker ka lawm e. Lawmthu han sawi ve ka duh deuh a, a mover khan a sawi thiam a, ka ring mai dawn emaw ka ti a, ka hmin deuh vek mai a, kan zuk zin hova, a thusawi te kha ngaihnaawm ka ti sawt a.

A hmasa berin Mizoram Football team te 68th National Football Championship for Santosh Trophy-a an zuk Champ hi a lawmawm ka ti a, ka lawmpui em em a ni. Amaherawhchu lawman an dawn hi mite tawngkam ka hriat atang pawn ka duhaiin ava tlem deuh e aw ka ti a. Mizoram Football khel thiam, India ramin lawman a pek nuai 5 emaw ni, kha aia tam deuh kha chu lawman pawh kha dawng se a van tha em aw ka ti a, ka'n sawi chhuak duh a. Tin, players leh a changtu minister duhsakna ka hlan bawk a.

Tin, nichina MLA zahawm tak rawn sawi NLUP hi a tha khawp mai a. Amaherawhchu Sorkar policy hi chu chhe lutuk hi chu awmin ka hre thin lova. Beneficiaries-te rinawmna hi a pawimawh a tih kha kei pawh ka rilruah a awm thin a. Hei, nuai 1,35,000 in an dawng dawn a ni a, tha takin hmang se chuan changkanna a va ni dawn em tih kha ka sawi duh a. Chu chu beneficiaries-ten thahnemngai leh tangkai taka an hman theihnan ka'n sawilang bawk a, ka'n fuih duh a.

Tin LPG chungchang hi distributor hi an tam tulh tulh a, supply pawh a inprove dawn a ni tih Governor thusawi atangin kan hria a. Amaherawhchu, a tak tak ramah chuan a Cylinder hi a pun phah em? Distributor hi an pung mai chauh a ni em? kan tamna hi a reh chuang em? tih kha ka ngaihtuahnaah a awm deuh a. Kan harsa hle mai a, a lawmawm rual rualin helai hi chu a tak tak ram han chang se aw tih kha ka duh khawp mai, ka'n sawilang tel bawk a.



Tin helai point 9-na ami tar pension chungchang hi ka'n sawilang leh lawk anga. Tar pension hi tar ho hian an hlut khawp mai a, thlakhata ₹ 200/- te ₹ 500/- te hi pun hi a tha lawm ni aw ka ti a. Hei ai hian tam deuh se chuan ₹ 200/- hi chu tunlaih chuan a tlem ta khawp mai a. Tin, District Head Quarters te a awm ta zel a, anmahnin an pension hlauh te hi rawn la ta se, entirnan, sumo in rawn kal ta se, chaw ei man te, thingpui in man te a lo ngai ang a hawn man te nen, a tlem tham deuh tawh lo maw aw tunlai khawvelah ka ti a, pun theih chu nise a van tha awm e tih kha ka ngaihtuahnaah a awm deuh va, tih theih chu nise a lawmawm ngawtin ka ring.

Tin, Power chungchangah pawh hmasawna tur kawng a rawn in hawng zel a, a lawmawm khawp mai tih kha ka'n sawi duh a. Governor thusawi hmasaah khan lawmthu kha ka sawi a, ka sawina point chu nichin khan kan member zahawm tak mai Pu Lalruatkima khan a rawn sawi lang tawh a, tih- dik loh ni khan ka hria a, helai House-ah hian he ti zat zet mai pawisa a awm dawn a, a lawmawm hle mai a tiin lawmthu ka sawi a. Amaherawhchu, correction siam te emaw kha engmah sawi kha a awm leh tawh chuang si lova, chuvang chuan ka'n ngawi ta zawk mai a ni a. Vaibelchhe 555.55 te kha chu a tam hi ka ti em em a, chuvang chuan lawmthu kha nasa takin ka'n sawi kha a ni a. 'A dik ta love hei chu, alo tihsual a ni' tih kha a awm chuang ta si lova, a dik ni hmiang ka lo ti ngar ngar a, correction siamna leh kan lo ti sual a ni tih kha a awm chuan si loh avangin dik niah ka ngai ta mai a, mahse kha nichin khan sawi chhuah kha a rawn awm leh ta mai a, kha kha chu a dik lo a nih kha chuan correction siam loh chu record a awm reng tur atan chuan a tha lo khawp mai a, chu chu ka'n sawi lang leh a nih chu. Ka lawm e.

\*Speech not corrected.

**SPEAKER** : A lawmawm e, hun a hmang zo lova a vanneih thlak hle a. Sawi leh tur dang kan awm em? Pu Sangthuama han sawi leh sela.

**Pu K. SANGTHUAMA** : Pu Speaker, vawiinah hian kan Governor thusawiah lawmthu sawina tur tam tak a awm thei a, amaherawhchu, kan sawi seng vek lo ang a. Chutih rualin a lawmthu lo lam deuhah te pawh duh thawhna te pawh a kal thei bawk ang a. Kan Governor hian point 20 lai a rawn sawi a, a hmasaa ka'n sawi duh chu sports lamah hian hmasawna nasa tak kan nei hi a lawmawm ka ti a. Kan sorkar leh a minister changtu leh kan Chief Minister zahawm tak theih tawp chhuahna a ni lehzualin ka'n hria a, thalaite tan hmasawna ropui tak sports lama kan thleng chho ta hi lawmawm ka ti a.

Chuvangin vawiinah hian remchang-a la a, a lawmawm zia han sawi chhuah ve hi thain ka hria a. Kan ramin hmasawna ke a pennaah hian rualkhai taka kan zavaia tan

kan lak phawt chuan tun aia hmasawna hi a awm chho thei zel ang tih rinna lian tak ka nei . Chuvangin vawin pawh hian la thalai deuh zek zawk Sports Minister-ah kan han nei a, theihtawp chhuah chho zel se tun aia thleng sang tur hian. Mizoram mai ni lovin, India ram mai niloin khawvelah pawh lang pha turin Mizote hi kan te chuang bik lo a ni tih rilruah kan Sports Minister pawhin vawng tlat selang, kan Chief Minister pawh hian theihtawp chhuah sela, tun Olympic-ah te pawh Mizote kan lan theihna kawng te pawh a awm dah lawm maw tih rilru ngaihtuahna ka'n nei ve a, chuvangin helaiah hian lawmthu han sawi ka duh a.

Chumi loah chuan Health lamah hian lawmthu sawi ka duh a.8 Medical College te pawh kan Health Minister te leh kan Chief Minister ten theihtawp an chhuahna avangin kan nei dawn niin ka hria a, a lawmawm dawn hlein ka hria a. Hengah te pawh hian theihtawp chhuah chho sela, kan ramin hriselna kan mamawh a, tun aia damdawi in changtlung zawk te leh inenkawl na tha zawk te kan mamawh tih hre rengin theihtawp han chhuah sela, tun term-ah hian kan thlen tur ang pawh thui tak kan thlen theih ka ring a. Hengah te hian lawmthu sawi ka'n duh a. A point te te chuan lawmthu kan sawi seng lovang a, hmasawna tam tak kan nei a lawmthu sawina tur pawh tam tak awmin ka hria a. Tunah hian kum 10-na term kan hmang mek a, term hmasa kum nga chhung khan kan sorkar khan engkim felfai vekin ro a rel bik lova, mahse a tlangpui thuin mipui pawn tha thawkhat an ti a ni ang e, tunah pawh sorkarna kan han pe leh a, chulai karah erawh chuan tan lakna tur tam tak hi a la awm a, tan lak pawh a pawimawh hle a ni.

Agriculture lamah hian hmasawna eng eng emaw an rawn sawi a. Amaherawhchu helaia Agriculture lama hmasawna an rawn sawi chhohah hian, buh leh balah hmasawna eng emaw chen an rawn ziaak chho a. Nimahsela kan ram ei leh bar intodelhna tur hian hei aia tan lak hi la ngaiin ka hria a. Lei leh theih tur zawng zawng hi leh fai vek a, a chin theihna tur zawng zawngah hian chin vek ni sela chu kan ram intodelh theihna tur khawp hial kan ramah hian ram zawl tha a siam theihin ka hria a. Chhim lamah Chamdur-ah kan sorkar hian hma nasa takin la sela, chuan ei leh bara kan intodelhna hi chu thlen theih mai awm ni chuan a langin ka hria a. Buhfai ber hi kan neih loh va, phai lam atanga kan lak zel chuan harsatna hi kan tawk kumkhua dawn a. Buhfai a to tulh tulh a, tunah pawh subsidy in central sorkar atangin min pe a, heti laiah keinin kan neih ang angin kan ti bawk a, pawisa tam tak subsidy-in central sorkar hian Mizoram hi min chawm a ni a, Chuvangin buh hi kan dam chhung hian kan ei dawn niin a lang a. Helaiah hian theihtawp tak meuh chhuah sela thain ka ring a. He laia hmasawna a rawn sawi hi a lawmawm rual rual hian a bei tham deuhin ka hria a, sorkar hian theihtawp tak meuh meuh chhuah chho turin ka ngen ve leh duh bawk a ni.

Tin, buhfai chungchangah te hian, tha tawk deuh hlek anga a sawi hi chu a la tha tawk lo tih erawh hi chu kan Chiang ang a, churang chuan hma lakna tur hi a la tam hle a ni tih hi wawinah hian hre ta ila.

Tin, ei leh bar chungchang bakah hian Food & Civil Supply lamah hian LPG te pawh an sawi tawh a,  $25+25=50$  tuna tih mek tur nen distributor hi kan han neih belh chho a ni a. Nichina an han sawi tawh ang khan gas-ah hian kan sorkar hian tan la deuh se tih hi ka ngen duh a. Kumin chhung hian vawi hnih emaw chiah gas kan la la mai a, a buaithlak hle a ni. Churangin theihtawp chhuah sela, tang tlang ila, opposition-te pawhin theihtawp kan rawn chhuah ve ang a, tan lak hi chu sawt deuh hian ka hre thin a, gas chungchangahte pawh hian. Chutih rualin, a bur an pump chhuah hi a tam em em mai a. Trip khatah hian bur 305 a awm a, bur 305 a awm lai hian bur 50 te an lo pump chhuak thin a, a lo tlem chuan kan hmang rei lova, ni 8(riat), ni 10(sawm) chauhte kan lo hmang a, a inkahpukchaw chho zel a, harsatna hi kan tawk thin ni mai hian ka hria a. He lai pawh hi kan Supply Department hian enkawl lehzuah sela, tun hma aia tha zawka kan ram mipuite hian gas kan hmuh theihna turin kan Supply minister pawh ka chahin ka ngen duh nghal bawk a, kan harsatna hi chuti lutukin a kiangin a lang lo a ni.

Tin, buhfai chungchangah pawh hian, buhfai hi Mizoram hian harsatna tam tak tun hma atangin kan tawk a, a chang erawh chuan harsa mang lote pawh kan awm thei a. Buhfai 2kg chauh hi chu puitling tan hi chuan a ho angrengh khawp a. Thla khatah vawi hnih 2kg, 4 kg puitlingin kan dawng a ni a. Hei pawh hi kan sorkar hian a titam deuh hret thei tawh lawm ni ka ti a. Thingtlangah phei chuan Kg 4 puitling pakhatin han dawn chu a tlem deuh hlek lehzuah a. Heng pawh hi a theih hram chuan thingtlang hna thawk mite tan hian kg 2 ni lovin kg 3 tala tih loh chuan harsatna tam tak an tawk thin a. Hei pawh hi kan sorkar hian ngun takin en se la. Khawpuiah erawh hi chuan kan tla chiah lo na a, leitur hi a awm thin a, kan ti thei mai a. Amaherawhchu thingtlangah chuan thla 1 ah vawi 4 te a sem theih bawk si lova, vawi 2 te, a changin vawi 3 sem te a ni a. Aizawlah phei chuan thla 1 ah vawi 2 hi sem a ni ber a. chuti chung chuan kg 4 hi kan nei a ni mai a. Churangin ei leh bar chungchangah hian kan sorkarin nasa taka tan a lak hi wawinah hian ka han ngen duh bawk a ni.

Pakhat lehah chuan kawng hi duh thu a sam thei lova. Wawinah chang ni lovin tunhma atangin kawngah hian harsatna kan tawk a. A dik chiah chuan, ministry hmasaah te pawh thui tak harsatna pawh a awm tho a. Wawinah pawh kawngah harsatna tam tak kan tawk a, a tha tawk lo em em a, Aizawlah phei chuan tlak lampang hi kawng a chhe lehzuah a, P.W.D. Minister zahawm tak khan min lo hriat sak deuh se kan duh a. Tlak lam hi kan kawng hi a chhe em em a, chhuah lamah hi chuan a ziaawm deuh hlek a, a pawm theih deuh hlek a. Ka bialah khu chuan khaw chhung kawngte phei hi chu a harsa lutuk a, a chhe

em em mai a. Tun thal chhung hian kan P.W.D. Minister zahawm tak pawh hian min en deuh hlek se, en bik nihna lamah chuan kan pawiti lo, kha lamah khan min rawn en bik deuh hlek turin ka ngen deuh a, kan kawng khu a chhe em em mai a. Black top theih lai lai leh tlema han siam that theih deuh lai turte chu fur hma hian theihtawp min chhuah sak phawt turin kan P.W.D. minister hi a bik takin ka ngen duh a ni.

Tin, chulo lehah chuan rail kawng chungchang hi kum nga chhung khan a thleng ang tih a ni a, kan tan mai dawn emaw kan ti a, 2008-2009 vela pawisa hi sanction tawh a ni a, kum nga chhungin kan la tan thei lo hi hma lak a ngai hlein ka hria a. Chuvangin hetah hian kan Chief Minister pawh tang deuh hlek se tih ka ngen duh a. Khulaiah khuan a lo thlen theih chuan buhfai engkim harsa lovin a phurhna leh kawngah pawh kan awm thei dawn a. Chuvangin enge a harsatna aw ka ti a, kum nga a ral leh tawh a, rail kawng chungchangah sanction hi 2008-2009 a hmuh tawh a ni a, helaiah hian theihtawp lo chhuah turin ka chah duh a ni.

Tin, pakhat lehah chuan mi tam takin harsatna kan tawh phah motor chungchanga life time tax-ah hian kum 15 (sawmpanga) pek lawk ngai hi ennawn a tha lawm ni chu aw! Kum 15 hi kan motor hi a dam mang si lova, a tlangpuiin kum 10 (sawm) han thleng thei hi chu a awm zeuh zeuh a, kum 15 atana tih hi alternative dang deuh hlek siam theih a ni lawm ni chu aw ka ti a, hei hi ngaihtuah that leh theih chu nise a tha khawpin kan ring a.

Tin, High Security Registration Plate chungchang pawh hi tunah hian tih mek a ni a, harsatna tam tak kan tawk. An ti mum mum a, tha tam tak an seng a, a tih hleih theih si loh va, a tih theih leh lohva, an kal a, an lo haw leh a, hetiang reng reng hi kan kalphung a ni a.

Tin, pakhat lehah chuan Revenue lamina Tax an khawn hi tunah sawn an buai em em a, nilengin an nghak a, hun a awm thei si lova, hmun a awm thei bawk si lova, hei hi kan minister-ten khawngaihin ngaihtuahna thar lo hmang ula. Veng tinah hian emaw lo kal mai sela, awlsam deuhin kan pe zung zung mai ang a. Office-ah sawn an inhawr lut lut mai a, a tih tak tak theih si lova, chumi chu, Pu Speaker, minute khat chauh. Chu chu khawngaih takin tunah pawh hian ngenna tam tak kan hmu a rawn sawi ula, engpawh nise, kan sawrkarin ngaihtuah sela, Office-ah mipuiin min chim a, nikhat, ni li, ni nga pawh in nghaha pek hleih theih si loh, motor man, taxi man, tam tak chawia ni tam tak kal ai chuan, veng tinah hian rawn kaltir mai se, tichuan tax chu tha takin kan pe zung zung mai ang an ti a. Chu chu a theih hram chuan kan Minister-ten ngaihtuahna lo hmang turin ka ngen nghal bawk che u a ni, ka lawm e.

**SPEAKER** : A changtu Minister

**Pu R. LALZIRLIANA, MINISTER** : Kan MLA-te thusawi kha han clarify lawk a ngai a. Chumi hmam kan Opposition lam atanga kan MLA-te hi first timer an ni deuh vek a, pakhat chauh hi helai House-a lo thu tawh thin a ni a. Chuti chungin mi puitling tak tak an ni a, thiamna lamah te, kum lamah te pawh mi puitling an ni tih vawiina Governor thusawi kan sawihonaah hian a lang chiang hlein ka hria. Nichina an han sawi ang khan thil tha a nih chuan ruling party tih a ni emaw tu tih pawh niselangin kan ram tan a ni a, kan lawmpui mai tur a ni a, lawmthu kan sawi mai tur a ni tihna rilru an pu te kha a ropui ka ti takzet a, an chungah hian lawmthu ka han sawi a ni.

Tin, kan Governor thusawia Santosh Trophy-a final kan han lut te Mizote tan, kan ram tan, Mizo fate tan hian tih theih loh hi a awm dawn lo a ni tih lantirtu a niin ka hria a. Vawiinah hian thil thar eng eng emaw tih kan tum mek a, chungah chuan zeldin thu bawla, ni ta se, nilo ta se kan meng ngam lo ang tih vel mai mai, zan kan chhuak ngam lovang tih vel mai mai te, kan thiam chuang lovang tih ang chi te. Hetiang hi a ni lo, theih loh hi a awm lova, miten an tih theih chu kan ti ve thei a ni tih Santosh Trophy, India ram-a football inelna sangberah kan thleng thei a ni tih hi a hria a. Heta kan thleng thei a nih chuan thil danga kan la tih loh pawh hi han ti chhin ila, tha takin ram dang, ram changkangten an thlen ang leh an nih ang hi chu kan ni thei dawn a ni tih min zirtirin ka hria a, lawmawm ka ti takzet a. Opposition an ni emaw ruling an ni emaw kan zavaiin kan lawm tlang a.

Tin, khami an inkhelh zan khan ka en uluk khawp mai a, vawihnih an chhuih goal hnuah khan ka rilru-a lo lang leh chiah chu minutes 85 vel a lo kal tawh hnu khan a goal leh dawn a ni, a goal leh tur chu Pathian goal, Lalpa goal a ni ang tih ka rilruah nghet tak maiin ngaihtuahna ka lo nei a. Ka neih zawh chiah khan a goal leh nghal a, Pa leh Fapa leh Thlarau Thianghlim kha a lo ni chiah mai a, a ropui ka ti a. Inkhelhah hian mittui tlaa a goal lawma en hi vawi khat mah ka la nei lova. Amaherawhchu khami zan kha chuan “lawm avangin ka biangah hian mittui a luang fo thin” tih mi hmasaten an lo sawi hi a dik chiang hlein ka hria a. Kan ram heti taka kan thalaiten min han sep kang te, kan House Leader sport thei tak a vanglaiin a lo ni a.

Tin, kan Sports Minister-in a finna leh a theihna zawng zawng hmanga hetiang a tih avang hian tun hi kan thleng chho thei a ni tih kan hria a, a

lawmawm ka ti takzet zet a. Catch Them Young te kan han ti a, tuna mite hian an la chhawr pha lo zawk a ni. Henghote an lo puitlin a, kan han tih chhoh tak tak chuan keini ang tia lek lek Korean tlangval te pawh khawvelah champion an nih theih chuan engah nge Mizo tlangval kristian-te hi champion kan nih theih loh bik ang, kan thei dawn a ni tih hi minrawn hmuh chian tir hlein ka hria a, a lawmawm ka ti a.

Tin, NLUP, kan hotuten ngaihtuah nachang an hria te, kan hotupa ber, kan House Leader hian a atchilh a ni tawp mai a. A hriat lam hi chu hre tak, thildang a hre lo ve ka tihna ni lovin. Miretheite tana a rilru leh ngaihtuahna zawng zawng sengin vawiin min han thlenpui a. Hetah hi chuan a sawrkar pawhin uluk taka kan enzui a ngaih rual rualin a dawngtute mawhphurhna hi a ni tawh zawk mah mah a. Chuvangin, NLUP kan tih chhohnaah te pawh hian kumin chho-ah te, tun term chho-ah te pawh hian a umzuina te, a la dawng lo te dawn tir tur tein theihtawp kan hotute'n an la chhuah chho zel a ni tih kan hria a.

Chutiang chuan, tuna ka hmaa MLA zahawm takin a rawn sawi kha a dik khawp mai a. Agriculture lamah ei leh bara intodelh a rawn ngaipawimawh em em a, a lawmawm ka ti a. An Sorkar lai khan MNF-a Chief Minister khan a ngaipawimawh khawp mai a. A sawi hmasak lamah khan, 'ei leh bar lama intodelh hi ka ngai pawimawh em em a, Chief Minister dang te'na an lak ngam reng reng loh Horticulture leh Agriculture ka la chat a ni, chuvangin, kum thum chhungin kan intodelh ang' a, ti a. Amaherawhchu, kum thum a lo nih meuh kha chuan chu Department chu Pu H. Rammawia hnenah hlanin a awm ta mai kha helai House zahawm takah hianin ka sawi chhuak nghe nghe a. 'Ka pu, kum thum chhungin kan intodelh ang i ti a, khalaiah khan ka lo chhuang che a, i tawngkam kha mawi ka lo ti a, i huaisen pawh ka ti a, kan hnam hi i hmangaih tak tak niin ka hria a, amaherawhchu, vawiinah hian retheite kan rethei zual telh telh a, nang leh i chhungkuate hi chu in intodelh ta ni hian a lang a, chutiang rilru puin i sawi a ni tih kha ka lo hre lo va, ka lo lawm ve viau kha ka lo at vang a lo ni e', tiin helai House-ah hian ka sawi chhuak nghe nghe a ni. Amaherawhchu, kan Minister zahawm tak thin khan vawiinah opposition lamah thu tain ei leh bar intodelh a la ngaipawimawh zel kha ropui ka ti a, lawmawm ka ti takzet a ni.

Tichuan, nichinah khan kan MLA zahawm takte khan thil tihdik loh nge ni khatiang kha an rawn sawi chhuak a, hetiang hian chhiar a pawm zawk tur a ni a. Correction tlem te Pu Speaker, i phalnain han sawi ka duh a. Governor speech pheik 4-na para 5-na a jhum area piahah khan 2012-13 chhunga hectare 24,307 kha

chhut sual (typing mistake) a ni a, Economic report-a kum 2012-13 a jhum area 24,706 hectare kha rin zawk tur a ni, a tlemna pawh 7% lai a ni.

Tin, Governor speech-ah bawk WRC area atanga buh thar productivity hectare hi 2.09 metric tonne a ni a. Economic survey report a 2.10 metric tonne tih kha a digit kha round off mai a ni. WRC atanga buh thar tam dan Governor speech a kan han tihlan kha 2.20 metric tonne per hectare a ni. Economic survey report-a buh thar tam dan hectare khat-ah 2.30 metric tonne in dah a ni a, hei hi a dik zawk a, 2.20 metric tonne kha typing mistake bawk a ni. Tin, Statistical Handbook Mizoram 2012 a buh area leh thar dan te hi chu kum 2010-11 leh 2011-12 an ni a, a thar tam lam kan ziahlan te hi chu kum hmasa lam kha a ni e tih kha ka'n sawi duh a ni e, ka lawm e.

**SPEAKER** : Khami correction kha kan la tlang ang chumaw lo ti mai ila, kan lo tidik hman hlawm turah ngai ta ila. Chuan sawi tur dang kan awm tawh loh.....Pu Vanlalzawma i ko ang.

**Pu VANLALZAWMA** : Pu Speaker, ka lawm e. Hei vawiinah Governor zahawm tak thusawi kan sawiho va, nichina an tih ang deuh kha a nia, a move tu pa East Tuipui bialtu kha a lawm ropui mai si a, a lawm lo lampang han sawi vak pawh kha a chi lo mai thei a, churang chuan eng emaw han sawi ve erawh chu a tulin ka hria a.

Thu tam tak kan ngaithla tawh a, khang kha sawi tul lovah ka ngai deuh a. Khata ka rilrua thenkhat kan sawilan loh han tihlan ve ka duh chu Pu Speaker, a hmasa berah chuan a sawi zawng zawngin an sawi deuh vek a. Santosh Trophy kan champion ropui zia leh kan lawm zia te kan sawi a, a lawmawm takzet a. Football hrim hrim hi India ramah hian kan buaipui nasa angreng a, world ranking-ah te sang viau lo mah ila, eizawnna tling zet a nih dan a awm a, ram dang world ranking a sang tak tak ai hian India rama football khelhi eizawn nan a tha an ti a, churang chuan uar zel te pawh kha kan tih tur niin ka hria a. Chu tih lai chuan ka beisei pakhat ka lo man fuh lo nge ni ka hre lova, khata kan lawmman la ho te tan incentive award tih lai hi kan sawi rik awm reng reng ka hre lova. Hei hi thil tih chi lo nge maw ni, theih ni ta se, incentive award hi sum leh pai lama kan harsa that a nih pawhin tihsak hram dan awm se a va tha em aw ka ti a. A then phei kha chu ka hriatsual loh chuan service a awm te an ni a, a pawisa fai kan ti thei lo a nih pawhin kan ngaihlu a kan ngai ropui tih entirnan promotion emaw lampang tihrik hi a awm loin ka hria a, kha kha a la tlai churang lova, tih theih ni ta se a va lawmawm dawn em. Nakinah kan inkhel leh zel tur te tan pawh phurna, pawisa lampang pawh kan ti thei a nih phei chuan thahnem tham deuh kha incentive

cash award te hi pek theih ni ta se tih hi ka rilruah a awm reng a, kha kha vawiinah ka sawi duh hmasa a ni.

Tin, a dawt lehah chuan kan Governor thusawia lang awm tak a awm a, a bik takin bial tinin kan mamawh, PWD hmalakna hi a lang tlat lo mai a. Ka sawi tawh ang khan bial tin hi PWD hmalakna a ni a, chutih rualin bial tin hian kan mamawh em em vek mai si a. PWD hmalakna hi kawng siam te leh thil dang dangah a lang lo tlat mai a, hei pawh hi a lang lo pawhin ngaihpawimawh zual atan a tha mang e. Nichinah pawh kan ngaihlala a, kan sawi a, kan bialah inkalpawhna that loh zia te leh hmalak a ngaih zia te kha ka'n sawi lang duh a.

Tin, PHE lampang kha a tha khawp mai a, kan hotuten thil an vei chho a. Chutihlai chuan ka rilruah awm reng thin, kan ngaihtuah tawk lova ka hriat chu Rain Water Harvesting Scheme lam hi kan la na lo mang e aw tih ka ngaihtuah a. Sap ho Mizorama an rawn awm tirha Aizawl khawpui an rawn din a, an hna pawimawh hmasa ber chu Rain Water Harvesting Scheme, Tuikhuahtlanga tuikhuah siam khi a ni. Kha tuikhuah kha kan ring rei khawp mai. Pump tel miah lovin Aizawl khawpui enkawlana an lo hman kha a ni a. Kan hre vek a, Mizoramah chuan ruahtui a tla tam tawk a, khami scheme ho kha thingtlang khaw tam takah hian apply ve ta ila a hlawk mai awm mang e aw, tuna kan scheme tam tak hi chu han ti thin mah ila eng emaw hleka pump theih lo mai te pawh a ni tlangpui a.

Rain Water Harvesting Scheme hi chu ruahtui vantla dawn khawm vak kha a ni mai a. Tuikhuahtlanga an system ang chi te kha Mizoramah hian apply theih loh a ni dawn em ni aw ka ti a. Ka hriat sual loh chuan Chennai-ah khuan tun hma kum 10 kal ta daih tawhah khan house and building plan reng reng hi Rain Water Harvesting Scheme Plan tel lo chu an approve duh lo a ni an ti a. Chungte pawh chu ti ve ta ila, private building-ah kan impose thei lo a nih pawhin sorkar building lian pui pui kan sakah te pawh hian lo ti ula chuan tha tur aw, kan sorkar hmasa hruaitute bulah pawh ka ti a.

New Secretariat Complex, New Capital complex-ah te pawh sawn motor parking te chu in dah tha viau a, in zawng zawngah sawn Rain Water Harvesting Scheme hi lo telh ula chuan a fel a ni mai dawn si a, office mamawh tawk ruah tui hi sawtah sawn a tla reng mai a, chu chu kan lo dah khawl loh vang mai mai sawn tui kan harsa niin ka hria a. Kha lam pawh kha ngaihpawimawh leh zual ni ta se tih hi Pu Speaker, ka telh chho leh duh a. Arab ram ho khuan min rawn hmu sela min nuizhat awm mang e ka ti thin a, ruahtui chu a tla hnem; a khawl na kan neih loh vang maia tui harsa kan ni tlat a ni. Khung lamah chuan ruahtui a tla tlem hrim hrim, eng ang pawhin lo inpuahchah se tihngaihna a awm lo. Mahse Mizoramah te chuan a dahna kan nei lo hi a ni mai a. Sawi fiamthu ang deuh a ni a, mobile



phone changkang tak tak nen, rangkachak thi awrh chungin tui kang kan nghak an tih kha a dik tlat a ni. Inzirtirna lam hi uar ila, a sawrkar lamin hma la bawk ila, tuiah hi chuan harsa lo thei kan ni awm asin tih hi ka ngaihtuahnaah a awm thin a; chu chu vawiinah kan hotute, kan minister ten an ngaihpawimawh theih chuan tih ka sawi leh duh a.

Tin, Transport lam nge Police lam mawh tih ka hre chiah lova, tun hnaiah hian motor accident hi a tam angreng riau mai a, kan motor accident han en hian motor khawl chhiat vang chu a ni chiah lo deuhin ka hria a, kawng chhiat vang chiah pawh niin a lang lova; a khalhtu lam hi niin a lang deuh tlat mai a. Han ngaihtuah ve mah ula, tunhnaiah mai pawh hian motor accident a thi hi an tam tlat a ni. A population han en pheih chuan a sang viau mai awm mange ka ti a. Helaiah hian mass movement ang deuh hleka inzirtirna hi a va ngai em ve aw. Motor accident-ah mi uiawm deuh deuh hi kan thi a, chhungkaw pa ber te kan thi a, rethei kan pun belh zel, helai hi engtin emaw taka ngaihtuah deuh a tha khawpin ka hria a. Transport lam leh thil dang dangah. Sun control pawhthlak te chu kan ti hneh khawp mai a, number plate chang- kang te pawh hi kan han innawr vak mai a. Tiang deuh hlek hian a driver lam atanga engemaw tia kan zavaia kan ngaihpawimawh theihna turin motor khalh inzirtir dan hi tih dan a awm lawm ni aw ka'n ti a, chu chu ka'n point leh duh a.

Tin, ka sawi leh duh chu border trade chungchang hmalakna ropui tak kan hria a; Tlabung lamah te, Chhimtuipui lamah te, Zokhawthar-ah te. Helaiah hian keini lam hi eng ang pawhin inpeih mah ila border trade-ah kher kher hi chuan a pawimawh zawk tak hi chu Delhi tlang khu a nih dan a awm a. Helaiah hian engtin nge hma kan lak ang. Kan state hi lo inpeih hle mah ila a lehlam inpeih leh peih loh lai hi a pawimawh tel a. External Affairs Committee ah te khan ka tel ve thin a, tunhma in, tah pawh chuan North East develop nan a pawimawh ber pakhat chu kan thenawm state Myanmar leh Bangladesh te nena relations tha kan neih hi a tul a ni tih hi ka sawi ve thin a. Chu chu tun thleng pawh hian ala pawimawhin ka hria a. Gauhati atangin rod te kan phur chho va, chu ai chuan khulai thlang lawkah Bangladesh Dhaka-ah te khuan phurh mai theih nita se chhim lam tan chuan, border trade pawimawh dan hi kan hotuten min hriatpui se tih ka duh a.

Tin, kan sawi tak ang khan Delhi tlang a pawimawh tlat, kan thenawm ram te nena inrem tur chuan. Chuvang chuan khulama nawr chak te pawh a pawimawhin ka hria a, helaiah lo in peih ringawt mah ila Bangladesh leh Myanmar-te nena relation tha deuh kan siam a nih loh chuan awl te in awmzia nei lo hian a chhuak mai thei a. Ka ti ka ti thin a, Pakistan in ngaihpawimawh ang hian Bangladesh leh Myanmar hi attention pe deuhin dawr ila chuan North East hi chu automatic in kan develop ang ka ti thin a. Pakistan leh China te kan tlawng reng ang hian Bangladesh leh Myanmar hi chu be thain relation tha hi chu siam

ila chuan kan economy atan hi chuan a pawimawh pha tlat a ni tih ka sawi duh a, sawi tur tam tak a awm thei ang a.

A tawp atana ka sawi duh chu, kan hotute khan an sawi tawh na chungin tax-hi a khawn dan lam hi uluk ila. Uluk kan tih rualin awlsam deuha pek dan hi chu siam ava han tul tehreng em aw kan ti a. Kan central service officer pakhat helai taxation enkawltu pakhatin min hrilh chu. Mizorama mak ka tih chu, sumdawngte leh mi thenkhat an lo kal a, “chhiah pek ve tur te hi ka nei em, an rawn ti thin e,” a ti a, an sumdawwna velah min rawn thin a ni a ti. Vai ramah hetiang hi kan dawng ngailo reng reng, chhiah pek an tul leh tul loh hi min zawt ngai lo. Mahse, helaiah chuan min zawt hi ka tawng thin a ti. Amaherawhchu, chhiah pe tur tam tak pe hreh lem lo te pawh kha pek buaithlak angreng zet hi a ni thin a thenkhatah chuan. Nichina kan ngaihthlak tawh intlar chiam ngai te, tha sen ngai te hi chu tan lak nan a va tha em ve aw, Mizote hi chhiah pek hreh em em ni pawhin kan lang lo. Amaherawhchu, pek a harsa deuh hlek thin mai pawh a, awlsam deuh hleka pek dan hi department hrang hrang, chhiah khawn chi lam deuh tan pawh hian tih theih ni se tih kha Pu Speaker, ka'n sawi duh a ni. Ka lawm e.

**SPEAKER** : Awle, tunah chuan House Leader, Pu Lal Thanhawla kan sawihona khaikhawm turin sawm ila.

**Pu LAL THANHAWLA, CHIEF MINISTER** : Pu Speaker, minister ten an mahni chanvo pawimawh deuh chu an rawn sawi turah ka beisei a. Mahse, min koh takah chuan ding lo thei lo ka ni a. Hmanniah kan hotupa'n a sawi tawh angin waviina kan Governor Address kan han sawiho hi a nuam hle mai a. A bawplawk deuh awm lovin puitling takin opposition lama kan hotute pawhin ram neitu, ram leilung fa nihna rilru puin thu an rawn sawi a, a lawmawm ka ti a, a hmasain lawmthu ka sawi hmasa a ni.

He House-a kan awm hian ruling leh opposition-ah hian wavi tam tak ka awm tawh a. Ruling-ah wavi nga ka awmna a ni a. Constructive opposition nih hi a pawimawh khawp mai a, constructive taka kan kal phawt chuan ruling party pawhin min ignore tak tak thei lo a ni. Chuvangin, constructive takin kan hotute pawhin min hruai thin a, keimahni lamah pawh satisfaction (lawmna, lungawina) a awm thin a. Tin, tam leh tlem lam hi a ni lova, keimahni ngaih dan leh kan ram leh hnam tan leh kan sorkar kalphunga kan ngaih dan te, kan contribution te leh constructive criticism te kan siam thin hi a pawimawh lai zawk a ni a. Sorkar pawhin a tul chuan ram leh hnam tana tha chu kan thlawp mai thin a. Tin, kan sorkar pawhin opposition

resolution chu pass loh tur tih te pawh dan ang deuhthawa kan lo neih tawh kha kan hotuten hei chu ram leh hnam tan a tha a ni an ti a, kan pass mai a. Chutiang chuan rilru puitling takin kan hotuten min kaihrui thin a. Tunah pawh kan opposition member-te waviin-a kan discussion neih atang hian lawmawm ka ti hle a ni.

Kan Governor-ina kan Football team te (a ni kum sawmriat leh pali, panga lai tawhin a) lawmpui nachang a hria hi ama chungah pawh lawmthu sawi ngaiin ka hria a. Tin, kan thalaite hetiang India rama ber an han kai thei hi thil lawmawm tak a ni. Tin, Mizoram Football Association te hi an tang khawp mai, tunah hian. India ramah hi chuan a dai thuk ber an ni tawh angem aw ka ti. Hei FIFA te an ko lut a, grass root atangin football khelh te an han zir chho a, chutiang chuan an kal chho a. Tin, tunah hian FIFA te nen tanghovin Pune-ah International Football Academy-ah te pawh Mizote hian neitu chan chang takin bul an lakpui nghe nghe a ni a. Hmanniah Liverpool club a an hotute pawh an lo kal nghe nghe a ni. Chutiang tak chuan All India Football Federation-ah te pawh hian an han thleng thuk ringawt pawh hi an fakawm ka ti a.

Hmanniah thlawhnaah Milkha Singh-a te nen kan kal hova, kan ti tinaah Catch Them Young programme kan Sports Minister-in a neih atanga kum 14 hnuai lam sport discipline hrang hrangah kan train dante leh kan enkawl dante ka hrilh a, ropui a ti khawp mai a. Ka zinna apiangah state dangin an tih pawh ka hre lo va, ti turin ka hrilh ve zel tawh dawn a ni, a ti a. Chutiang chuan Games & Sports lamah hian kan sorkar hmasa atang khan Sport Minister kaihruiaina in kan tang tha hle a, a lawmawm hle a. Tin, kan thalaite pawhin zuk leh hmuam leh thil dang dang ti chungah kalpui mai mai chi a ni lo tih hriain tunah hi chuan chhungleh leh pawnlam nun ulukin self discipline tha tak neiin kalna chang te an hre ta te pawh hi thil lawmawm tak a ni a, hma kan la sawn zel dawn a. Tun Olympic, London amiah khan Mizo thalai pakhatmah tel tur an awm lo kha a tlawmngaih thlak kan ti a. Mizoram Olympic Association atang pawhin kan Sport Minister kaihruiainain Olympic Vision 2016 kan han buatsaih a. Road map tha tak buatsaihin tunah hian discipline, India kan represent theihna tur awm ang chi te thlangin uluk takin an kalpui a ni. Kan phak ang tawh tawkah, a tha ber chu ka ti miah lo va, kan phak ve ang chin tawh tawkah tiang chuan kalpui a ni a. 2016 Rio Olympic-ah chuan engemaw zat ti ve thei ngei tumin hma an la hlawm a ni. Chutiang chuan hma lak a ni.

Tin, MLA zahawm tak Pu Beichhua khan Saiha lamah pawh a duhthawhna a sawi langa (Power Interruption). Tichuan, tunah hian a pheizel a, remchang awmsa awmnaah chuan Lawngtlai-ah pawh tunah hian grass an phah dawn mek a, an phah tan tawh turah kan ngai a, a latest ka hre chiah lo va, Champhai-ah te chuan an phah tan tawh a. Saiha-ah kan

Sport Minister hian hmun tha a melhna a rei tawh a, kan sorkar hmasaah pawh khan. Amaherawhchu a khawpui chhungah hmun tha kan hmu zo lo va. Tuna kawngpui thlangah sawn earmark chu kan nei a, engnge tuna a dinhmun chiah ka hre lo va. Saw saw kan neih theiha kan develop theih chuan full-fledged stadium ang deuhthawa siam theih turah kan beisei a. Sawlaih sawn tunah hian kan Sport Minister attention a kal mek a ni.

Chutiang chuan thalaite khawvel thar kan siamna kawngah Games & Sports lamah chuan kan kal a. Tin, zirna lamah pawh an rawn sawi tam viau lo nain Governor Address-ah khan a lang tam lo na in Institute kan neih ngai loh IIT te, Mass Com. te thil dang dang kan nei mek a. Tin, Institute of Hotel Management te pawh nei turin tunah hian kan inbuatsaih a, in kan peih tawh a, sum leh pai lama kan la harsat deuh avangin kan la tan thei lo mai a ni a. Tin, DOEACC te pawh upgrade theihin tunah sawn NIELIT-ah te siamin Lunglei lamah chhim lam hmakhua ngaiin branch te pawh hawn tawh a ni. Chutiang chuan thalaite tana khawvel thar siamna kawngah kan kal mek zel a.

Tin, sipai lamah te pawh hian lut tam se kan duh a. A sang tel tun kum nga chhung khan an lut a. Tin, officer atan, probation officer tur te pawh eng emaw zat an kal a. Tin, khawvela sipai thaa ngaih British Army-ah te, French Legion-ah te pawh kan thiam ang angin an kalna tur kan ngaihtuah nasa a. Tunah hian British Army-ah hian Mizo thalai pariat vel lai kan nei mek a ni. Chutiang chuan thalaite tana khawvel thar buatsaihna kawngah kawng hrang hrangin hmalak a ni a. Amaherawhchu, kan duh ang tak chuan kan kal thei lo nain hma kan sawn ve hret hret zel a, foreign scholarship te nen lam. Chutiang chu tunah hian kan kal hmang a ni.

Tin, Games & Sports-ah pawh tunah hian eizawna chauh ni lovin hausak theihna a ni tih hriain kan thalaiten nasa takin an bei chho mek zel a. India ramah chuan football hi kan national game ang deuhthaw ani a. Amaherawhchu, cricket hi a lar zawk emaw ni chu aw tih theihin a awm a, sum tamna zawk a ni a. Heng kawngah te pawh hian Cricket Association of Mizoram ten theihpatawp an chhuah a, tunah hian India ram chauh pawh ni lo Australia, Melbourne-a an cricket field ang tiat vel khu Sihhmui-ah khuan kan buatsaih zo tawh a, hawn theih mai in buatsaih a ni a. BCCI lama hotute remchan huna hawng turin kan inpuahchah mek a ni. Chutiang chuan Games & Sports-ah hian kan thlaite tana eizawna chauh pawh ni lovin hausakna tham a awm avangin chutiang chuan kawng kan buatsaih sak chho mek zel a ni.

Tin, Santosh Trophy kha, ni e, a lawman kha a manage-tute tih a ni a, champion kha ₹ 5,00,000, runners up ₹ 2,00,000 an pe a ni. Tin, keimahni sorkarah incentive hrang hrang Sports Department-in kan ngaihtuah ve a, Olympic Association atang te in cash

incentive te pawh. Amaherawhchu tunah hian kan Sport Minister a ngawih tlatna chhan chu Election Code of Conduct-in min phuar a, engemaw han ti hlek ila tu ten emaw chuti khati an rawn ti ang tih kan hlau si a, kan la ngawi mai mai a ni.

Polytechnic kan sawi uar a, kan polytechnic te hi a hmun hma neih a harsa a. Tin, a kalphungah engemaw harsatna a awm a, duh angin kan kal tha thei lova. Hun hmasaah pawh kan minister-te nen kan innawr kan innawr a, kan sawi kan sawi tlang a. Amaherawhchu sum lo kal hi tunah hian hman tan theih tura ruahman a ni a. A bik takin Chhiahtlang hmun kha sawn tumna a awm lova, kan sawn dawn bawk lova, a hmunah khan kan dah ang a. Tin, a tituten a ram a zim chuti khati an tih hi tuna Chhiahtlang khaw mipuiten a pek sa aia lian khi a ni tih ka hria a. Tin, Chhiahtlang khi Serchhip town-a rinluh tawh a nih avangin Serchhip nen inang renga en tur a nih avangin Serchhip-a awm tur sorkar hmunhama tam tak hi chu ram an neih phawt chuan dah kan tum zel a, kan dah mek bawk a ni.

Tin, Tourist Lodge hi hmuntinah awm se a remchang ang a a tha ngawt ang, mahse hmuntina awm chi a ni lo a. Tunah pawh hian a awm lohna tur hmunah a awm deuh nual tawh em aw ka ti. A chhan chu amah leh amah a inchawm loh chuan tih chi a ni lo. Tourist te leh keimahni facilities kha awm ringawt mahsela amah a inchawm theih piah lamah profit making a nih a ngai. Chuti a nih loh chuan lost in a kal ringawt thei lova. Chuvangin a dahna awm deuh ngaihtuah a ngai a, Governor address lawmthu sawina motion puluttuin a sawi kha chu a awm khawp mai. Tawngkam thiam vang ai mahin hmun pawimawh avang khan a pawimawhin ka hria a. Baktawng tlangnuam khian an mamawh bawk, a chhan chu khi laiah khian foreigner tam tak an kal thin a. Chungte chu ngaihpawimawh hmasak tur a ni ang tih ka ring. Engpawh nise, Tourist Lodge hi thlenin a van avanga sak ngawt chi a ni lo tih erawh chu member-te hian min lo hriat sak sela. Va sak ringawt khan khi Darzo a kan neihte khi engtikah nge profit making a nih ang aw tih te hi ka ngaihtuah nasa a ni. Lost in chawmhlawm sorkar a kal reng thei lo a ni. Chuvangin khatieng zawngte khan kan ngaihtuah ve zel a ngai a ni.

Tin, Rail kawng hi nichinah khan member zahawm tak Pu Sangkunga khan a sawi tawh a. I.K.Gujral leh Ram Vilas Paswan te an lo zin lai atanga intan chho tawh kha a ni. Tunah hian kan Act kal chho zelah khan kum 2014-ah Railway authorities te chuan Sairang rawn thlen min tiam a. Amaherawhchu compensation hnam kan ni a, compensation kuttlingloa lak pawh pawl sa lo tam tak an awm a ni.

Compensation kuttlingloa lak pawl sak loh avangin vawiinah hian kawlphehthah pawh kan la intodelh thei lo a ni, kan duh tawk kan la hmu thei lo a ni. Tuirial khu kut tlinglo a compensation lak avanga chhe ta a ni, 2015 tawp lamah chuan chhete siam

kan tum a, hei hi 2014 min tiam hi tunah chuan an ngam tawh lo a, 2015 kum tawp lam an sawi ri leh tawh a. Chu pawh chu a tiam chuan min tiam ngam tawh lo a, a chhan chu kuttlingloa sum lak duh tute avangin tunah hian a chhan tak tak theih lova. Tender an koh pawh kha a kum a ral avangin a tawp a, an ko tha leh a. Tunah hian bul tan theih an inbeisei a. Mahse, a compensation chungchang kha chu a la fel fai chuang miah lo. Kut tlinglova kohhran mi, rawngbawltu kristian in ti, kuttlinglova sum lak pawisa lo te avangin he Sorkar hian harsatna tam tak kan tawh a. Tunah pawh hian kan project tam tak hi a puitlin loh phah ang tih ka hlau khawp mai. Chuvangin, kan rail kawng pawh hi a nih tur angin a rawn ni phak dawn lo va ni tih member zahawm tak kha ka'n hriattir duh a. Chutiang zel chuan kan project dang tam tak pawh hi tunah hian harsatna kan la tawh chho mek zel a, engtia tih tur nge ni ang ka hre lo.

Tuna Rel kawng pawh hi compensation chungchang thu-ah a la fel fai chuang lo a ni. Chutiang chu a ni a, hei hi member ten kan hriat a tha a. Amaherawhchu, hetiang karah hian mi tha tak tak an lo awm ve leh thin a. Chungte chuan phut tehchiam lem lovin, amaherawhchu, sorkarin eng emaw a awm tawh min pek te chuan ti a, kan ram leh hnam tan tih nachang hriate mi hrang hrang an awm ve leh zel a. Kan ngaihthlak tak ang Falkawn-te ang kha kan la nei tho a, a lawmawm khawp mai.

Tin, NLUP hi kan sawi thin a, NLUP hi a tum a tha a, a tumtute rilru pawh a tha a, a dawngtu-te rilru hi a that ve a ngai a, chu chu a pawimawh lai chu a ni. A dawngtu-te hian rinawmna, dikna, taimakna leh Pathian tihna nung nena an dawn a ngai. Chu chu an hriat a tul avangin ka kalna apiangah rinawmna, dikna, taimakna leh Pathian nung tihna nen an dawn a ngai tih hi ka hrih ngun hle thin hlawm a ni.

Tin, he thil hi ka sawi tawh thin a. Pathianin NLUP hmang hian a hnam thlan Mizote a bik takin kut hnathawk mi te, huan nei mi te, inhlawhfate, hmeithai-te, pachhia-te, chhumchhia-te nen lam hian khai chhuah nan hman a tum a ni ang tih hi ka ring nghet tlat a. A chhan chu ringlo mi, central sorkar hotu lu leh pawimawh ber berteah khuan hna a thawk tlat a. Mi nuai khat leh singnih khuh nan kum nga chungin ₹ 1500 crore kan dil-ah khan ₹ 2813 crore min pe tlat a ni, chutiang daih chu a ni. Chuvangin, heta tang ringawt pawh hian politics hmanrua-a hmang lovin Pathianin a hnam thlante, a bik takin hmeithaite, pachhiate, 'heng ka unau te ber zing a pakhat' a tihte tana tih hi a ni. NLUP kan tih hian sorkar hnathawk miliante, sumdawng mi hausa-te a kawh lova. Lal Isua'n 'heng ka unau mi te ber' a tih kha a kawh tlat a ni. Chuvangin, an chanvo lo eiruk sak pawh hi a thiang lo kan ti a. Tun thleng hian kawng bo la awm lo niin ka hria a, lawmawm ka ti a.

Tin, chu mai chu a ni lova, NLUP hian UNO kawngkapui a kik hawng a ni. Chuvangin, Governor-in a thu sawina-ah pawh khan a sawi kha UNIDO te, UNDP-te, Food & Welfare Organization te leh ILO te, hemi UNO Agency hrang hrangte hian an ngaihven hle a, an lo kal an lo kal tawh a. Hmanni khan a huho deuhin an lo kal a, Delhi-ah te an sawi zui a, an bawhzui zel a. Engtingge min tanpui dawn a, an rawn tel ve dawn tih chu kan hre chiah lova, technical cooperation leh khatiang zawngte khan an kal a ni.

Tin, chu mai ni lovin, Japan tun hmaa 'Overseas Economic Development Fund' an tih thin kha JAITA an ti tawh a. Chungte pawh chu vawi eng emaw zat an lo kal tawh a. Land reclamations chungchangah te, afforestation chungchang-ah te chutiang chuan an rawn ngaihven a, rawn tel ve dan tur an zawng a, kan sorkar pawhin an tel ve dan tur tunah hian kawng nasa takin a dap a ni. Chutiang chuan NLUP hi hmalak chhoh a ni a. Tunah pawh hian sum a vaibelchhe za tel a awm a, amaherawhchu, election conduct avangin kan sem zawm thei lova, May ni 16 hnuah erawh chuan chak taka kalpui chhoh loh theih loh turin tunah hian hmachhawp a ni. Chutiang chuan kan hotuten hma an la a.

Tin, Rain Water Harvest hi thil pawimawh tak a ni a. Tun hma zawngin British-in Tuikhuahtlanga tui an lo khuah piah lamah in tin hian zem te, tuikhuah lian pui puite kan nei thin a, tun hnuah hian neih tum kan awm ta lo a ni. Tun hma chuan keini te pawhin kan hriat phakah kan zem neihte ruah a lo sur a, a lo khah tawh chuan, kan bel lian neih ang angte kan la chhuak a, tiang khan kan ti khawm thin a, chhungkaw tam takin Aizawl khawpuiah pawh hian thal chhunga kan tla tur kan neih theihna turin tuizem lian pui pui kan nei deuh vek a ni. Amaerawhchu, tun hnuah hian kan ching ta lova, hengte avang hian heng NLUP kan tih pah hian Rain Water Harvesting lama expert te Planning Commission lam atangte pawhin kan chah chhuak a, chung ho thurawna hnuaih chuan tunah hian kalpui dan kawng hrang hrang ngaihtuah mek a ni. Expert pawh hi vawi 2 vawi 3 helaih hian a lokal tawh a, kan mithiamte nen an sawiho thin a ni. Tiang chuan kawng hrang hrangin kan mipuite hamthatna tur chi hrang hrangin kan hotuten an ngaihtuah a, amaherawhchu, thil han tih duak duakte, han kalpui duak duakte, a harsat thin avangin thil a tih hleihtheih lohva.

Tin, hei kan hria a, khawvela sakhaw lian ber ber 3 - Buddhist te, Hindu te, Mosolman tena hual tlat kan ni a, chung kan thenawmah te chuan Border Trade kan neih hi, a border trade ngau ngau ai mah khan Chanchintha hrilhna tur atan pawh hian a tha ang tih hi kan hotuten an ring a ni. Chuvangin, Burma nena Border Trade Zokhawtharte nena kan han puahchah tirhte pawh hian chutiang zawng chuan kan hotute ngaihtuahnaah a awm a. Tin, chumi rual chuan sawtah Bay of Bengal- ah chhuahka kan neih hi tha kan ti a, chuvangin Burma sorkarte nen sawihovin Pu Lalfakzualate, Pu Ramhluna Khiangte te

investigation lain an kal a, tichuan kan hun hmasa lamah khan remtiin survey leh investigation-te kan lo ti daih tawh a. India sorkar laipui UPA in Look East Policy a hriat hma khan kan lo tan daih tawh a ni. Chutiang chuan kan hotuten hma an lo la a. Tichuan tunah hian Zokhawthar hi plan investigation te hi peih a ni tawh a, Central sorkara kan hotute rawn hawng turin kan ti a, kan inpeih tawh a, mahse hei an rawn hawng hman ta lova, tun term-ah chuan a tul a nih chuan a hawn theih hmasa berah khu lam tel lo pawhin kan lo commission ang a, chutiang chuan a border trade pangngai ang khan a kal thei dawn chauh a ni a, chuvangin a hmanhmawh thlak angreng hle a.

Tin, nichina kan ngaihtlak tawh ang khan Zo hnahtlakte insuihkawm, sorkar pakhat hnuai awm te hi Mizo zawng zawngte thinlungah hian a awm niin a lang. Chungte tan pawh chuan Border Trade hi a tha hrim hrim a. Chumi hre ran chuan kan hotuten Zokhawthar atanga Tidim-Falam kawngpui te pawh hi sial turin an nawr a. Chung chu India sorskarin peih vek tawhin, kan beisei dan tak pheih chuan nikum lam khan India sorkarin tan daih tawh turah kan ngai a, mahselangin Burma sorkarin a hna thawh kha an lo chuh a, India sorkarin tha a ti si lo. Tunah hian border roads te kutah a hlan ta niin ka hria, chutiang chuan kan hotu ten hma anlo la a. Tin, sawtah Bay of Bengal chhuahna kan neihna turin Lawngtlai atangin Burma border thlengin lamlian laih mek a ni a, km 100 zet a ni a, km 90 leh km 100 kan ti mai a. Formation cutting km. 75-an zawhna hi a rei tawh a tunah hian engzat chiah nge an zawh tawh ka hre mai lova.

Tin, chutianga Burma ram kal tlang a Bay of Bengal a chhuah kha a ni a, South East Asian country te nena insumdawntawanna neihna tur a ni a. Tin, khing ram ami te khi keimahni ang hmel pu mi an ni a, ringlote deuh vek an ni a, chungte avang chuan chanchintha hrihna atan pawha remchang tak tur a ni tih kan hotuten an hriat avangin an phur phah hle a ni. Chutiang chuan tunah hian ruahman a ni a. Tin, hemi India sorkar min hriatpui kherlo pawh hi, chhim lamah pawh sawn Mara ram atangte, phai ram atangte pawhin Burma rama Mizo hnahtlak awmna khaw hrang hrang-te nena inkalpawhna kawng hrang hrang hi hmun 2 hmun 3-ah kan lai a, a then chu hawn peih a ni tawh a, inthlan process a zawh veleh hawn tura ruahman kan nei nual a ni. Chuvang chuan khawchhak lama kan unaute nena inkalpawhna kan neihna atangin inlaichinna tha kan nei cho zel a, hetiangalungrualna kan la neih kha kan hotuten an thlir ran a ni, chutiang chuan kawng pawh siam a ni.

Tin, Burma ram khatianga a tel avang khan Burma Ambassador, India ram ami zinah kan sawm a, ni 2 chamin a lo kal a, sawtah tuna kan sawi tak ramah te leh Lungreng kan huap dawn a, megawatt 815 vel lai pechhuak thei tur kan ni a. Burma ram chu a chhim dawn a; tin, Zokhawthar emaw The Trade Post pawh rawn en ve se kan duh a, tiang



chuan helicopter-in kan kal kual tir a, a hmunah te kan va dah a, an haw dawn zanah te chaw anrawn ei a, an hlim hle a an delegate kha. An sorkar lam atangin theihpatawp chhuah an tum thu minrawn hrilh a.

Tin, kan Prime Minister a han kal hmasak dawn khan enge Burma sorkar nena kan inbiakna turah Mizoram chungchang sawi tura min duh tih te a special advisor Pu Nayar arawn tir a, churang te pawh chuan thil tih tur tam tak kan hotuten an lo chah nghe nghe a ni. Tiang chuan Burma ambassador te pawh helaiah ngei a hmunah ngei kan entir a, an phur hle a.

Tin, chu Ambassador chu khilai an Foreign office-ah Deputy Foreign Minister emawni a ni ta lehngal a, churang chuan all right tam tak kan nei leh ngal a. Hmanni lawk khan khuta kan ambassador a lo zin a, kan in hmuh theih dawn loh avangin (kei ka lo zin chhuah dawn avangin) Kolkata-ah ka riak dawn tih a hria a, Kolkata-ah chuan Mizoram House-ah ka lo thleng ve mai ang chu a ti a, kan lo thlen tir a. Inkawmna tha tak mai kan nei a, kan mamawhrawn thlen turte pawh thil tam tak kan inchah a ni. Chutiang chuan Burma nen kan insumdawntawwna tur kawng atan leh khilai Zohnathlakte nena inzawmna tha tak kan neih chhoh zel theihna tur atan tiang chuan hma kan la a.

Hmanni lawk khan Burma ram sipai sorkar a nih hnuah khan Burma sorkar-in an la phal ngai reng reng loh Chin National Day an phal sak ta a. Chutah chuan Chin hruaitu ho an lo kal a, chief guest atan minrawn sawm a, mahse helama kan hun nen a inremchan tak loh avangin kan kal hman ta lova, pawh an ti hle a, chutiang chuan khilama kan unaute nen pawh insumdawntawwna nasa tak kan nei a ni.

Bangladesh nen pawh insumdawntawwna nei turin kan hun hmasa khan hma kan la a, mahse kan awm loh hnu khan chhunzawm a ni ta lo nge ka hre lo a, kan lo kir leh khan kan han enchhin a, engmah hmalakna a awm lo a. Remchang takin Sheikh Hassina, an Prime Minister Delhi-ah alo zin a, Prime Minister-in chawhluh kilpuiah min sawm ve a, tahchuan kan sawi dun a, tha a ti hle ni tur a ni., 'Ka pi, keini ai chuan nangnin inchhawr zawk daih dawn, churangin helai hi irawn ngaihven dawn nia,' ka ti a. A tukah Pu Zawma pawh hi MP zahawm tak ala nih lai niin ka hria a, press conference ah khan border trade kan neih dan tur kha a puang ta nghe nghe a ni. Chuta tang chuan, chumi zan bawka ka hmuh, tun thleng pawha a High Commission la ni ta reng hi arawn tir chho a. A hmunah Kawrpuichhuah thlengin, Theka Buk thlengin ava kal a, Bangladesh hruaituah chuan thleng hmasa ber a ni nghe nghe in ka ring. Tin, chumi hnuah chuan a enzuina leh a bawhzuina turin Minister, Chitagong Hill Track Development arawn tir tawh a. Tin, Prime Minister-in Dhaka a tlawh khan min hruai ve a, official delegation kan in hmuh tlannaah border trade

chungchang bawk kha ka sawi ve leh a, chutah pawh chuan, ‘Minister te tirin kan endik nghal ang a, rang takin kan ti dawn nia’, a tih avangin senior minister pahnih a rawn tir tawh nghe nghe a. Pu Rina, Trade & Commerce Minister a nih lai khan chutiang chuan bawhzui chhoh mek zel a ni.

Keini lamah chuan Lunglei to Tlabung, Tlabung to Kawrpuichhuah atana hman tur hi World Bank in tunah hian sum min ruahman sak tawh a, hman mai theih turin tun ah hian department in a ruahman mek a, kawng tha tak siam theihna turin. Anmahni lam saw tlemin an harsa deuh a, hmana Asian Development Bank hotute nena inhma tura Manila a ka kalin an executive director pahnih chu Bangladesh mi an lo ni a, chungho hnenah chuan chutiang in sumdawntawna tha kan mamawh zia leh an ram tana tangkai zawk tur a nih zia ka hrilh a, an phur hle a. “ Kan lo ngaihven zui ang, Bangladesh sawrkarin eng emaw sawi a rawn nei a nih phawt chuan,” an tih te pawh chung ho chu ka hrilh nghe nghe a, chuvangin anmahni lamah pawh chak zawka hma an lak theih kan beisei a. Chutiang chuan border trade rualin chanchintha hrilhna tur kawng a inhawng zel dawnin kan hria a, kan phur hle a ni. Chu chu a tlangpui Pu Speaker, helaia kan member zahawm tak tak te a bik takin Opposition lampanga kan hotute rawn sawi kha a ni a.

Tin, Pu Beichhua member zahawm tak kha doctor a ni bawk a, a ngaih pawimawh kha a ngaih pawimawh awm hle a, India sawrkar pawhin a ngaih pawimawh a ni, Health Care hi. Tin, keini Mizote ringtu zaa za in ti, Pathian hnam thlan in ti te hi khawvela hnam hrisel ber awm kan nih lai hian a hrisel lo ber kan ni a, a pawh hle a. Vaihlo zuk leh hmuam te, kuhva khawr te, chinai te hi cancer siamtu a ni a, America sawrkar te chuan an hlau hle a, tile bang te, asbestos te hi chinai a tel tam avangin hman an duh lohna a rei tawh a, keini chuan a eiin kan la ei ta sak sak a ni a. Chuvangin tawng mawi lo ni suh se, cancer te hi a choin kan cho emaw ni chu aw tih tur khawp hian kan khawsa a, a pawh hle a. Tin, ei leh in lamah te kan insumkar tehchiam lo a, ringtu ni si hi, chungte avang chuan kan hrisel lo nasa. Chuvangin Cancer Hospital khum 4/5(pali/panga) lek awm thin kha, khum 30 ah remlo takin harsa takin, an han ti chho a. Tunah hian khum 100 awm thei turin India sawrkarin min remtihpui tawh a, kan lawm hle a. Tin, Health Care ah hian kan seng tam em em mai a, vaibelchhe tam tak kan seng a, heng te pawh hi engtin nge kan tihtlem ang, tih te pawh hi nasa takin kan hotuten an ngaihtuah a ni. Tunah pawh vanneihthlak takin Kolkatta Rojarhat-ah khuan Cancer Institute Mumbai a kan zuk pan thin te khuan damdawi in an rawn hawng thar ve a, chumi kawt maiah chuan Mizoram House kan sa mek bawk a, chu ringawt pawh chu thawkna huai thamah kan ngai a. Chutiang chuan Health Care lamah hian hma kan lak nasat a ngai a.

Tin, helaiah nichin a member zahawm takin a sawi tawh ang khan a hmanrua kan neih loh vanga phaia in refer ngai te hi a lo tam em em mai a lo ni a. Chuvangin, chutianga in refer ngai lo a helaia kan doctor thiam tak tak ten an thiamna hmang-a tualchhungah anmahni Mizopuite an tihdam theihna turin a hmanraw pawimawh ang chi te chu a theih ang ang kan phak tawh chinah chuan inven thua ila kan ti a.

Tin, Civil Hospital-ah te hi chuan damdawi hi free-in a tul ang ang sem thei tura kalpui a ni thin a, tunlaia Health Care India sorkar-in a ngaihpawimawhna-ah ngat phei chuan. Mahse chutiang te pawh chu ti hlei theilo dinhmuna kan ding te hi thil hrehawm tak a ni. Engpawh nisela, a hmun hma hi tha phawt se tih kan hotuten an ngaihtuah a. Chuvangin, district hospital zawng zawng hi chu a upgrade-na turin India sorkar-ah kan nawr a, sum pawh pek kan ni a, min la pe mek zel dawn bawh a. Chuvangin, Saiha-ah damdawi in chhe ber an neih pawh kha a tha ber a nih theihna turin sum leh pai te pawh awmin, amah minister ngei te pawh ava kal tawh a ni. Chutiang chuan zawi zawiin kan bei chho mek zel a.

Tin, ICU hi a pawimawh khawp mai a, Aizawl Civil Hospital ah sawn ka lo kal zen zen lova Pu Speaker. Ka makpa damloh laiin ICU-ah a awm ve a ka han kal ve a. Mahse, mi ramah chuan ICU kan luh dawn chuan pheikhawh te min phelh tir a, kan kut te kha min tihfai tir thin kha a ni a. Sawlai ICU ve ah chuan doctor te leh nurse ho eitur chow te kha an chawi lut te ka hmu a, a mak ka ti a, chu chu ka sawi ka sawi a, tunah saw chuan an ti tawh lo turah ka ngai a.

Tin, meizukna hmun te an lo siam a. Tunlaiin India sorkar chauh pawh ni lo, Supreme Court pawhin hmun ualauah meizuk a khap tawh laiin damdawi inah te an meizukna te a lo awm a, thil mak tak a ni a. Tunah chuan an ti tha vek tawh turah ka ngai a. Chutiang chuan Health Care lamah hian a mipui chu sawi loh a doctor te pawh khan min lo care pui vaklo a ni. Chuvangin, nichina kan member zahawm takin heng zawng zawng a rawn sawichhuak te kha a lawmawm ka ti a. Civil Hospital ah sawn CT-Scan te pawh alo awm lova, chungte chu thil mak tak a ni a, tunlai khawvelah chuan, chungte pawh chu theihpatawp chhuahin kan hotuten an bei chho mek zel a, an nei tawh a. MRI te pawh pathau deuh leh nu thau deuh phei chu a awmchhun private taah an leng manglo a ni. Chuvangin, MRI-ti tur ringawtin phai lama kal te a ngaih phah a. Hengte pawh hi thil zahthlak niin ka hria a. Chuvangin, heng kawngah te pawh hian tan lak a ngai hle a ni.

Engpawhnise, Pu Speaker, a tul zawng zawng leh an rawn sawi rik zawng zawng kha kan chhangin kan sawifiah vek hmanlo ang a. Engpawhnise, vawiin-a Governor address sawihona boruak hi a lawmawm ka ti takzet a. Opposition-te attitude atang ringawt

pawhin sorkarah a hminga awm tan pawh a lawmawm ka ti. Chuvangin, a bul tanna kan tan that avangin thawhhona tha tak kan neih ka beisei a.

Tin, a bawplawk leh thildang zawnga la lovin vawiinah hian lawmthu te kan ngaithla a. Tin, fuihna thu te pawh kan ngaithla a, a lawmawm ka ti takzet a. Tin, induhthawhna te pawh hi a ri fo tur a ni, indeusawh vang ni lovin a tha duh vangin induhthawhna te kan sawi thin tur a ni, chutiang chuan kan kal a tha a. Helama awm te hi a fel ber te, a thiam ber, a tha ber te kan ni lova, finchhuah kan ngai a, tawngtaipui kan ngai a ni. Kan ram, kan hnam hi ei leh barah, sum leh paiah intodelh tir kan tum a ni. Lei hnuai hausakna haichhuah te pawh hmannah ka sawi thuak tawh a, Pu Zawma MP a nih lai te pawh khan a lo tui ve a, kan ti tlang chhoa, vawiinah chuan thui tak kan kal tawh a, mahse chak zawka kal dan tur te kan la ngaihtuah chho mek zel a. Chutiang chuan ei leh bar, sum leh pai intodelh a Mizote ropui nan ni lo, Mizoram sawrkar ropui nan pawh ni lo, Pathian ropui nan heng zawng zawng hi hlen chhuah chhoh kan tum a ni. Chumi kawng chuan kan vai hian ringtute kan nihna kawngah kan mawh phurhna a inang vek a ni tih hria a puitling taka Governor Address kan han sawiho thei hi a lawmawm ka ti a, tluang takin lungrual taka min pass pui theih pawh ka beisei a ni.

**SPEAKER** : Tunah chuan motion neitu Pu T.Sangkunga kan ko tawh ang a, wind-up sela, tin, House pawmpuina rawn dil hmasa mai sela.

**Pu T.SANGKUNGA** : Pu Speaker, ka lawm e. Vawiinah kan Governor thusawi lawmthu sawina motion pulut tura min ruattu kan House Leader chungah ka lawm hle a, kei atan pheih chuan ka maiden speech a ni lehngal a, lawmna a double hlein ka hria a ni. Tin, kan Governor thusawi kan han sawihona hrim hrimah kan inlungrual tih a lang a, a lawmawm tak zet zet a. Kan House Leader leh Home Minister te pawhin an sawi ang khan hetiang in lungrual hi khawvelah a vang khawpin ka ring. Han sawi pawr awm emaw kan tih pawh kha thahnem ngaih vang, hei hi hetiang deuh hian a la tihbelh thei em tih lam deuh hliir a ni mai a, kha lah kha kan House Leader-in a rawn sawi zawng zawngah khan tih mek emaw tih tum emaw alo ni deuh vek si a, Bible-a ka thinlung ang pu mi tih a kha kan House Leader hian sawi ta se a thinlung ang in lo pu a ni tih a langin ka hria a.

Tichuan in han point out te pawh kha eng eng emaw kan House Leaderin a rawn sawi hman loh leh concerned minister-in an rawn sawi hman loh te pawh kha wind-up pahin han sawi ta ila. Kan member zahawm tak Pu Lalruatkima

rawn sawi chhuah leh Pu Thanliana rawn sawi chhuah Ramhlun veng min tanpuina chungchang Control and Meditation of Landslide area in Ramhlun Aizawl tih kha Delhi-a kan zu training hovin Pu Thanliana, kan MLA zahawm tak hi ka fiama, ‘ i vanneih zia chu i hma ami Finance Minister ni bawkin a bial lei min a bei chiam mai a, Pu Nihar Kanti Chakma, tuna kan MLA zahawm tak hi a nawr reng mai a, Delhi kal dawnin a nawr chhuak chiah mai a, nangin in chhunzawm a nia i vannei mang e, ‘ ka ti a. Chutiang chiah chuan a nawr chhuak hman si a, a chuanna kha correction a ngai lova crore 555.55 hi Supplementary Demand phek 77-naah hian a awm a, keu theih a ni a.

Tin, Pu Ruatkima sawi tho, kan Governor thusawi tho point 10-na “ there are various development works going on for sports” tih phek 9-na lai hawl ami ‘Mualpui Multipurpose Indoor Hall’ tih kha sak mek zingah khan a tel a, Mualpuiah tho khan a nia kan minister zahawm tak khan North East a a lian ber ni tur khan kan duang a, car parking pawh lian takin kan ruahman a, hei hi siam mek a ni e tiin clarification min rawn thawn a, a remchan lai hian han hrilfiah zel te pawh kha kan motion min pawm pui tura ka ngen pahin ka’n sawi chhuak duh a.

Tin, vawiina Governor thusawia lawmthu sawinaah hian thusawitu 10(sawm) kan awm a. Session hmasa December-a kan neih khan pariatin an sawi a, vawiinah hian pahnihin kan tam hret a, a lawmawm hle mai. Tha ti lo kan awm lova, kan thusawi dan a lawmawm em em a, tih leh hunah pheh chuan kan ticket hi kan pu ten an pe vek mai ang tih te pawh ka hlau deuh hlek mai a, helam thusawi nen a in zul em em a, a lawmawm khawpin ka hria a. Tin, kan House Leader-in a chhan chiah loh, chhan ngaia a ngaih loh te a nih ka ring a, Santosh Trophy Award a incentive cash award an pek zat te a rawn sawi a, a ropui hle a. Hna pek duhthawh taka kan Opposition Group Leader te pawn an rawn sawi kha keini Zico-a te bialtu han nih chuan a lo phurawm em em mai a, kan thinlung kha a inmil leh thlap mai a, vanneih thlak ka ti a, hengte pawh hi kan puten an tum mek niin ka hria a, a lawmawm hle mai a.

Tin, rain water harvesting kan Opposition Leader in a rawn sawi pawh kha kan House Leader pawh khan tha a ti em em a. Furah hian ruah ala sur zel dawnin a lang tlat mai a, hemi kan lo khawl kha chuan kan tui problem hi nasa takin a solve dawn niin a lang a, kan P.H.E Minister pawhin a chhinchhiahin ka hria.

Vawiinah kan Governor thu sawi kan han sawiho te hi a ropuiin a lawmawm a, hetiang a House-a lungruala thil tha duh tlang in kan sawi te hi Parliament leh state dang te session-ah hian awm tak ang maw! tih ka ngaihtuah a, a lungchhiat thlak zawkin ka hria a. A

sawi reng rengin that duhna leh rawtna a ni deuh vek mai a ni. Tin, kan House Leader te atangin khang kha tih an tum zia a rawn ri chhuak deuh zat zat bawk a. Dr. Beichhua te pawh kha Delhi-a kan training-naah khan kan inngai bawk a, 'ka pu, ka ngai lutuk che' kan inti hman deuh ziah bawk a. Kan Opposition Leader phei chuan 'Congress lamah i la zo thei mai dawn' te min ti a, kan inngaina hlawm khawp a. Kei pawh deputation a min dil te an tum mai mai a, kan in ngaina tlang hlawm khawp a. Hetianga vawiinah pawh kan han sawihona atang hian thil tha duh awm khawm, a bawp lawka lak tum lo awm khawm chuan kum nga a han vei meuh chuan he ram hi kan her danglam bawihin ka ring a, lawmthu sawi mai loh chu tih tur a awm lovin ka hria. Tichuan, Pu Speaker, he House zahawm tak hi kan Governor Speech a lawmthu sawina motion ka rawn putluh hi min pawmpui turin ka rawn ngen e.

\* Speech not corrected.

**SPEAKER** : Motion neitu Pu T. Sangkunga'n adopt turin House phalna a dil a, hei hi adopt kan remti a ni ti zawngin 'Rem ti' ti ila (Memberte : Rem ti). Rem ti lo kan awm em?. He motion hi lungrual taka adopt a ni tih ka puang e.

Tihian vawiina kan programme chu tluang takin kan zo thei ta a, a ropuiin a lawmawm a ni. Naktuk tarik ni 20, March zing dar 10:30-ah kal khawm leh turin kan haw rih ang.

**Sitting Adjourned at 3:30 PM**